

Rediidx Nani Bacuaa Lucas Xcuent Jesucrist

Xhicuent bacuaa Lucas rediidxre

¹ Xhidajl bejn abacuaa lo guitz xcuent guiraa redzuun ni gujc nez loonu te cuäxnejzreni redzuunga ² si'cpac ni biääd rediidxga loonu. Rebejn nani bahuiloj guiraa recosre cheni guslojlireni, näjza reni gucnäj basule' xtidx Dios najc renani basule' rediidxga loonu. ³ Luxh sa'csi abilä, abahuiloä, abenduxhä xhigab xcuent guiragajc ni gusajc che gusoblojlini, ni'c runä xhigab laaca gucuaä rediidxre, xnejz-xnejzni lo guejblu, Dad Teófilo, ⁴te gachesa'c guejblu ni najc didxlii xcuent guiraa rediidx ni abisieed guejblu.

Te xangl Dios gunii xho gaal Juan ni rutiobnis

⁵ Cheni gujc Herodes reii xten región Judea, guyu' te bixhojz ni laa Zacarías, ni nadxaag lo rexpejn Abías. Chäälni laa Elisabe't, ni najcza te xagdoo bixhoz Aarón. ⁶ Guiro'preni najcreni nadolajz nez loj Dios, rusobreni xtidx Dios näjza xleii Dios, ni'c digacdi gucuaquij bejnreni xcuent nicla tej dojl. ⁷ Luxh ruti xi'nreni, sa'csi chäälni digacdi chu xi'nni. Luxh guiro'preni anajcreni bengool.

⁸ Te dxej, lał ni cayujn Zacarías dzuun nen guidoro si'c bixhojz nez loj Dios, ⁹ dxejc con daad bibee chuni'c jiu' nen yudxan xten guidoro te guze'creni yaal si'cni najc costumbr xten rebixhojzga. Dxejc si'c gulereni Zacarías gunni. ¹⁰ Lał

ni caguze'cni guxhyaal, suga' guiraa rebejn lo xle' guidoro, cabedx-canabreni lo Dios. ¹¹ Dxejcti baluiloj te xangl Dios lo Zacarías, suliiini ladbee lo dxan cadre cayejc guxhyaal. ¹² Che bahuii Zacarías lo xangl Dios, di jien xhi gunni, lacti bidxebduxhni. ¹³ Sas xangl Dios räjp lojni:

—Na'c guidxejblu, Zacarí, sa'csi Dios abiejn diajgni xtiidxlu, luxh su' te xi'n cháálu, Elisabe't; cuälajluni Juan. ¹⁴ Sibalazduxhlu, siroob lastoolu; xhidajl bejn sibalajz sa'csi gaalni, ¹⁵ sa'csi benro gac xi'nlu nez loj Dios. Dini yä bin, nicla maxcaal. Sibäjz Sprit Dxan xten Dios nen lastooni cheni gaallini. ¹⁶ Sujnni gusiechlajz xhidajl rexpejn Israel, guibi'reni lo Gueb Dios. ¹⁷ Juanre sinijdni loj Dad, sujni lagajc xhigab, sajpní lagajc yälrnibee ni gojp profe't Elías, te che jiejn diajgredi xtiidxni susiechlajz redad, susiäjzarení diidx con rexi'nrení. Sigajcza rebejn ni di gusoob xtidx Dios sisieedrení gusoobrení xtidx Dios, te si'c jiädsucheeni lastoo rebejn te chalilajzrení xtidx Dad ni jiäd.

¹⁸ Gunabdiidx Zacarí loj anglga, räjpni:

—¿Xho mood gacheä guliilu? Sa'csi anacä bengol, sigajcza chälä.

¹⁹ Dxejcti räjp anglga lojni:

—Narä nacä Gabriel, runä dzuun lo Dios. Laani baxhalni narä te guininää luj, jiädnäá didxhueenre lojlu. ²⁰ Luxh naj, sa'csi dilajzlu nilii xtidxä, sia'nlu gop, digacdiru guiniilu, cheni gaalli xi'nlu sinisaclu. Rextidxä sisiojb che guidzujn dxej che riäjlgacni.

²¹ La^lni cayajc dee, cadxeloj rebejn ni suga' nez ro' yudxan cabäjzreni guirii Zacaríi sa'csi caya-claani neñ yudxan. ²² Che birii Zacaríi, di niajcdiru niniini loj rebejn; dxejc gucbeerani yu' xhi cosro bahuiini neñ yudxan xten guidoo. Dxejc con seen guninäjni rebejn^ga, sa'csi xheti xse'ni te niniini.

²³ Che gulujx bejnⁿi dzuun neñ guidoro, gubi'ni rolizjni. ²⁴ Che gudejd redxej dxejcti bazeñ nuu Elisabe't, chäälⁿi, báz, gaii bäii diruni niriⁿi rolizjni. Bejnⁿi xhigab, räjpni: ²⁵ “Si'c bejn Dad Dios narä ñaj, gucnäjni narä te diru bejn cuälaz narä sa'csi ruti xi'nä.”

Biäddeed te xangl Dios diidx lo Marii gaal Jesús

²⁶ Che gudejd xho'p bäii, baxhal Dios xanglni Gabriel lo te guedx Galilee ni laa Nazare't, ²⁷ te chahuiini te dxapxteeb ni laa Marii. Agojt xtiidxni te guchñaani te dade' ni laa José. Dade're najc xagdo^o toreiⁿi David. ²⁸ Biu' anglre cadro sobga' dxape'ga, räjpni lojni:

—Xchan, dxa'p ni sanälajz Dios, ni agule Dios loj guiraa regunaa. Dios gacnäjlu. Abenle' Dioslu loj guiraa regunaa.

²⁹ Luxh che bahuiini lo xangl Dios bidxelojni lo rextiidxni, rujnⁿi xhigab: “¿Xhicuent caniini si'c loä?” ³⁰ Dxejc räjp xangl Dios lojni:

—Na'c guidxejblu, Marii; agule Dios luj. ³¹ Bacuadiajg diidx. Suulu báz, su' te xi'nlu. Che gaalni guirilajni Jesús. ³² Laani sajcnⁱ te bejn ni sacduxh. Sirilajzani Xi'n Gueb Dios ni yu' xhaguibaro. Gueb Dios sujn gacni reiⁿi sigajc ni gujc toxtadgoldooni David, ³³ te tejpas guinibeeni loj rexi'n Israel, luxh dipac xcälrnibeeni nitloj.

³⁴ Dxejc gunabdiidx Marii lo xangl Dios, räjpni:
—¿Xho mood gac dee? Ni dxapxteeb narä, gajd narä gumbeä niguii.

³⁵ Badzu' xangl Dios diidxre lojni, räjpni:
—Sprit Dxiän xten Dios siääd lojlu, xcälrnibee Gueb Dios ni yu' xhaguibaa suhuajcwni luj si'c te za. Ni'cni báz ni gaal sajcní te beñdxan, sibälaj bejnñi Xi'n Dios. ³⁶ Nájza sa'lu Elisabe't su' te xi'nni luxh anajcni te beñgool; ni'cni gunaa nani najreni digacdi chu xi'nni agujc xho'p bäii nuuni báz. ³⁷ Xheti te cos ni naganduxhtej nez loj Dios —räjp Xangl Dios.

³⁸ Dxejcti räjp Marii:
—Narä nacä xmos Xtadnu Dios; mbaj, sugunnäj Dios narä si'ctisni gunii gueblu loä.
Dxejcti biunejz angl xten Dios lojni, sä'tini.

Bihuii Marii lo Elisabe't

³⁹ Neñ redxejga, basquejn Marii sääni lo te guejdx ni tre' neñ redajn xten Judea. ⁴⁰ Biu'ni rolijz Zacarí, guniini xtidxbee loj Elisabe't.

⁴¹ Che biejn diajg Elisabe't guniini, biniib xi'nni xque'ni, gudxaj Sprit Dxiän xten Dios lastoo Elisabe't. ⁴² Dxejc dipduxh guniini räjpni:

—Abenle'ru Gueb Dios luj loj guiraa regunaa. Abenle'zani xi'nlu. ⁴³ ¿Chu narä te siädhuii xnan Xtioozä narä? ⁴⁴ Biejntis diagä xtiidxlu, bibalazgajc xi'nä, biniibni xque'ä. ⁴⁵ Sibaa lajzlu, luj ni huililajz sisiojbpac nani gunii Xtadnu Dios.

⁴⁶ Dxejc räjp Marii:
Xaimä rliä'p xpala'n Xtadnu Dios.
⁴⁷ Rbalazduxhza lastoä xcuent Dios ni ruslaa narä lo dojl.

48 Sa'csi agule Dios narä,
 nacä te mos gunaa ni xhet sajcdi,
 luxh najli sinii rebejn näjza reni churu chu lo
 guedxliuj,
 chicbaani loj guiraa regunaa.

49 Sa'csi Gueb Dios ni rajp guiraa yälrnibee abejn
 xhidajl cosro löä,
 dxanduxh najc lajni.

50 Dini cuääz gulaslajzni guiraa rebejn ni riu xti-
 idxni, reni rajjni.

51 Xhidajl cosnagajn abejnni con lagajc naani,
 abatie'chni renani rustioob lastooreni rliä'p lagajc
 xpala'nreni.

52 Abasajbni reni rnibee,
 per rebennadolajz bejnni gacreni benro.

53 Bachajni xque' reni calaan,
 badeedni ganax cossa'c,
 niluxh badzu'ni rebejn ni yu' xhixtenreni xhet
 badeed dini lojreni.

54 Gucnäjni nación xten xpejn Israel, ni najc xmos
 Dios.

Di lajzni niäl nulaslajznireni

55 sa'csi si'c bia'nni diidx con retoxtadgoldoonu,
 sinuu gulazlajzni toAbram näjza rexagdooni par
 tejpas.

56 Dxejc bia'n Marii rolijz Elisabe't si'cti chon
 bäii, dxejc gubisacni rolijzni.

Che gojl Juan ni rutiobnis

57 Che baza' xpäi Elisabe't, dxejc gojl xpäzni te
 báz niguiini. 58 Dxejc bidzujn rexpisinni näjza
 resa'ni biädhuiireni guiro'preni che gucbeereni
 lacti hueen gujc Dios con laani. Bibalaznäjrenini.

⁵⁹ Che gudejd xhujn dxej, huinäreni bäze'ga chuni bee. Rlajz rebejn nirilaj bäze'ga si'c laa xtadni, Zacaríi. ⁶⁰ Niluxh xnanni räjp:

—Na'c, guirilajpacni Juan.

⁶¹ —¿Xhicuent? —räjpreni—. Ruti xfamilu ni laa si'c.

⁶² Dxejcti gunabdiidxreni con seen lo xtad bäze'ga te gacbeereni xho rlajzni guirilaj bäze'ga.

⁶³ Xtadni gunab te la' guijt, dxejc bacuaani: “Lajni najc Juan.” Dxejc guiraareni bidxelojreni.

⁶⁴ Luxh lagajc dxejc gujc gunii Zacaríi stehuält, dxejc guslojni calä'pni xpala'n Dios. ⁶⁵ Bidxeloduxh rexpisijnreni xhini'c gujc ro'c. Luxh bire'ch diidx xcuent recosre guideb neñ redajn xten Judea.

⁶⁶ Guiraa reni biejn diajg rediidxga gusloj cayujnreni xhigab, dxejc gunabdiidxreni loj sa'reni:

—¿Chuchani'c gac biuxe'ga?

Si'c guniireni sa'csi huenliisi abenle' Diosni.

Dij ni bil Zacarí

⁶⁷ Dxejcti biääd Sprit Dxañ xten Dios neñ lastoo xtadni Zacaríi, gusloj caniini rediidx ni badeed Dios lojni, räjpni:

⁶⁸ Guiliä'pnu xpala'n Dios, Xtios rexpejn Israel, sa'csi abiädhuini loonu, ni najcnu rexpejni, te siädguslaani nuurnu neñ dojl.

⁶⁹ Abaxhalni loonu te bejn ni rajp yälrusladuxh bejn neñ dojl.

Najcni te rexagdoo toxmosni David.

⁷⁰ Lagajc si'cni badeed Dios gunii redade' ni bacuaa xtiidxni lo guijt galoo:

⁷¹ Suslaani nuurnu loj reni rdxe'ch loonu, näjza ladznaa rebejn ni gulälaz nurnu.

72 Te gulaslajzni retoxtadgoldoonu,
te soob diidx ni bia'nni con rebejn̄ga.

73 Scree bia'nni diidx con toxtadgoldoonu, Abram:

74 Suslaani nuurnu ladzn̄aa rebejn̄ ni rdxe'ch
loonu,

te na'c guidxeebnu chunu lojni gusoobnu xtiidxni,

75 con yäl̄nabaṅsa'c näjza yäl̄guxhtis guiraa redxej ni
guibaj̄n̄nu.

76 Luxh luj, bäze', sirilajlu dade' nani rnii xtidx
Gueb Dios ni yu' xhaguibaa,
sa'csi sinijdlu lo Dad te gusucheelu rexnezyula-
jz̄ni,

77 te gunlu gacbee rexpejn̄ni xho gac laani lo dojl̄,
te gac guibicaj xtoj̄l̄reni.

78 Sa'csi Dios sanälajz bejn̄,

näjza rulaslajzni bejn̄ ni'cni xhaguibaali suxhal̄ni
xi'nni te jädnäni te dxecoob,

79 te gusanijni lo rebejn̄ ni nabaj̄n̄ lo yäl̄xcäjy xten
dojl̄,

näjza rebejn̄ ni nabaj̄n̄ lo xpalaa yäl̄gujt,
te guluini xho sānu lo xnez yäl̄rbecdxilajz.

80 Dxejc gunís biuxe'ga, guyuduxh xcäriejn̄ni
xcuent recos xten Dios. Gubaj̄n̄ni nez loj reyubi-
jdz cheni bidzuj̄n̄li dxej che baluilojni loj rexpejn̄
Israel, che gusloj cagusule'ni xtidx Dios.

2

Che gojl̄ Jesús (Mt. 1:18-25)

1 Nen̄ redxejga, gunibee Augusto César xcaj laj
rebejn̄ guideb guedxliuj lo xquijtzni. 2 Ni'c na-
cobguc̄ yäl̄bigabre cheni najc Cirenio gobernadoor

xten Siria. ³ Guiraa rebejn nanab chääreni lagajc lajdxreni te ro'c guigabreni. ⁴ Ni'cni birii José guedx Nazare't Galilee, te huijni Judea, lo guedx Belén, cadro gojl toDavid, sa'csi najc José xagdoo toDavid. ⁵ Huinäni Marii, nani guchnaani, huijreni guedx Belén te ro'c guigabreni. Luxh nuu Marii báz. ⁶ Lalsi yu'reni guedx Belén, bidzujn dxej ni gaal xi'n Marii. ⁷ Ro'c gojl xi'n galooni, dxejc batejbnini te xzuudni. Dxejc gudixhnini cadro rusälreni guijxh rajw reguidxaa sa'csi xhetiru yu' xcalaareni jia'nreni.

Rexangl Dios näjza rebaxtoor

⁸ Gajxh guejdxga guyu' gaii baxtoor cayajpreni xhiilreni lo niaa guxhijn. ⁹ Chela baluiloj te xangl Dios, luxh bianij guideb gabireni con yälrdimbicha' xten Dios, dxejc bidxebduxhreni. ¹⁰ Sas anglga räjp lojreni:

—Na'c guidxejbtu, narä siädnäá lojtu te didxsa'c ni suspalajz guiraa beñ guedxliuj. ¹¹ Nadxej gojl neñ guejdx xten toDavid, tej ni gusläa beñ neñ dojl, laani najc Crist ni najc Dad. ¹² Dee najc te seen lojtu, sidxäلتu baze'ga nadejbni neñ te xzuudni, naga'ni cadro rusälreni guijxh rajw reguidxaa.

¹³ Lagajc dxejc guideb gabi anglga baluiloj naclejn xangl Dios, gulä'preni xpala'n Dios, räjpreni:

¹⁴ Collä'p xpala'n Dios ni yu' xhaguibaali.

Suchu yälrbecdxilajz lo rebeñ guedxliuj ni balazlazjni.

¹⁵ Che gubi' rexangl Dios xhaguibaa, gusloj rebaxtoor canii loj sa'reni:

—Colcho' guedx Belén colchohuii ni guzajc ro'c ni gunii Xtadnu Dios loonu.

16 Rusquenduxhreni sääreni, dxejc bidxälreni Marii näjza José näjza bäze' ni naga' neñ cadre rusälreni guijxh rajw reguidxaa. 17 Cheni bahui-ireni loj rebejn̄ga, bijreni diidx xhi räjp rexangl Dios lojreni xcuent bäze'ga. 18 Niluxh guiraa reni biejn diajg rediidxre bidxeloduxhreni xtidx rebaxtoorga. 19 Niluxh Marii gulucheeni guiraa rediidx ni biejn diajgni neñ lastooni, rujntisni xhigab xcuent rediidxga. 20 Dxejcti rebaxtoorga gubisacreni cayolreni, calä'pzareni xpala'n Dios xcuent guiraa rediidx ni biejn diajgreni näjza ni bahuiireni sa'csi guiraani gujc si'cni räjpreni lojreni.

Cheni huinäreni Jesús chuni bee

21 Che gudejd xhujn̄ dxej, huinäreni bäze'ga chuni bee, dxejc gulälajrenini Jesús, lagajc lajn̄ ni räjp xangl Dios loj Marii guirilajni galooli guuni bázga.

22 Che basa' redxej ni gac naya te nan si'cni gunibee toMoisés loj xquijtzni, huinäjreni bäze'ga guedx Jerusalén, neñ guidoro gunabreni gacnäj Diosni par tejpas. 23 Bejnreni scree sa'csi caj lo guijtz xten Dios: “Guiraa rexingangaloo xten bejn̄ guilia'tu lo sa'reni te gunreni xtzunä”, räjp Dios. 24 Bidzujn̄reni ro'c ca'reni te gojn̄ si'cni rnibee rexquijtz Dios: “Tio'p gugue' o tio'p palombáz.”

25 Neñ redxejga, neñ guedx Jerusalén rbäjz te dade' ni laa Simeón. Najcni te bensacduxh, ran̄duxhni Dios, cabäjzni jiäd te bejn̄ ni guslaa rexpejn̄ Israel. Rbäjz Sprit Dxi xten Dios neñ lastoo Simeón. 26 Sprit Dxi abejn̄ gacbeeni dini guet ansde fiini loj Crist ni guxhal̄ Dios. 27 Dxejcti räjp Sprit Dxi xten Dios lojni chääni

guidoro. La_lni yu'ni nen_u guidoo, bidzuj_u José con Marii, biäd_nä_reni bäs Jesús, te gunnä_reni Jesús nani rnibee xtid_x Dios gunreni. ²⁸ Dxej_c gudääz Simeón bāze'ga, gusloj calä'pni xpala'n Dios, räjpni:

²⁹ Dad, asajc gusaanlu guetä con yäl_rbedxilajz, sa'csi abasooblu nani bia'n diid_x gunnä_rju xmoslu. ³⁰ Sa'csi abahuiloä nani siädgus_laa nuurnu nen_u dojl,

³¹ ni abasujlu nez loj guiraa reben_u guedxliuj.

³² Laani najc bianij ni susanij loj rebejn_u ni di gac xpejn_u Israel,

nājza nani gac xpala'n rexpejn_ulu gued_x Israel, lajdxlu.

³³ Bidxeloj José nājza xnan Jesús rediid_x ni canii Simeón xcuent bāze'ga. ³⁴ Dxej_c benle' Simeón yejceni, dxej_c räjpni lo Marii xnan Jesús:

—Bahuii gan; bāze're biäd te loj rexpejn_u Israel chu reni sibälaz xtiid_xni, te chuza reni sililajz xtiid_xni. Laani gacni te seen nani sibälaz bejn_u, ³⁵ te si'c jienloj xhi xhigab rujn cade tej rexpejn_u Israel nen_u lastooreni. Dxejcti par luj saj_cni asdoo chääz te spaad lastoolu, sa'csi gac-huinduxh lastoolu.

³⁶ Suga'za te nane' ni laa Ana ro'c, rniini xtid_x Dios xcuent recos ni churu gac. Najcni xindxa'p Fanuel, ni najc fami_l xten Aser. Ana-jcni be_ugolduxh. Bach_naani che najcni dxaphuin, luxh gajdz_tis ijz guläznäj_ni chää_lni che bia'nni biuud. ³⁷ Najcni te gunabiuud ni yu' tajbitajp ijz. Diruni guirii guidoro, ro'ctis yu'ni dxej, yääl te yu'tisni lo Dios con yäl_rrucua'n nājza yäl_rbedx-rniab lo Dios. ³⁸ Che gubigni lojreni lagajc dxej_c, badeedni xquixtios lo Dios sa'csi abidzuj_u tej ni

gus_laa rebejn lo dojl. Dxejc gusloj caniini diid_x xcuent báz Jesús loj guiraa renani cabäjz yäl_rus_laa xten Jerusalén.

Che gubi'reni guedx Nazare't

³⁹ Che gulujx bejn xcuzajnni guiraa recos ni caj lo xquijtz Dios gunreni, gubisacreni Galilee, lo guedx Nazare't, lajdxreni. ⁴⁰ Gunís biuxe'ga, guc nadaanni, guc nasi_nruzani sa'csi cayacnäj Diosni.

Che biu' Jesús guidoro

⁴¹ Casob ijz rij rexuzajn Jesús guedx Jerusalén te rinäreni te gojn xten lanij pascw. ⁴² Che basa' Jesús tzubitio'p ijz, huij guiraareni guedx Jerusalén si'c najc costumbr gac lanijga. ⁴³ Che gulujx lanijga, gubisacreni. Bia'n Jesús guedx Jerusalén, luxh nicla xnanni niclaza José direni niacbee bia'nni. ⁴⁴ Bejnreni xhigab pet siädsanäjni rebe_nsa'ni. Si'c guzajreni tebdxej, dxejc gudiilrenini loj resa'reni, näjza loj reni rumbeereni, ⁴⁵ direni nidxäl_ni. Dxejc gubisacreni guedx Jerusalén te huitiilrenini ro'c.

⁴⁶ Chon dxej gudiilrenini dxejc bidxälrenini nen guidoro, sobga'ni nez galäi rebejn ni najn lei_i, cacuadiajgni xtiid_xreni, cayujnzani yäl_gunabdiid_x lojreni. ⁴⁷ Luxh guiraareni cacuadiajg xtiid_xni, cadxeloduxh_reni yäl_nnajn xtenni, näjza rediid_x ni cagudzu'ni lojreni. ⁴⁸ Che bahuii rexuzajnni lojni, bidxelojreni. Dxejc räjp xnanni lojni:

—Xi'nä, ¿xhicuent bennäjlu nuurnu scree? Narä näjza xtdlu cayunduxhnu xhigab caguiilnu luj nezree, nezre'c.

⁴⁹ Dxejcti räjp Jesús lojreni:

—¿Xhicuent caguilltu narä? ¿La ditu gan riäjĭ
gunä xtzun Xtadä, ä?

⁵⁰ Luxh laareni direni niacbee rediidx ni guniini
lojreni.

⁵¹ Dxejcti gubinäjnireni guedx Nazare't, sanuuni
rusoobni xtiidxreni. Luxh Marii guluchetisni
guiraa recosre neñ lastooni. ⁵² Duurtis gunís Jesús,
caroobruza xcälñajnni. Sanälajz Diosni, sanälajzza
guiraa rebejñni.

3

Yälrusule' Juan ni rutiobnis

(Mt. 3:1-12; Mr. 1:1-8; Jn. 1:19-28)

¹ Neñ redxej cheni agujc tzuun ijz najc Tiberio
César reii, Poncio Pila't najc gobernadoor xten
Judea; Herodes najc gobernadoor xten Galilee; Fe-
lige, bejtz Herodes najc gobernadoor xten Iturea
näjza Traconite; Lisantias najc gobernadoor xten
Abilinia. ² Lagajc neñ redxejga Anás näjza Caifás
najc rebixhojzro xten guidoro guedx Jerusalén.
Neñ redxejga biääd xtidx Dios lo Juan, xi'n Zacarí
cheni rbäjzni nez lo reyubijdz. ³ Ni'c cuanzaj Juan
guideb nez reyuj xten gueu Jordán, ro'c basule'ni
xcuent yälrusiechlajz, yälrobnis ni nanab gunreni te
gudzucaj Dios xtojĭreni. ⁴ Si'cni caj lo xquijtz Isaías,
dade' ni gunii xtidx Dios, cadre räjpni:

Riejn xse' te ni rbedxa' nez loj reyubijdz:

“Colyunsa'c xnezyuj Dad, colslĭi rexnezyulajzni.”

⁵ Guiraa cadre sojb gueed sidxe'ni,
guiraa relom sibicajreni,
guiraa renezyuj ni xhet naliidi, siliireni,
guiraa renezyudxuudx, saccsa'creni.

⁶ Dxejcti guiralii bejn suhii loj nani guxhal Dios.

⁷ Che bahui Juan siääd xhidalduxh bejn te guirobnisreni, räjpni lojreni:

—¡La'tu benguijdx ni najc si'c bälñialajz! ¿Chuni'c balijdxtu guxuntu loj xcälrdxe'ch Dios ni siädgajxh, ä? ⁸ Colguchaa xmoodtu te si'c fii bejn guliini abasiechlajztu. Na'c cuentis rniitu lagajc nen las-tootu “Abram najc xtadnu”, sa'csi narä rniä lojtu, sajc xca' Dios reguijre te con laareni guncheeni bejn gac rexagdo toAbram. ⁹ Aguibyajg naga' cuä' xlobaa reyajg; ni'cni guiraa reyajg nani di ninexhsa'c xcaj lojni, sidinreni te checreni.

¹⁰ Dxejcti gunabdiidx rebejn lojni, räjpreni:

—¿Xhini'c nanab jiennu?

¹¹ Dxejc badzu' Juan diidxre räjpni:

—Ni rajp tio'p xhajbni, sugudeedni tejni lo bejn ni xhet rajpdi. Sigajcza gun reni rajp xhi gaurenì, quisrenini loj ni xheti xhi gauni.

¹² Näjza gaii bejn nani rusquijx xcuent reim-puest bidzujn lojni te guirobnisreni, dxejc gunab-diidxreni lo Juan räjpreni:

—Dad, mastr, ¿xhini'c nanab jiennu?

¹³ Räjp Juan lojreni:

—Na'c gusquijxtu bejn maazdi ni nungäjl quixreni.

¹⁴ Näjza gaii resoldaad gunabdiidx lojni räjpreni:

—¿Nurnu a'? ¿Xhini'c nanab jiennu?

Dxejc räjpni lojreni:

—Na'c guchejbtu bejn; na'c gäbtu chale'ctu xcälquij bejn ni xhet bejndi parsi guniidxreni meel lojtu; colbalaznäj nani rujntu gaan.

15 Cadxeloj rebejn, cayujnreni xhigabduxh, naareni, “pet Juan najc Crist ni jiaäd.” 16 Dxejc badzu' Juan diidxre, räjpni loj guiraa rebejn:

—Guliipac rutiobnisä la'tu con nis, luxh siääd tej ni saj cru loä, nani nicla gac surloä, cuää xcura'chni. Laani sutiobnisni con Sprit Dxan xten Dios te cuääzni nen lastootu näjza con guiboo, sa'csi rajpruni yälrnibee loä. 17 Aca'ni pal te gusiani triuu te cuääni triusa'c lo guijxh te cucheeni triuu nen ngodx xtenni, dxejcti reguixhtriuga suze'cnini lo bajl ni rejc par tejpas.

18 Rediidxre näjza xhidajl yälrlujdx gunii Juan te basule'ni redidxcoob loj rebejn. 19 Näjza lo Herodes ni najc gobernadoor basule' Juan diidx, gudilnäjnini sa'csi xhet laadi cayujnni, sa'csi rbäznäjni Herodías, chääl bejtzni Felipe, näjza xcuent sgaii dojl ni bejnini. 20 Di Herodes niu xtidx Juan, alga bejnini stee dojl, basälni Juan nen latzguiib.

Che gurobnis Jesús

(Mt. 3:13-17; Mr. 1:9-11)

21 Che batiobnis Juan rebejn, näjza Jesús birob-nis. Cheni cabedx-canabni lo Dios, bixal xh-aguibaa, 22 dxejc biäjt Sprit Dxan xten Dios si'c te palom, bidzujnni cadre suga' Jesús. Dxejc xh-aguibaali biejn xse' te ni räjp:

—Luj, najclu xi'nä ni sanälazä. Rbanälazduxhä luj.

Resa' Jesús

(Mt. 1:1-17)

23 Yu' Jesús galbitzoo ijz che gusloj cayujnni dzuun ni badeed Dios gunni. Rchalo rebejn najcni

xi'n José, xi'n Elí. ²⁴ Elí gujc xi'n Matat. Matat gujc xi'n Leví. Leví gujc xi'n Melqui. Melqui gujc xi'n Jana. Jana gujc xi'n José. ²⁵ José gujc xi'n Matatías. Matatías gujc xi'n Amós. Amós gujc xi'n Nahum. Nahum gujc xi'n Esli. Esli gujc xi'n Nagai. ²⁶ Nagai gujc xi'n Maat. Maat gujc xi'n Matatías. Matatías gujc xi'n Semei. Semei gujc xi'n José. José gujc xi'n Judá. ²⁷ Judá gujc xi'n Joana. Joana gujc xi'n Resa. Resa gujc xi'n Zorobabel. Zorobabel gujc xi'n Salatiel. Salatiel gujc xi'n Neri. ²⁸ Neri gujc xi'n Melqui. Melqui gujc xi'n Adi. Adi gujc xi'n Cosam. Cosam gujc xi'n Elmodam. Elmodam gujc xi'n Er. ²⁹ Er gujc xi'n Josué. Josué gujc xi'n Eliezer. Eliezer gujc xi'n Jorim. Jorim gujc xi'n Matat. ³⁰ Matat gujc xi'n Leví. Leví gujc xi'n Simeón. Simeón gujc xi'n Judá. Judá gujc xi'n José. José gujc xi'n Jonán. Jonán gujc xi'n Eliaquim. ³¹ Eliaquim gujc xi'n Melea. Melea gujc xi'n Mainán. Mainán gujc xi'n Matata. Matata gujc xi'n Natán. ³² Natán gujc xi'n David. David gujc xi'n Isaí. Isaí gujc xi'n Obed. Obed gujc xi'n Booz. Booz gujc xi'n Salmón. Salmón gujc xi'n Naasón. ³³ Naasón gujc xi'n Aminadab. Aminadab gujc xi'n Aram. Aram gujc xi'n Esrom. Esrom gujc xi'n Fares. Fares gujc xi'n Judá. ³⁴ Judá gujc xi'n Jacob. Jacob gujc xi'n Isaac. Isaac gujc xi'n Abraham. Abraham gujc xi'n Taré. Taré gujc xi'n Nacor. ³⁵ Nacor gujc xi'n Serug. Serug gujc xi'n Ragau. Ragau gujc xi'n Peleg. Peleg gujc xi'n Heber. Heber gujc xi'n Sala. ³⁶ Sala gujc xi'n Cainán. Cainán gujc xi'n Arfaxad. Arfaxad gujc xi'n Sem. Sem gujc xi'n Noé. Noé gujc xi'n Lamec. ³⁷ Lamec gujc xi'n Matusalén.

Musalén gujc xi'n Enoc. Enoc gujc xi'n Jared. Jared gujc xi'n Mahalaleel. Mahalaleel gujc xi'n Cainán. ³⁸ Cainán gujc xi'n Enós. Enós gujc xi'n Set. Set gujc xi'n Adán. Adán gujc xi'n Dios.

4

Che biricaj beṅdxab loj Jesús (Mt. 4:1-11; Mr. 1:12-13)

¹ Jesús, sa'csi rbäjz Sprit Dxan xten Dios las-tooni, biunejzni gueu Jordán, dxejc huinā Sprit Dxan xten Diosni lo reyubijdz. ² Ro'c bia'nni tiuu gubijdx, tiuu guxhijṅ. Ro'c bidzujṅ beṅdxab ni rnibee te rlajzni gunni gusoob Jesús xtiidxni. Luxh calaan Jesús, sa'csi gajdni gau guiraa neṅ redxejga. ³ Dxejc räjṅ beṅdxab lojni:

—Palga guliilu Xi'n Dioslu, gunibee gac reguijre yätxtiil.

⁴ Badzu' Jesús diidx lojni räjṅni:

—Acaj loj reguijtz xcuent Dios: “Xhet ganaxdi yätxtiil gun sajc guibajṅ bejṅ, nājza guiraa diidx nani rni Dios sujn guibajṅ bejṅ.”

⁵ Dxejcti huinā beṅdxab Jesús jiaa yejc te dajn. Teratbäztis baluilojni guiraa reguedxro ni tre' lo guedxliuj. ⁶ Dxejc räjṅ beṅdxab lojni:

—Narā sunidxā guiraa yälrnibee nājza reyälṅnasa'c ni yu' loj reguejdxga sa'csi xtenā guiraareni, luxh sajc gudedāni lo chutis ni rlazā.

⁷ Palga luj suzuxhijblu loä, guiliä'plu xpala'nä, guiraani sajc xtenlu.

⁸ Dxejc Jesús badzu' diidx, räjṅni lojni:

—Acaj loj xquijtz Dios: “Dad Xtiostislu ganlu, luxh lojtisni chulu gunlu dzuun.”

⁹ Dxejcti huinā beṇdxabni lo guedx Jerusalén, huinānini jiaa yejc xques guidoro. Dxejc räjp beṇdxab lojni:

—Palga guliilu najclu Xi'n Dios, gutiäjs lo yuj
¹⁰ sa'csi si'c caj loj rexquijtz Dios:

Suxhal Dios rexanglni te ga'preni luj,

¹¹ guiniaazreni luj didi jiajblu lo guij.

¹² Badzu' Jesús diidx lojni, räjpni:

—Cajza lo rexquijtz Dios: “Na'c fallu Dad ni najc Xtioozlu.”

¹³ Che baluux beṇdxab rextiidxni, gubicajni lo Jesús sa'csi dini niujn gaan nusoob Jesús xtiidxni. Gulājzni guidzujn stee dxej te gusacsíruni Jesús.

Gusloj Jesús cayujn xtzuunni

(Mt. 4:12-17; Mr. 1:14-15)

¹⁴ Dxejc gubi' Jesús lo rexyuj Galilee räjpni yäl̄nibee xten Sprit Dxan. Bire'ch diidx xcuentni guiraa neṇ reguejdx ni tre' nejzga. ¹⁵ Ruluiini neṇ reguidobāz luxh guiraa rebejn̄ rliä'p xpala'n̄ni.

Jesús guyu' guedx Nazare't

(Mt. 13:53-58; Mr. 6:1-6)

¹⁶ Dxejcti huij Jesús guedx Nazare't cadro gulaani. Che gojl dxej ni rusilajz rexpejn̄ Israel, biu'ni neṇ guidobāz sigajc ni rujnpacni, dxejc huisuliini te biṇni ¹⁷ reguijtz xten Dios. Badeedreni lojni guijtz ni bacuaa Isaías; cheni baxhalni guijtzga, bidxäl̄ni cadro rnii scree:

¹⁸ Sprit Dxan xten Dios suganāj narä, sa'csi agule Dios narä te gusule'ä xtidxcoobni lo reben̄proob.

Baxhalni narä te gusiaca lastoo renani di lastooreni cuedxi,

te gusule'ä yälruslaa lo rebejn ni yu' lo dojl,
te gusiaca baloj reben lotiä'p, te guslaä reben ni
cadejd trabajw,

¹⁹ te gusule'ä abiu' ijzsa'c che rulaslajz Dios rebejn.

²⁰ Dxejc basäu Jesús reguijtzga, badeednini loj bejn ni cayacnäj neñ guidooga, dxejc gurejni. Sa'csi guiraa rebejn ni sobga' neñ guidooga cahuidzu'tzreni lojni, ²¹ gusloj guniini, räjpni lojreni:

—Lagajc nadxej guzojb rediidx ni caj lo reguijtzre nez loj guiraatu.

²² Guiraareni sarú guniireni xcuent Jesús, bedxeloduxhzareni redidxsaruduxh ni guniini lojreni. Gunabdiidxreni loj sa'reni, räjpreni:

—¿La et xi'ndi José dade're, ä?

²³ Dxejc räjp Jesús lojreni:

—Siniipactu rediidxre loä: “Doctoor, basiajc lagajc luj”; siniizatu loä: “Recos ni biejn diajgnu bejnlu nez guedx Capernaum, lagajc recosga bejn nez ree cadre najc lajdxlu.”

²⁴ Dxejc huinuu xtiidxni, räjpni lojreni:

—Rniliäpac lojtu, nicla tej redade' ni rnii xtidx Dios, di reben lajdxreni jiu xtiidxni. ²⁵ Luxh rniliä lojtu, che gubajn Elías lo guedxliuj, guyu' xhidajl gunabiuud guedx Israel che di nisguij niajb chon ijz garol, dxejc guyu' yälrianduxh guideb guejdxga. ²⁶ Luxh di Dios nuxhal Elías rolijz nicla tej regunabiuud ni guläjz guedx Israel, alga baxhalnini lo beñzajt, rolijz te gunabiuud ni rbäjz Sarepta, gajxh guedx Sidón. ²⁷ Sigajcza che gubajn Eliseo lo guedxliuj, guyu' xhidajl beñ racxhuu ni ral tiejxhreni guedx Israel, luxh dini nusiajc nicla

tejnreni, alga basiajcnī dade' ni laa Naamán, ni siäd te guedxzijt ni laa Siria.

²⁸ Che biejn diajg reni sobga' neñ guidoo rextidx Jesús, bidxechduxhreni, ²⁹ huisuliireni, guläärenini neñ guejdxga. Dxejc huinärenini yejc dajn cadro tre' guejdxga cadro yu' te balaro, te ro'c rlanjreni nustejbrenini. ³⁰ Dxejc Jesús sigaj gudejdni galäiireni, sä'tini ste'ca lajt.

Gulää Jesús beñdxab lastoo te dade'

(Mr. 1:21-28)

³¹ Dxejc huij Jesús guedx Capernaum, te guejdx xten Galilee. Ro'c gusloj cagusule'ni diidx loj rebejn che gojl dxej ni rusilajz rexpejn Israel.

³² Bidxeloduxhreni xtiidxnī sa'csi rusule'ni si'c te bennajn, si'c te ni rnibee.

³³ Neñ guidooga suga' te dade' ni rbäjz te beñdxab neñ lastooni. Guredxa'ni ³⁴ räjpni:

—¡Aii! ¡Basaan nurnu! ¿Xhicuent riädchu'lu loonu Jesús ni siäd Nasare't? ¿La siädlu te gunitlojlu nuurnu, ä? Narä numbeälu, nanä najclu Xin Dxan Dios.

³⁵ Gudidxa' Jesús lo beñdxabga, räjpni lojni:

—Basäu ro'lu, birii lastoo niguiire.

Dxejcti beñdxabre basäl niguiiga lo yuj nez loj guiraareni, dxejc biriini neñ lastoo dade'ga, per xhet bejndini dade'ga. ³⁶ Bidxeloduxh rebejnğa, dxejc gusloj caniiireni lo sa'reni, räjpreni:

—¿Xhi diidx najc redee? Bahuii xho rnibee dade're rebeñdxab con yälrnibee, luxh rusooob rebeñdxab xtiidxnī, riireni lastoo bejn.

³⁷ Dxejc gusäab xtidx Jesús lo guiraa reguejdx ni tre' guideb gabi guejdxga.

Rusiajc Jesús xnan xueerg Pedr
(Mt. 8:14-15; Mr. 1:29-31)

³⁸ Birii Jesús guidobáz, huijni rolijz Simón. Dxejc naga' xnan sueerg Simón, cayacxhuuni, yu'ni xliaduxh. Sas gunabduxhrene lojni te gusiajcnini.

³⁹ Gubig Jesús loj nane'ga, gudidxa'ni xliaaga, luxh lagajc orġa biriini xliaa. Dxejc huistiegajcni, gusloj cayujnni mandaad, cahuiinireni.

Rusiajc Jesús xhidajl yälracxhuu
(Mt. 8:16-17; Mr. 1:32-34)

⁴⁰ Laġ ni cayääz gubijdx, guiraa reni rajp beṇracxhuu ni rajc garen garen yälracxhuu biädnäreni rebejnġa lo Jesús. Dxejc laani batzuubni ṇaani yejc teġgareni, dxejc biajc rebeṇracxhuuga. ⁴¹ Loj rebeṇracxhuuga, yu'reni birii rebeṇdxab neṇ lastooreni, rbedxa'reni räjpreni:

—Luj najclu Xi'n Dios.

Luxh Jesús gudilṇäjni rebeṇdxab, dini nusaa niniireni sa'csi laareni najnreni najcni Crist ni cabäjzreni.

Rusule' Jesús xtidx Dios
(Mr. 1:35-39)

⁴² Che bianij, biriini lo guejdx, huijni te lajt cadro rut rbäjzdi. Niluxh gudiil rebejnṇi, dxejc bidzujṇreni cadro suga'ni. Rlajzreni nuscuääzrenini te di nuiini. ⁴³ Dxejc Jesús räjp lojreni:

—Nanab cha'a chasule'ä rextidx xcuent xcälṇnibee Dios xhidajlruga guejdx, ni'cni baxhalpac Dios narä.

⁴⁴ Dxejc si'ctis cuanzaj Jesús basule'ni xtidx Dios neṇ guiraa reguidobáz neṇ reguejdx xten Galilee.

5

*Che gunaazreni xhidajl bājł**(Mt. 4:18-22; Mr. 1:16-20)*

¹ Cheni suga' Jesús ro' nis ni laa Genesare't, gubig xhidajł bejn lojni te jiejn diajgreni xtidx Dios. ² Dxejc bahuii Jesús tio'p barcw ni suga' ro' nisga, rud yu'di neņreni sa'csi rebejn ni rniaaz bājł abiriireni neņ rebarcw te caguiibreni xquijxhreni ro' nisga. ³ Dxejc biu' Jesús neņ te barcw ni najc xten Simón, dxejc gunab Jesús chää barcwga lo nis te la', te guibicajni ro' yuj. Dxejc gurej Jesús neņ barcwga, ro'cli guslojni caguluiini rebejn. ⁴ Che gulujx xtiidxni, rājpnı loj Simón:

—Huinä barcw cadro jiättru, colcuaa xquijxhtu lo nis te guiniaaztu bājł.

⁵ Rājpnı Simón lojni:

—Mastr, guideb yääl biennu dzuun, luxh dinu niniaaz nicla tej bājł, niluxh naj agunibeelu gusałsacnu guijxh lo nis.

⁶ Cheni basälreni xquijxhreni lo nis, gunaazreni xhidalduxh bājł, dxejc guslojli caräjs xquijxhreni.

⁷ Dxejc bejnreni seen loj resa'reni ni yu' neņ stee barcwga te jiädycnäjreni. Bidzujntireni, bachajreni guiro'p barcw. Gudxaduxh rebarcw, ameer niääzreni neņ nis. ⁸ Che bahuii Simón Pedr recosre, bazuxhıbnı nez loj Jesús, dxejc rājpnı:

—Gubicaj loä Dad, sa'csi narä nacä te beņdojł.

⁹ Si'c gunii Simón sa'csi bidxejb laani nājza guiraa rebejn ni yunäjni sa'csi gunaazreni xhidalduxh bājł. ¹⁰ Nājza Jacob nājza Juan, rexi'n Zebedeo, ni runnäj Simón dzuun, nājzarenı bidxejbreni. Per Jesús rājpnı lo Simón:

—Na'c guidxejblu, najli guisloj cueedxlu bejn lacuaa ni guiniaazlu bājł.

¹¹ Dxejc, che bidzuññajreni rebarcw ro' nis, basa'nreni guiraa xhixtenreni, te sanajłreni Jesús.

Basiajc Jesús te bejn ni rał tiejxhni

(Mt. 8:1-4; Mr. 1:40-45)

¹² Cheni guyu' Jesús tej reguejdx, bidzujñ te bejn lojni ni rajc lepra te yälguidxduxh ni rał tiejxhni. Che bahuiini loj Jesús, bazuxhijbni, basajbni lojni lo yuj, räjpnı lojni:

—Dad, palga rlajzlu, sajc gusiajclu narä.

¹³ Dxejc batzuub Jesús ñaani yejcnı räjpnı lojni:

—Rlazä jiajclu. Susiacälu.

Che guniini rediidxre, biacgajc beñ racxhuuga.

¹⁴ Dxejcti gunibee Jesús lojni rut lojdi gäbni xhi guzajcnı. Räjpnı lojni:

—Huijtis lo bixhojz te fiini lojlu, huisa'nza gojn xcuent ni biajclu si'cnı rnıbee xleii Moisés, te filoj rebejn abiajclu.

¹⁵ Luxh xpala'n Jesús sanuutis cayä'pruni, guixeguixee care'ch diidx xcuentni. Rdojpza xhidalduxh bejn te gucuadiajgreni xtıdx Jesús näjza te gusiajcnı yälracxhuu xtenreni. ¹⁶ Yu'za huält riunejz Jesús rijni relajt cadro ruti rebejn, te ro'c rbedx-rniabni lo Xtadni Dios.

Basiajc Jesús te bejn ni digacdi guiniib

(Mt. 9:1-8; Mr. 2:1-12)

¹⁷ Te dxej lałni caguluiini rebejn, nejzga sobga' gaii farisee näjza gaii bejn ni ruluii leii garen-garen reguejdx, siädreni guideb nez reguejdx xten Galilee, näjza región Judea, näjza guedx Jerusalén. Dxejc huenliisi rluiioj

suganäj xcäl̄rnibee Dios Jesús te rajc russiajčni rebenracxhuu. ¹⁸ Dxejc bidzuj̄n gaii dade' nuureni lo te lonbáz te bej̄n ni di gacdi guiniib, rlajzreni gusiu'renini neñ yu' te quixhrenini nez loj Jesús. ¹⁹ Niluxh direni nidxäl̄ canejz niu'reni sa'csi nadäduhx ro'c sa'csi tre' xhidajl̄ rebej̄n. Dxejc huäpnäjrenini yejc yu'ga, badzucajreni gaii tej, dxejc basajbreni xloon benracxhuuga yejcli yu'ga te gujc bidzuj̄ni nez loj Jesús. ²⁰ Che bahuii Jesús yäl̄rililajz xtenreni, räjpni loj benracxhuuga:

—Dade', agubicaj xtoj̄llu.

²¹ Dxejc rebej̄n ni ruluii leii näjza refarisee gusloj cayuj̄nreni xhigab, naareni: “¿Chucha niguiire ni caniyajni Dios con rextiidxni? Ruti te bej̄n ni sajc gudzucaj xtoj̄l̄ rebej̄n, Diostis rudzucaj dojl̄.”

²² Dxejc gucbee Jesús xhi xhigab cayuj̄nreni, ni'c räjpni lojreni:

—¿Xhicuent rujntu xhigab si'c neñ lastootu?

²³ ¿Xhini'c najc guyasiru guiniini: “Agubicaj xtoj̄llu”, o guiniini: “Huistie, guzaj”, ä? ²⁴ Mbaj̄ naj, suluiä nez lojtu Xi'n Dios ni gujc Xi'n Niguii rajp̄ yäl̄rnibee, yäl̄nadip lo guedxliujre te gudzucaj̄ni xtoj̄l̄ rebej̄n.

Dxejc räjpni lo bej̄nga ni digacdi guiniib:

—Lojlu rniä, ¡huistie, guläs xloonlu, huij̄ rolijzlu!

²⁵ Lagajc dxejc nez lojreni huistiegajc bej̄n ni digacdi guiniib, guläsni xloonna cadro naga'ni, dxejc siini rolijzni, calä'pni xpala'n Dios.

²⁶ Guiraareni rdxeloduxhreni recosga, dxejc guslojreni calä'preni xpala'n Dios, rdxej̄blireni räjpreni:

—Abihuiinu cosro, cos ni guidxeloj bej̄n nadxej.

*Rbejdx Jesús Leví**(Mt. 9:9-13; Mr. 2:13-17)*

²⁷ Che gudejd gulujx recosre, birii Jesús ro'c. Dxejc bahuiini lo te bejn ni rusquijx xcuent impuest, nani laa Leví. Sobga'ni lo te mex cadro rusquijxni impuest; ro'c bahuii Jesús lojni. Räjþ Jesús lojni:

—Gudanajl narä.

²⁸ Dxejc huisu Leví, basa'nni guiraa recosga, dxejc sanajlni Jesús.

²⁹ Dxejc bejn Leví te lanij rolijzni par Jesús. Biääd xhidajl bejn ni rusquijx xcuent impuest näjza sgaii bejn; sobganäjnireni lo mex. ³⁰ Dxejcti refarisee näjza rebejn ni ruluii leii guslojreni cayeinäjreni rexpejnþac Jesús, räjpreni:

—¿Xhicuent raunäjtu, ränäjtu rebejn ni rusquijx impuest näjza rebendojl, ä?

³¹ Dxejc badzu' Jesús diidxre, räjpni lojreni:

—Rebejn ni nadaan di guiquiin te doctoor, ganaxtis rebejn nani racxhuu rquineni te doctoor. ³² Dina niädtedxä rebeþsa'c, narä biädtedxä rebendojl te gusiechlajzreni.

*Gunabdiidxreni loj Jesús xcuent yälrucua'n**(Mt. 9:14-17; Mr. 2:18-22)*

³³ Dxejc gunabdiidx rebejnþga loj Jesús, räjpreni:

—¿Xhicuent lacti rucua'n rexpejn Juan näjza rexpeþ refarisee, lacti rbedx-rniabreni loj Dios; niluxh rexpejnþaclu alga rajwreni, rä'reni?

³⁴ Badzu' Jesús diidxre lojreni, räjpni:

—¿La sajc gucua'n rebejn ni yu' lo te sa' lałni yunäjreni bi'n, ä? ³⁵ Niluxh sidzujþ dxej cheni sibicaj bi'n lojreni, dxejc sii sucua'nreni.

³⁶ Guniiza Jesús cuentre lojreni, räjpni:

—Rut rucuaadi te remiend ladcoob loj te ladyujxh, sa'csi che rxu'n ladcoob rutiäjzni ladyujxhga, dxejc xhiroobruni guiräjs, luxh diza ladcoob guchaag lo ladyujxh. ³⁷ Di gacdi gusäl̄ni bincoob neṅ te guidbiejw sa'csi bincoobga sutiäsya'ni guidbiejwga dxejc sixe' binga, sixij̄nza guidbiejwga. ³⁸ Ni'cni nanab gusäl̄ni bincoob neṅ guidcoob si'c sigucheeza guiro'preni. ³⁹ Luxh nicla tej bej̄n ni agu' bin ni yu' agujc xchej r̄lajz yä bincoob, sa'csi säjbni: “Bin ni yu' agujc xchej najc huenru.”

6

Rutie' rexpej̄n Jesús triuu dxej nani rusilajzreni
(Mt. 12:1-8; Mr. 2:23-28)

¹ Te dxej ni rusilajz rexpej̄n Israel sasaj Jesús näjza rexpej̄n pacni nez loj reyuj cadro naga' triuu. Dxejc, sa'csi calaanreni gusloj calääd̄xreni doj lo triuu te cayajwrenini. ² Dxejc gunabdiidx gaii referisee ni najc beṅguidoo, räjpreni lojreni:

—¿Xhicuent rujntu dzuun ni di nungäj̄l guntu che rajl dxej ni rusilajznu?

³ Dxejc räjp Jesús lojreni:

—¿La gajdtu goṽ loj reguijtz xhi bejn toDavid cheni calannäj̄ni rebej̄n nani sanäni, ä? ⁴ Biu'ni neṅ xquidoo Dios, gudajwni yätxtiil nani di nungäj̄l gau bej̄n sa'csi xtebtis rebixhojz rajc rajwni, luxh badeedni yätxtiilga gudajw resa'ni.

⁵ Räjpza Jesús lojreni:

—Sigajcza narä, Xi'n Dios ni gujc Niguui, rnibeä dxej ni rusilajztu.

Niguui ni nabjdz naani
(Mt. 12:9-14; Mr. 3:1-6)

⁶ Che gojl stee dxej ni rusilajz rexpejn̄ Israel, biu'ni nen̄ te guidobáz, dxejc guslojni caguluiini rebejn̄. Lagajc ro'c sobga' te dade' ni nabjdz̄ ñaani ladbee. ⁷ Dxejc remastr xten leii nájza refarisee cagula'tzreni te don la susiajcn̄i bejn̄ga dxej ni rusilajzreni, sa'csi caguilreni xho gucuaijreni Jesús. ⁸ Niluxh laani najnni xhi xhigab cayujn̄reni, dxejc guniini lo dade' ni nabjdz̄ ñaani, rájpn̄i:

—¡Huisulii! ¡Gudaa nez galäiire!

Dxejc huisulii bejn̄ga, gubigni lojni. ⁹ Dxejc rájpn̄ Jesús lojreni:

—Rlazä guiniabdidxä lojtu dee: ¿Xhini'c najc huen gunni che rajl dxej ni rusilajznu? ¿La te dzunsa'c o la te dzunguijdx? ¿La gacnájnu bejn̄ laa xcäl̄nabajnni o la gudzucajnu yäl̄nabajnni, ä?

¹⁰ Che gulujx bahuii Jesús loj guiraa rebejn̄ ni tre' guideb gabini, rájpn̄i loj bejn̄ ni nabjdz̄ ñaani:

—¡Baslii ñaalu!

Dxejc bejnni si'c, luxh biacgajc ñaani. ¹¹ Dxejc bidxechduxh rebejn̄ ni tre' ro'c, gusloj canabdidxreni lo sa'reni xhi gunnájreni Jesús.

*Gule Jesús guitzubitio'p rexpejn̄pacni
(Mt. 10:1-4; Mr. 3:13-19)*

¹² Nen̄ redxejga, huij Jesús loj te dajn̄ te huin- inájni Xtadni Dios. Ro'c gudejdn̄i yääl cabedx-canabni lo Dios. ¹³ Che bianij lo yuj, gurejdxni rexpejn̄ni. Ro'c guleni tzubitio'preni te gacreni xpejn̄pacni. Gulälajni reapost. ¹⁴ Renani guleni najc Simón ni gulälajni Pedr; Andrés, bejtz Simón; Jacob; Juan; Felipe; Bartolomé; ¹⁵ Mateo;

Tomás; Jacobo xi'n Alfeo; Simón ni nagab loj rexpen cananista; ¹⁶ Judas, bejtz Jacobo; najza Judas Iscariote ni guto' Jesús loj rebixhojz.

Rului Jesús xhidajl bejn

(Mt. 4:23-25)

¹⁷ Che biätnäj Jesúsreni yejc dajnga, guzudxireni yejc te danbáz sa'csi suga' xhidajl bejn ro'c. Siädreni guiraa nez reguedx Judea, najza guedx Jerusalén najza reguejdx ni tre' gajxh nisdoo Tiro con Sidón. Rebejnnga bidzujnreni te gucuadiajgreni xtidx Jesús, te gusiajczanireni xcälracxhuureni.

¹⁸ Guiraa ni rdejza trabajw yu' bendxab nen lastooreni najza reni'c biajc. ¹⁹ Guiraa rebejnrlajz caan Jesús, sa'csi rusiajzni guiraareni con xcälrnebeeni.

Balijdx Jesús rebejn

(Mt. 5:1-12)

²⁰ Dxejc bahuii Jesús loj rexpejn pacni räjpni lojreni:

—Chicbaatu, bejn nani xheti xhixtentu, sa'csi xtentu najc cadro rnibee Dios xhaguibaa.

²¹ Chicbaatu, bejn nani calaan naj, sa'csi suniidx Dios lojtu nani rniabtu.

'Chicbaatu, bejn nani roon naj sa'csi susiäjł Dios lajztu dxejcru suxhijztu.

²² 'Chicbaatu, bejn nani rdxechlajz bejn lojtu, rbääreni la'tu te laad, rniyajreni la'tu, luxh rbälazreni lajtu si'c te cos guiidx sa'csi rililajztu xtidx Xi'n Dios ni gujc Niguui. ²³ Colguibalajz nen redxejga, na'c gac-huin lastootu sa'csi sunidxdxh Dios xhi xtentu xhaguibaa. Sigajcza basacsí rextadgoldooreni rebejn nani gunii xtidx Dios galoo.

24 'Probe'zatu, la'tu ben_rajp, sa'csi agojptu xcäl_nasa'ctu, xcäl_rbalajztu lo guedxliujre.

25 'Probe'tu nani rajp guiraloj xhixtentu _naj, sa'csi sidejdtu yäl_rliaan.

'Proobzatu ni ruxhijztu _naj, sa'csi sonduxhtu sidejdtu yäl_huinduxh, yäl_nalas.

26 'Probe'tu palga rliä'p rebejn xpala'ntu _naj, sa'csi si'c bejn retoxtadgoldooreni rebejn ni gunii didx-xhii lacuaa niniireni xtiidxpac Dios.

Chanälajzni rebejn nani rdxe'ch lojni

(Mt. 5:38-48; 7:12)

27 Räjpzani:

—La'tu ni cacuadiajgtu rextidxä rniä diidxre lojtu: colchanälajz rebejn ni rdxe'ch lojtu, colyujn dzunsa'c loj rebejn ni rdxechlajz lojtu. 28 Benle' yejc rebejn ni rgube la'tu. Gunab lo Dios xcuent rebejn ni rcuaquij la'tu. 29 Palga yu' chu r_lajz quiin te laad lojlu, badeedza stelaad quiinni. Palga yu' chu gudzucaj xhablojiaalu, badeedza näj xca-mangwlu xca'ni. 30 Xhitis ni guiniabreni lojlu, badeedni; ni gudzucaj te xhi xtenlu lojlu, na'c guiniabsacluni lojni. 31 Sigajc ni r_lajzlu gunnäj bejn la'tu, si'cza la'tu colyennäj bejn.

32 'Palga la'tu sanälajztistu rebejn nani sanälajz la'tu, xlia'sini, sa'csi sigajcza rujn rebendoj_l. 33 Palga guntu hueen lojtis rebejn ni rujn hueen lojtu, xhet laadi cayujntu, sa'csi sigajcza rujn rebejn ni nabajn nen_n dojl. 34 Palga gudedlaatu lojtis reni rujntu xhigab gunidxsacni lojtu, ¿xhi cos hueen rchalotu rujntu? Ni rebendoj_l rudedlaazareni loj rebejn ni najnreni siguixsac ni nasääbreni. 35 La'tu, nanab chanälajztu rebejn ni

rdxe'ch lojtu, guntu hueen lojreni, gudedlaatu loj rebejn, na'c gunlojtu xcasactu recos ni rudedlaatu, te si'c guroob gac nani guzalajz Dios lojtu; te si'c gactu xi'n Gueb Dios ni nabajn xhaguibaa. Sa'csi si'cza najc Dios huenduxh loj reni di gudeed xquixtios lojni, näjza loj rebejdojl.
³⁶ Colgulaslajz resa'tu si'c rulaslajz Xtdnu Dios guiraa rebejn.

Colgulaslajz sa'tu
(Mt. 7:1-5)

³⁷ Räjzani:

—Na'c guntu yälguxhtis nani rujn bejn, naatu xhet laadi rujni; te na'cza gun Dios yälguxhtis rextojltu. Na'c gucuaquijtu bejn te sigajcza di Dios gucuaquij la'tu. Colgusiäjł-lajz dojl ni rujn sa'tu, te si'cza gusiäjł-lajz Dios rextojltu. ³⁸ Colgudeed loj bejn ni rquiinreni te si'cza guzalajz Dios ni rquiintu. Suniidxreni xca'tu te mediid guidxadoo, si-betiyp ni yu' nenñi, cupe'tlini gusalreni neñ xpolstu. Dios suniidx lojtu lagajc con mediid ni rudeedtu loj rebejn.

³⁹ Guniiza Jesús stee cuent räjzni:

—¿La sajc guluii te beñ lotiä'p nez yuj lo stee beñ lotiä'p, ä? ¿La di guiro'preni guitejb neñ te gueed, ä? ⁴⁰ Te bejn ni casieed di gacdi guisieedruni loj ni najn xmastrni. Te bejn, che agulujx bisieedni, sajñi si'cni najc mastr xtenni.

⁴¹ ¿Xhicuent cahuiilu guixhe' ni yu' baloj bejtzlu, luxh dilu fii yagro ni yu' balojlu? ⁴² O, ¿xho mood gäblu lo bejtzlu: “Guidon cuää guixhe' ni yu' balojlu”; luxh dilu gacbee yu' te yagro balojlu, ä?

¡Ben̄guijdx! Guläxgaa yagro ni yu' balojlu, dxejc sajc fisa'clu te cuäálu guixhbäz ni yu' baloj bejtzlu.

*Ninexhsa'c ni rcaj loj te yajg sujn gumbeeni yajg
(Mt. 7:17-20; 12:34-35)*

⁴³ Räj pzani:

—Xheti te yagsa'c ni rudeed ninejxh ni xhet sajcdi, xhetiza te yajg ni xhet sajcdi ni rudeed ninexhsa'c. ⁴⁴ Sa'csi tebgaj reyajg ruseñlojni xhi yajgni xcuent ninejxh ni rcaj lojni. Di bejn̄ gutie' iigw lo reyaguejch, diza bejn̄ gutiu' uub lo te yag balagrejñ. ⁴⁵ Rebeñsa'c rnii didxsa'c, sa'csi xhigabsa'c yu' neñ lastooni. Niluxh reben̄guijdx rnii ganax didxguijdx sa'csi xhigabguijdx yu' neñ lastooni, sa'csi ro'ni rnii nani yu' neñ lastooni.

Tio'p bejn̄ ni benchee tio'p yu'
(Mt. 7:24-27)

⁴⁶ Räj pzani:

—¿Xhicuent rniitu loä: “Dad, Dad,” luxh ditu gun nani rniä guntu? ⁴⁷ Guiniä lojtu chuni'c najc si'c bejn̄ ni riääd loä, rucuardiajgni xtidxä luxh rusoobni xtidxä. ⁴⁸ Najcni si'c te bejn̄ ni benchee rolijzni, ganid gudäänni jiät, dxejcti bejn̄ni cimient yejc te guilaj. Cheni biäjt nisro ro' gueuu, bidiñ nisro cuä' yu'ga, luxh nicla nusniibnini, sa'csi yu'ga sobgadzu'tz yejc te guilaj. ⁴⁹ Niluxh reni rcuardiajg xtidxä, dxejc direni guzoob xtidxä, najcni si'c te bejn̄ ni bejn̄ xyu'ni loj yujxh, dini niujñ cimient xten yu'ga. Dxejcti biäjt nisro, bidiñni cuä' yu'ga, dxejc li gurebä'n yu'ga, gunitloj-tini.

7

*Basiajc Jesús xmos te beṇ roman ni rnibee
(Mt. 8:5-13)*

¹ Che gulujx gunii Jesús loj rebejn, huijni te guejdx ni laa Capernaum. ² Ro'c yu' te beṇ roman ni rnibee, yu' te mos lojni, luxh sanälazduxhni mosga. Cayacxhuduxh mosga, ameerli guetni. ³ Che biejn diajg capitán cagusä'treni Jesús, baxhalgajcni gaii bengool lo rexpejn Israel te chagajreni Jesús jiädni te gusiajcnini xmos dade'ga. ⁴ Che gubigreni loj Jesús, gusloj gunabduxhreni lojni, räjpreni lojni:

—Dade're najc bensa'c, nungäjl gacnäjluni ⁵ sa'csi sanälajzni lajdx rexpejn Israel, luxh lagajc laani gunibee guc-chee xquidobäznu.

⁶ Dxejcti huinä Jesúsreni. Cheni siädzungajxhreni royu', baxhal capitánga gaii xamiigwni, gäbreni loj Jesús:

—Si'c naj capitán: “Di rlazä gutalä xtzuuunu. ¿Chu narä te jiu'lu rolizä? Xhet sacädi. ⁷ Ni'c dina niapä baloor te lagajc narä niädganä guejblu, sa'csi rajplu yälrnibeduxh niluxh narä rut nacädi. Ni'cni gunibeetis jiajc xmosä, luxh laani siacgajcni. ⁸ Sa'csi narä nacä xmos rebejn ni rnibee, luxh rnibeäza loj resoldaad. Che gäpä lo tejni: Huij rec, rijni; che gäpä loj steeni: Gudaa ree, riädni; che gäpä loj xmosä: Bejn dee, rungajcnini.”

⁹ Che biejn diajg Jesús rediidxre, bidxeloduxhni, gubiréni loj rebejn ni siädnajlni, räjpni lojreni:

—Rniliäpac lojtu, nicla lo rexpejn Israel gajdna guidxälä te bejn ni rililajzduxh si'c ni rililajz capitánre.

¹⁰ Che gubi' rebejn ni huij loj Jesús rolijz capitán, bahuiireni abiajc xmosni.

Baspañsac Jesús xi'n te gunabiuud

¹¹ Neñ redxejga, huij Jesús te guejdx ni laa Naín. Huinäni rexpejn_{pacni} näjza xhidajl bejn ni sana-jlni. ¹² Che bidzujn_{ni} gajxh ro' guejdxga, bahuiini sacua'tzreni te beñgut, te bi'n ni najc xtebtis xi'n te gunabiuud. Xhidalduxh bejn sacua'tzni. ¹³ Che bahuii Jesús loj gunabiuudga, biani nane'ga, räjpni lojni:

—¡Na'c roonlu!

¹⁴ Dxejc gubig Jesús lo rebejn ni sanä beñgutga, dxejc guzudxi reni nuu beñgutga. Dxejc räjp Jesús loj beñgutga:

—¡Bi'n!, narä rniä lojlu; ¡Huistie!

¹⁵ Dxejc huistie beñgutga, sobga'ni guslojni caniini. Dxejc badeed Jesúsni lo xnanni. ¹⁶ Che bahuiireni xhini'c gujc, bidxejbreni, bidxeloduxhreni, guslojreni calä'preni xpala'n Dios, räjpreni:

—Te niguisacduxh ni rnii xtidx Dios abidzujn nez loonu.

Caniizareni:

—Lagajc Guejb Dios abiädhuii rexpejn_{ni}.

¹⁷ Dxejc bire'ch diidx xcuent Jesús guideb nez reguedx Judea näjza guiraa reguejdx ni tre' nejzga.

*Xpejn Juan ni rutiobnis huinabdiidx loj Jesús
(Mt. 11:2-19)*

¹⁸ Rexpejn_{pac} Juan ni rutiobnis bij rediidxga lojni che yu'ni latzguiib. ¹⁹ Dxejc baxhałni gaiireni lo Jesús te sanabdiidxreni: “¿La guliipac najclu Crist ni jiäd o sibäjznu chu stee bejn, ä?” ²⁰ Dxejcti gubig rexpejn Juan loj Jesús, räjpreni:

—Juan ni rutiobnis baxhal nuurnu te guiniabdi-idxnu lojlu: “¿La luj najc Crist ni jiääd o la sibäjznu chu stee bejn?”

²¹ Lagajc dxejc che bidzujñreni, basiajc Jesús xhidajl bejn ni rajc garen-garen yälguidx, ni yu'za reben_{dx}ab lastooreni, basiajczani baloj ni di fii.

²² Dxejcti badzu' Jesús diidxre, räjpni:

—Colchaye'tz lo Juan guiraa ni abahuiitu näjza ni abiejn diajgtu. Colye'tz lojni: “Relotiä'p ruhuisac; reben_{coj} rsiasa'c; reben ni ral guejdx tiejxhni, abiajc tiejxhni; rediagcua't riensac diajgreni; reben_{gut}, agubansacreni; luxh loj reben_{proob} nani cabäjz xcälracnäy Dios riejn diajgreni rsiule' xtidx Dios xcuent xho laa bejn lo dojl. ²³ Chicbaa nani rumbee narä, nani di cuälaz narä.”

²⁴ Cheni sii rexpejn Juan, gusloj Jesús caniini xcuent Juan loj rebejn, räjpni:

—¿Chuni'c huihuiitu nez lo reyubijdz? ¿La te nijt ni rusniib bej, ä? ²⁵ ¿Xhini'c huihuiitu? ¿Te bejn ni sucheduxh, ä? La'tu najntu rebejn ni sucheduxh näjza reni naba_{sa}'c, rolijz rereii yu'reni. ²⁶ ¿Chuxhni'c biriitu huihuiitu? ¿Te niguii ni rnii xtidx Dios, ä? O'n, rniliä lojtu, luxh te ni sacduxhru loj guiraa reniguii ni rnii xtidx Dios.

²⁷ Juan najc niguii ni ruzä't rexquijtz Dios cadro caj scree:

Narä guxhalä te niguii nani guinii xtidxä, te nidni lojlu, te laani guzucheeni xnezyujlu nez lojlu.

²⁸ Rniliäpac, loj guiraa rexingaan regunaa, nicla tejni gajd guiricaj ni najc te ben_{sacduxhru} nez loj Dios si'c najc Juan ni rutiobnis. Niluxh nani guxi-iru sajc lo xcäl_{rnibee} Dios ni jiääd, sajcruni loj Juan.

29 Che biejn diajg rebejn nájza reni rusquijx impuest rextiidxni xcuent Juan, gucbeereni rujn Dios yálguxhtissa'c, sa'csi abatiobnis Juanreni. 30 Niluxh refarisee nájza rebejn ni ruluui leii gulälazreni nani niujn Dios par laareni, sa'csi direni nicäjb nutiobnis Juanreni. 31 Rájpa Jesús lojreni:

—¿Xhocha guiniä najc rebejn nani tre' naj?

32 Najcreni si'c rebiuxbáz nani rguijt nez lo guii cadre rdo', rbedxa'reni loj sa'reni, rniireni: “Bielnu te bizej te guya'tu, niluxh ditu nuya'. Bielzanu te dij ni nabaduxh dxejcti dizatu nioon.”

33 Sa'csi che biäd Juan, dini niauxha't, dizani niä' bin, luxh räjptu: “Yu' bendxab lastooni.”

34 Dxejcti biälä narä, Xi'n Dios ni gujc Niguii, rauä, rä'ä. Dxejc räjptu: “Bahuilaare, dade're rauxha't, rä'zani, najcni xamiigw rebendojl nájza rebejn ni rusquijx reimpuest xten gubier.” 35 Ni'cni xcälhajn Dios huenliisi rienloj loj dzuun ni rujn rebejn ni najn.

Jesús huij rolizj Simón ni najc farisee

36 Dxejc tej refarisee gunii loj Jesús, räjpmi:

—Jiädldu rolizä te guidaunu.

Dxejc huij Jesús rolizjni, ro'c gurejni lo mex.

37 Rbäjz te gunagubejxh lo guejdxga. Che biejn diajgni satajw Jesús rolizj fariseega, bidzunäjni te bo't guidxa se't nejxh, luxh bo'tga najc si'c onix, botsa'cni. 38 Che biu' gunaaga, bidzujjni lo ni' Jesús, guslojni cayoondi. Con nisbee caguiibni ni' Jesús, dxejc caguspjdzni ni'ni con xquidxejcti. Dxejc bachagro'ni ni'ni bazaazani setnejxhga ni'

Jesús. ³⁹ Che bahuii farisee ni gurejdx Jesús roli-jzni, recosre, bejn ni xhigab: “Palga gulii najc niguiire Xi'n Dios, sacbeeni chu najc näjza xho najc gunaare ni cagajn ni'ni, sacbeezani najcni te gunadoj_lduxh.” ⁴⁰ Dxejc gunii Jesús loj fariseega, räjpni:

—Simón, yu' xhi rlazä guiniä lojlu.

Dxejc räjp fariseega lojni:

—Guniini, Dad maestr.

⁴¹ Dxejc räjp Jesús lojni:

—Tio'p bejn nazäb meel lo te bejn ni ruded-laa meel. Tej reni nazäb si'cti gaiigayuu meel. Steeni nazäb si'cti tiubitzuu meel. ⁴² Cheni di niajcdi niguijxreni xti'nreni, basiäl lajzni xti'n guiro'preni. Naj gunii loä, ¿chu tejreni sianälajzru dade'ga, ä?

⁴³ Badzu' Simón diidxre lojni, räjpni:

—Rchaloä bejn ni nazääbru lojni.

Dxejc räjp Jesús:

—Laaca rniilu.

⁴⁴ Dxejc gubiré Jesús, bahuiini loj gunaaga. Dxejc räjpni loj Simón:

—¡Bahuii loj gunaare! Che biu'ä rolijzlu, dilu nuniidx nis te nidiib ni'ä. Per gunaare gudibnäjni ni'ä nisbee ni birii balojni, dxejc baspijdzni ni'ä con xquidxejcni. ⁴⁵ Dilu nuchagro' narä, luxh laani cheli biu'ä ree, gajdni cuääz guchagro'ni ni'ä. ⁴⁶ Dilu nusäl se't yecä, niluxh laani basäl_{ni} se't ni rlianexhduxh ni'ä. ⁴⁷ Ni'cni rniä lojlu, dojl_l xten gunaare, luxh xhidalduxh najcreni, abadzucaj Dios redojl_{ga} sa'csi huenliisi sanälajzni Dios. Luxh rebejn ni rudzucaj Dios guxii xtoj_lreni, guxiiza sanälajzreni Dios.

48 Dxejcti räjpni loj gunaaga:

—Agubicaj rextojllu.

49 Dxejc rebejn ni sobga' lo mex con laani, che biejn diajgreni rediidxre, gusloj canii lo sa'reni, räjpreni:

—¿Chuchani'c najc niguiire, ni'cni rudzucajlini xtojł bejn, ä?

50 Räjp Jesús loj gunaaga:

—Agulaalu lo xtojllu sa'csi ahuililajzlu; huij naj, bascuedxi lajzlu.

8

Regunaa ni gucnäj Jesús

1 Dxejcti gusloj huij Jesús guiraa reguejdx näjza rerench, cagusule'ni xtidx Dios, caguluiini xcuent xcälrnibee Dios loj rebejn. Sanäni rexpejn pacni
2 näjza gatii gunaa ni abasiajcnii, agulääni reben dxab lastooreni, näjza basiajcnii xcälguijdxreni. Tejni laa Marii ni laaza Magdalen, ni gulää Jesús gajdz ben dxab nejn lastooni. 3 Stee gunaa laa Xuan, ni najc chääl Chuza, ni ruhuii xhixten Herodes. Stee gunaa laa Susan. Guyu'za sgatii gunaa. Guiraa reni'c rudeed lagajc xhixtenreni te rio' recos ni rquiinreni.

Xcuent bejn ni rbe'c binij

(Mt. 13:1-9; Mr. 4:1-9)

4 Dxejcti bire' xhidajł bejn lojni ni birii xhidajł reguejdx. Lojreni gunii Jesús con te cuent ni ruluii, räjpni:

5 —Birii te bejn sale'c binij. Cheni cabe'cni binij, yu' binij ni bitejb cuä' nezyuj. Che sadejd rebejn

baläjreni yejc binijga, biäädza remane' ni rutajt xh-aguübaa, gudajwrenini. ⁶ Yu'za lajt bitejb binijga neñ reguij cadro xheti xhidajl yuj. Che gulejn binijga, gubidzgajcni sa'csi xheti xcojp ro'c. ⁷ Yu'za lajt bitejbni nez neñ reyaguejch. Che gulejnni, di reyaguejch nusaan niroob gäjlgä. ⁸ Yu'za lajt bitejb binijga lo yusa'c, ro'c gucduxhni. Cheni guroobni, yu' binijga gujc te gayuu xob loj tejga binij ni gule'c dade'ga.

Che gulujx guniini scree, dxejc guniini dip räjpni:

—Palga sajc gucuadiajgtu rediidxga, colcuadiagsa'cni.

Xhicuent gunii Jesús recuent

(Mt. 13:10-17; Mr. 4:10-12)

⁹ Dxejcti gunabdiidx rexpejn pacni lojni räjpreni:

—¿Xhi säloj cuentre?

¹⁰ Dxejc räjpni lojreni:

—Lojtu ni najc rexpejnä suniidx Dios yälñajn te gacbeetu reyälxhiga'tz xten xcälñibeeni. Loj chutis stee bejn, siniä recuent lojreni te mase cadxelojreni, direni fisa'c, luxh mase cacuadiajgreni, direni gachesa'c.

Rusule' Jesús xcuent ni rbe'c binij

(Mt. 13:18-23; Mr. 4:13-20)

¹¹ Räjpszani:

—Scree säloj cuentre, rebini najc si'c xtidx Dios.

¹² Binij ni biajb lo nezyuj najc si'c rebejn ni rucuardiajg xtidx Dios. Dxejc riääd bendxab, riäddzucajni rediidxga lastooreni te na'c chalilajzreni xtidx Dios, te na'cza laareni lo dojl. ¹³ Binij ni biajb neñ reguij najc si'c rebejn ni rucuardiajg xtidx

Dios, rbaalajzreni; per sa'csi xheti xlobaareni, nälajznu, direni gandzu'tz xtidx Dios, rililajzreni te bo'c, per che rsacsí rebejnreni, rbälazreni xtidx Dios. ¹⁴ Binij ni biajb neñ reyaguejch najc si'c rebejn ni rucuadiajg xtidx Dios, per lał ni sanu-ureni xnejzreni, rijia'nreni lo recos guedxliuj, lo yälñasa'c ni ruhuiireni, näjza rujnreni si'ctis ni rlajz tiejxhreni. Reni'c rujn runijtreni xtidx Dios, ni'cni direni guzoob xtidx Dios, direni chanuu te gunreni xtzunsa'c Dios. ¹⁵ Binij ni riajb lo reyusa'c najc si'c rebejn nani rucuadiajg xtidx Dios, ni rililajz diidxga guideb te lastoya ni najc hueen. Randzu'tzreni xtidx Dios, dxejc rudeedreni te yälñasa'c, nalajznu ruzoobreni xtidx Dios, rujnreni xtzunsa'c Dios.

Xhet yu'di ni naga'tz par tejpas
(Mr. 4:21-25)

¹⁶ Räj pzani:

—Ruti te bejn ni rucuaguuj te bajl dxejc rusäuni te caj yejc bajlga, dizani gusujnini dejtz te loon. Alga rusoobnini neñ candilieer loj te mex te guzanijni guideb neñ yu'ga te reni jiu' fiireni lo bajlga. ¹⁷ Xhet yu'di ni yuchetzu'tzdi ni di guidzujñ dxej guiluini; xhet yu'diza ni naga'tz ñaj ni di guidzujñ dxej gacbee bejnñi.

¹⁸ Ni'cni colcuadiagsa'c diidx; sa'csi guiraa rebejn ni rajp yälñacbee, sajprureni yälñajn. Luxh reni di ninuu nucuadiajg xtidx Dios, lojni sibicaj näj ni abacuadiajgni, ni rchaloni najnñi.

Xnan Jesús con rebejtzni
(Mt. 12:46-50; Mr. 3:31-35)

19 Dxejc bidzujn xnan Jesús nájza rebejtzni cadro suga'ni, niluxh di niajcdi nibigreni lojni sa'csi tre' xhidalduxh bejn ro'c. 20 Dxejcti huisa'n te bejn diidx loj Jesús, rájpmi:

—Xnan guejblu nájza rebejtz guejblu suga' rolá', luxh rlajzreni fiireni lo guejblu.

21 Badzu' Jesús diidxre lojreni, rájpmi:

—Xnaná nájza rebetzá najc rebejn ni rucuadi-ajg, ni ruzoobza xtidx Dios.

Basiacdxi Jesús te beduxh
(Mt. 8:23-27; Mr. 4:35-41)

22 Te dxej biu' Jesús nájza rexpejn pacni neñ te barcw. Dxejc rájpmi lojreni:

—Colcho' stelaad ro' nisre.

Basyu'reni barcw lo nis, sä'tireni. 23 Cheni sadejdreni galäii nisga, gudiejs Jesús neñ barcw. Dxejc gubi' te beduxh lo nisga, luxh sa'csi lacti nadip ro' bejga, gusloj cayu' nis neñ barcw, ameerli jiääz barcwga lo nis. 24 Dxejcti huicuäänreni Jesús, rájpmi lojni:

—¡Mastr! ¡Mastr! ¡Cayääznu lo nis!

Che gubajni, huistiene, dxejc gudidxa'ni lo bejga nájza lo nis ni cayäsjaaa. Dxejc guläjz bejga, guredxiza nisga. 25 Dxejc rájpmi lojreni:

—¿Con xcälirililajztu, ä?

Per laareni bidxejbreni, bidxeloduxhrene, canabdiidxreni lo sa'reni:

—¿Chuni'c najc niguiire te rnibeenei bej nájza nis, luxh rusobdiajg bej nájza nis xtiidxni?

Te beñ Gadara ni guyu' rexsprit bendxab lastooni
(Mt. 8:28-34; Mr. 5:1-20)

²⁶ Bidzujntireni lo yuj xten Gadara ni tre' stelaad ro' nis nez loj reyuj xten Galilee. ²⁷ Cheni biäjt Jesús neñ barcw baläjni lo yuj, gubig te bejn ni siääd guejdxga lojni. Agujc xchej yu' rebendxab neñ lastooni. Dini gacw xhajn, dizani cuääz neñ yu', alga rbäjzni cadro yu' rebaa. ²⁸ Che bahuiini loj Jesús bazuxhijbni nez lojni, guredxa'ni räjpni:

—¿Xhicuent riädchu'lu loonu, luj, Jesús Xi'n Gueb Dios ni rbäjz xhaguibaa? Rniabduxhä lojlu, na'cru gusacsílu nuurnu.

²⁹ Guniini rediidxre sa'csi canibee Jesús guirii rebendxabga neñ lastoo bejnre. Agujc xchero cazob rniaaz rebendxabga bejnnga ruliib rebejn ni'ni, ñaani con cadenguiib te guilibdzu'tzni, te xhet gundini bejn. Niluxh laani rutiugya'ni recaden, dxejc rebendxabga rinärenini nez lo reyubijdz. ³⁰ Jesús gunabdiidx lojni, räjpni:

—¿Chu laalu?

Dxejc badzu'ni diidxre loj Jesús räjpni:

—Legión najc laä.

Si'c guniini sa'csi xhidalduxh najc rebendxab ni yu' neñ lastooni. ³¹ Dxejc gunabduxhrene loj Jesús na'c guxhalsacnireni cadro biriireni. ³² Lagajc dxejc suga' xhidajl cuch cayajwrene guixa' lagajc nejzga lo te bala'. Dxejc gunab rebendxabga loj Jesús te gusaanni jiu'reni neñ recuchga. Che cuäjb Jesús, ³³ birii rebendxabga neñ lastoo dade'ga, biugajcreni neñ recuchga. Che biu'reni neñ recuch, baxun recuchga bitejbreni ro' te bala', dxejc biajbreni lo nis, ro'cti gujtreni.

³⁴ Baxun reni cayajp recuchga che bahuiireni xhini'c gujc ro'c, huisa'nrene diidx lo

rebeṅguejdxga nājza lo rebeṅ rench. ³⁵ Dxejc biādhuui rebejn xhini'c gujc ro'c. Che bidzujṅreni cadro suga' Jesús, bahuiireni loj bejn ni birii beṅdxab lastooni. Sobga'ni cuä' ni' Jesús, najcwni xhajnbi, luxh xhetru rajcdi yejcn; dxejc bidxebduxh rebejnṅga. ³⁶ Sas reni bahuiloj xho gujcn, bijreni diidx xho basiajc Jesús bejn ni guyu' rebeṅdxabre lastooni. ³⁷ Dxejc guiraa rebeṅ Gadara nājza reguejdx ni tre' nejzga, gunabreni jiunejz Jesús ro'c sa'csi cadxebduxhreni. Ni'cni biu' Jesús nen barcw te gubisacni nejz cadro siädni. ³⁸ Dade' ni birii rebeṅdxab lastooni gunabni lo Jesús gusaanni chanajlnini, niluxh Jesús gunibee jia'nni, räjpni lojni:

³⁹ —Gubi' rolijzlu te güilu diidx recosro ni bejn Dios xcuent luj.

Dxejc sääni, batie'chni diidx guideb lo guejdxga xhi bennäj Jesúsni.

Xindxa'p Jairo nājza te gunaa ni gudajn xhajn Jesús

(Mt. 9:18-26; Mr. 5:21-43)

⁴⁰ Che gubi' Jesús stelaad nis, bibalajz rebejn gubi'ni, sa'csi cabäjzpacreni guibisacni. ⁴¹ Dxejc bidzujṅ te bejn ni laa Jairo, ni rnibee te guidobäz, bazuxhijbni nez loj Jesús, gunabni chanänini rolijzni ⁴² sa'csi yu' tejtis xindxa'pni. Yu'ni tzubitio'p ijz, luxh cayacxhuuni, ameerli guetni. Lalsi sää Jesús rolijzni, birinajl xhidalduxh bejnṅni, cataälirenini.

⁴³ Loj rebejnṅga nadxaag te gunaa ni agujc tzubito'p ijz cayacxhuuni, cayajcni yälguidxbäii. Xlia'si abanijtni guiraa xhixtenni cua' renani rujn

remeed. ⁴⁴ Gubig gunaaga dejtz Jesús te gudajnni ro' xhajnbi. Lagajc dxejc biacgajcni.

⁴⁵ Dxejcti gunabdiidx Jesús räjpnı:

—¿Chuni'c najc ni gudajn narä, ä?

Guiraa rebejn räjpnı:

—Dinu gan.

Räjpnı Pedr:

—Mastr, ni yu'lu galäıı reben xhidajl, luxh cagutäälireni luj. ¿Xhicuent rniabdiidxlu: “¿Chu gudajn narä?”

⁴⁶ Räjppac Jesús lojni:

—Yu' chu gudajn narä, sa'csi gucbeä yu' chu basıajc xcälırnıbeä.

⁴⁷ Che gucbee gunaaga anajn Jesús gudajnni xhajnbi, bidxejbni, racsejslıni gubıgnı loj Jesús, bazuxhıjbni lojni. nez loj guiraa rebejn räjpnı xhicuent gudajnni xhajnbi näjza xho biacgajcni.

⁴⁸ Dxejc räjpnı Jesús lojni:

—Huij. Gulecdxılajzlu, xında'pä. Abıajc lu sa'csi huılılajzlu.

⁴⁹ Lałni canıı Jesús sı'c bıdzujn te bejn ni sıääd rolıjz Jairo, ni rnıbee te gıdobaız. Räjpnı loj Jairo:

—Agujt xında'plu. Na'cru gutajllu xtzuun Dad Mastr.

⁵⁰ Che bıejn diajg Jesús redııdxcga, räjpnı loj Jairo:

—Na'c gıdxejblu. Huılılajztıs te jıac xında'plu.

⁵¹ Che bıdzujnırenı rolıjznı, xtebtıs Pedr, Jacoob, Juan näjza xcuzajın dxape'ga bıunäjni nejn yu'ga. Peta rebejn ni sıädnaılnı bıa'nrenı rolä'.

⁵² Cayonduxh guiraa rebejn ni sobga' nejn yu'. Dxejc Jesús räjpnı lojrenı:

—Na'c roontu, gajd dxape're guet, nagayejstısni.

⁵³ Alga baxhiznäjrenini, sa'csi anajñreni agujt dxape'ga. ⁵⁴ Dxejcti gunaaz Jesús ñaa dxape'ga, dip guniini, räjpni lojni:

—¡Dxape', huistie!

⁵⁵ Dxejc gubansac dxape'ga, huistiegajcni. Dxejc gunibee Jesús gudeedreni xhi gauni.

⁵⁶ Bidxeloduxh rexcuzajñni. Per gunibee Jesús na'c güireni diidx xhini'c gujc ro'c.

9

Ruxhal Jesús guitzubitio'p rexpejnpacni (Mt. 10:5-15; Mr. 6:7-13)

¹ Batie' Jesús guitzubitio'p rexpejnpacni te badeedni yälñibee lojreni te cuääreni rebenḁxab lastoo rebejn, nājza te gusiajcreni rebenracxhuu.

² Baxhalñireni te gusule'reni diidx xcüent xcälñibee Dios nājza te gusiajcreni rebenracxhuu.

³ Dxejc räjpni lojreni:

—Xhet chanäditu lo nejz, nicla baston, nicla bols, nicla yätxtiil, nicla meel; na'cza chanätu tio'p xhajbtu; tejtisni chanätu. ⁴ Chutis rolijz bejn cadre guidzujntu, ro'c coljia'n cheni guiriilitu lo guejdxga. ⁵ Palga direni gusaan jiu'tu rolijzreni, che jiunejztu lo guejdxga, colcuijb guxhuj ni'tu si'c te seen direni nililajz xtiidxtu.

⁶ Dxejc biriireni sääreni garen-garen reguejdx, cagusule'reni xtidx Dios, cagusiajczareni rebenracxhuu cadrotis rdzujñreni.

Xho gujt Juan ni rutiobnis (Mt. 14:1-12; Mr. 6:14-29)

⁷ Che biejn diajg Herodes ni rnibee guiraa ni cayujn Jesús, guyu'ni yärsia', dini gan xho gunni

xhigab, sa'csi yu' reni canii laa Juan ni agubaṅsac lo rebeṅgut. ⁸ Sgaiireni canii abaluiloj Elías. Yu'zarení canii pet laa stee niguii ni gunii xtidx Dios galoo ni agubaṅsac. ⁹ Per räjp Herodes:

—Lagajc narä gunibeä biru' yejc Juan ni rutiobnis, ¿chuchani'c najc niguiire ni riejn diagä xhidajl didxro xcuentni?

Dxejc rlaǰzpac Herodes fii lojni.

Bayaan Jesús gaii miḷ bejn

(Mt. 14:13-21; Mr. 6:30-44; Jn. 6:1-14)

¹⁰ Che gubi' rexpejṅpacni, bijreni diidx loj Jesús xhini'c bejnreni. Sas huinä Jesúsreni te lajt cadre ruti bejn, gajxh te guejdx ni laa Betsaida.

¹¹ Che gucbee rebejn caro sääreni, huinajlrenini bidxälrenini. Che siädreni lojni huichaglojnireni, sas gusloj cagusule'ni lojreni xcuent xcälrnibee Dios. Basiajczani rebejn ni cayacxhuu.

¹² Che gusloj cayäz gubijdx, gubig rexpejṅpacni loj Jesús, räjpreni lojni:

—Gojs loj rebejṅre, agojl̄jiireni te chatiilreni xhi gaurení, näjza cadre tedreni guxhijṅ lo rerench, neṅ reguedxbáz, sa'csi ree xhet yu'di.

¹³ Dxejcti räjp Jesús loj rexpejṅpacni:

—¡La'tu colgudeed xhi gaurení!

Dxejc räjpreni lojni:

—Xhet rajpdinu, gaiitis yätxtiil näjza tio'p bäl. Ni'ctis yu' palga dinu chasiiru xhi gau reben xhidajlre.

¹⁴ Luxh najc rebejṅga si'cti gaii miḷ niguii. Dxejc räjp Jesús loj rexpejṅpacni:

—Colyejtz lojreni cuereni xcua-xcuaarení, si'cti tiubitzugajreni te cuaa.

15 Si'c bejnrenini, sas gurej guiraa rebejn̄ga si'c. 16 Dxejc cua' Jesús gaii yätxtiilga näjza tio'p bājlgā, gulāsni lojni xhaguibaa, badeedni xquixtios lo Dios xcuent yälrajwga. Che gulujx badeedni xquixtios gula'ni reyätxtiilga näjza rebājlgā, dx-
ejc sanuutis badeednini loj rexpejn̄pacni te gud-
isrenini loj rebejn̄ga. 17 Guiraa reben̄ xhidaalga
gudajw, gudxaj xque'reni. Dxejcti batojpreni ni
bia'n bachajreni tzubitio'p dxijm̄ yätxtilbiujy näjza
bälbiujy ni bia'n.

Gunii Pedr Jesús najc Crist

(Mt. 16:13-19; Mr. 8:27-29)

18 Te dxej lałni cabedx-canab Jesús lo Dios,
xtebni näjza rexpejn̄pacni, gunabdiidxni lojreni,
räjpn̄i:

—¿Chuni'c rnii rebejn̄ nacä?

19 Dxejc räjpreni lojni:

—Yu'reni rnii najclu Juan ni rutiobnis;
yu'zaren̄i rnii najclu Elías; sgaiireni rnii najclu
stee niguii ni gunii xtidx Dios galoo ni agubaṅsac.

20 Dxejc gunabdiidxni lojreni, räjpn̄i:

—¿La'tu a? ¿Chuni'c rniitu nacä?

Dxejc räjp Pedr lojni:

—Luj najclu Crist Xi'n Dios ni cabäāznu.

Jesús rnixgaa xho guetni

(Mt. 16:20-28; Mr. 8:30–9:1)

21 Dxejc gunibee Jesús lojreni, räjpn̄i:

—Na'c gäbtu si'c lo rebejn̄.

22 Räjpszani lojreni:

—Nanab ted Xi'n Niguii trabajwduxh; reben̄gool
xten guidoo, näjza rebixhojz, näjza rebejn̄ ni ruluii
xleii Moisés sibälazreni narä, naaren̄i dina gacä

Crist ni cabääznu. Sugu'treni narä Xi'n Dios ni gujc Niguui, niluxh sibansacä ni riojñ dxej.

²³ Dxejc räjpni loj guiraareni:

—Palga chu tejtü rlaĵz guirinajl narä, nanab ĵiällajzni xhixtenni, te guixe-guixee guntisni nani gudedä gunni. ²⁴ Sa'csi nani rlaĵz guiniazdzu'tzni xcälñabajñni, sunijtni yälñabajñ lo Dios; luxh nani runijt xcälñabajñni xcuent xtidxä, sica'ni yälñabajñ par teĵpas. ²⁵ Sa'csi ĵxhi gaan gun te bejñ palga xca'ni guideb guedxliuj, luxh gunijtni xcälñabajñni lo Dios? ²⁶ Niluxh nani guituinäj narä näĵza xtidxä, sigajcza narä, Xi'n Dios ni gujc Niguui, situinäázani cheni ĵiälä si'c reii guideb yälrdimbicha' xten Xtaďä näĵza rexanglñi. ²⁷ Guliipac rniä lojtu, yu' gaii reni suga' ree, ni di guet, suhuixgaareni xcälñrnibee Dios.

Bachaa xho rluiloj Jesús

(Mt. 17:1-8; Mr. 9:2-8)

²⁸ Gudeĵdti xhujñ dxej gunii Jesús diidxre, dxejcru huinä Jesús Pedr näĵza Jacob näĵza Juan, huiĵreni ĵiaa yeĵc te dajñ te guredx-gunabni loj Dios. ²⁹ Lañni cabedx-canab Jesús lo Dios, bidxaa xho ruluii lojni; dxeĵc xhajbni gujc nolbäj, rdimbicha'lini. ³⁰ Biricajza tio'p dade' caninäĵrenini. Redade'ga najc to Moisés näĵza Elías. ³¹ Rdimbicha'za redade'ga. Caninäĵreni Jesús xcuent xho guetni guedx Jerusalén. ³² Luxh Pedr näĵza resa'ni guyuduxh bacal loĵreni; che bire'ch bacal loĵreni bahuiireni lo yälrdimbicha' xten Jesús näĵza loj guiro'p redade' ni caninäĵni. ³³ Cheni agoĵl ĵiuneĵz redade'ga loj Jesús, räĵp Pedr loj Jesús:

—Dad, Mastr, huenduxh suga'nu ree. Basaan jiencheenu chon̄ yue', tejni par luj, tejni par Moisés, steeni par Elías.

Luxh di Pedr gaan xhini'c caniini. ³⁴ Lałni caniini si'c, bire' te za gusloj cayäjt yejcreni, dxejc bidxejbreni che biu'reni neñ zaga. ³⁵ Dxejcti biejn diajgreni neñ zaga te xse' te ni gunii, räjpni:

—Dee najc Xi'nä ni sanälazä, colcuadiajg xtiidxni.

³⁶ Che gulujx guniini rediidxga, bahuiireni sugaxteb Jesús. Dxejc niäutis ro'reni neñ redxejga, rut lojdi bijreni diidx xcuent ni bahuiireni ro'c.

*Basiajc Jesús te biuux ni guyu' beñxab lastooni
(Mt. 17:14-21; Mr. 9:14-29)*

³⁷ Barayääl cheni biäjtreni yejc dajnga, xhidalduxh bejn cabäz Jesús. ³⁸ Dxejcti te dade' ni nadxaag rebejn̄ga guredxa'ni, räjpni loj Jesús:

—Mastr, balaslajz narä, gudahuii xi'nä, sa'csi xtebtisni najcni xinganä. ³⁹ Luxh beñxab rni-aazni, sas ruscuedxa'nini, rajcni si'c yälguidxbej, rbääni bitzun̄ ro'ni, rusacsíduxhnini, luxh dini gusaanni. ⁴⁰ Agunabä loj rexpejn̄paclu nibääreni beñxabga, luxh di niajcdini.

⁴¹ Dxejc badzu' Jesús diidxre, räjpni:

—¡Bejn̄ ni di chalilajz, benguijdx! ¿Gucli chunäätu, gucli gunä huant la'tu? ¡Gudanä xi'nlu ree!

⁴² Dxejc che cabig biuuxga lojni, basälta' beñxabga biuuxga lo yuj, sas gusloj cayajcni si'c yälguidxbeduxh. Dxejc gudidxa' Jesús loj beñxabga, basiacgajcni biuuxga, dxejc badeednini lo xtadni.

⁴³ Guiraa rebejn̄ bidxeloduxh yälrnibeduxh xten Dios.

Rnii Jesús stehuält xho guetni

(Mt. 17:22-23; Mr. 9:30-32)

Lalni cadxeloj rebejn lo recos ni bejn Jesús, räjpni loj rexpejnpacni:

⁴⁴—Colcuadiajgsa'c rediidxre, na'cza jiällajztureni, sa'csi sutedreni narä Xi'n Dios ni gujc Niguii ladznaa rebejn.

⁴⁵ Niluxh di rexpejnpacni niacbee xhi säloj rex-tiidxni, sa'csi Dios bacua'tznini lojreni te di ni-acbeerenini. Bidxejbzareni niniabdiidxreni loj Jesús xhi säloj rediidxga.

Chuni'c sajcru

(Mt. 18:1-5; Mr. 9:33-37)

⁴⁶ Guslojza rexpejn Jesús canabdiidx lo sa'reni:

—¿Chuchani'c sajcru loonu?

⁴⁷ Per gucbee Jesús xhi xhigab cayujnreni. Dxejc cua'ni te biuxbäz, bazujnini cuä'ni, ⁴⁸ räjpni lojreni:

—Chutis ni xca' te biuxe' sa'csi sanälajzni narä, naräni rca'ni luxh ni rca' narä, rca'ni xtadä ni baxhal narä. Ni najc maazru nadolajz lojtu, ni'c najc ni sajcru.

Nani di guiniyaj nuurnu, xladnu yu'ni

(Mr. 9:38-40)

⁴⁹ Dxejc räjp Juan loj Jesús:

—Mastr, bihuiinu loj te bejn ni rbää rexpendxab neñ lastoo bejn con xcälrnibee lajlu. Dxejc rie'tznu lojni na'cru gunni si'c, sa'csi dini sanäj nuurnu.

⁵⁰ Dxejc räjp Jesús lojreni:

—Na'c gudxojtuni, sa'csi nani di guiniyaj nuurnu, xlaadnu yu'ni.

Jesús gudidxa' loj Jacob näjza Juan

⁵¹ Che siäddzujñ redxej ni chää Jesús xhaguibaa, bejn̄ni xhigab chääpacni guedx Jerusalén. ⁵² Baxhalni gatii bejn̄ gunijd lojni chääreni te guejdx xten Samaria te satiilreni cadro jia'nreni ro'c. ⁵³ Luxh rebejn̄ samaritan̄ di rlajzreni gudedlaareni te lajt cadro jia'nreni, sa'csi najnreni chääreni guedx Jerusalén. ⁵⁴ Che biejn̄ diajg Jacob näj Juan, tio'p xpejn̄pacni, si'c, sas räjpreni loj Jesús:

—Dad, ¿La rlajzlu guinibeenu jiäjt guiboo xhaguibaali te guze'cni guiraa rebenguejdxga si'cni bejn̄ Elías?

⁵⁵ Dxejc bahuii Jesús lojreni, gudidxa'ni lojreni, räjpni:

—Ditu gaan chuni'c rnibee lastootu. ⁵⁶ Sa'csi narä Xi'n Dios ni gujc Niguui dina niälä te gudzucaä xcäl̄nabajñ rebejn̄. Narä biälä te guslääreni lo dojl.

Dxejcti huijreni garenca guejdx.

Reni rlajz nirinajl Jesús

(Mt. 8:19-22)

⁵⁷ Lalni sääreni lo nezyuj, biääd te bejn̄ gunii loj Jesús, räjpni:

—Dad, narä rlazä jiädnalä guejblu cadrotis chää guejblu.

⁵⁸ Dxejc badzu' Jesús diidxre lojni, räjpni:

—Rebäjz rajp xpiliääreni, remane' ni rutajt rajp xpitiääzreni, niluxh narä Xi'n Dios ni gujc Niguui, dina gapä nicla te lajt cadro guscugä yecä.

⁵⁹ Dxejcti räjp Jesús lo stee bejn̄:

—Gudanajl narä.

Luxh laani räjpni:

—Dad, basaan suchacua'tzxaä xtadä, dxej cru jiädna_lä guej_{bl}u.

⁶⁰ Dxej c räjp Jesús lojni:

—Basaan suchacua'tz rebejn ni najc si'c bengut, resabengutreni. Per luj, huij, huisule' diidx xcuent xcäl_rnibee Dios.

⁶¹ Dxej c räjp steeni lojni:

—Dad, rlazä jiädna_lälu, niluxh basanx_gaa chasadidxä resa'ä ni tre' rolizä.

⁶² Dxej c räjp Jesús lojni:

—Nani ruzuj naani yej c garaad, dxej c rudzuré lojni ruhuiini nez dejtzn_i di gacdi gunni dzuun lo xcäl_rnibee Dios.

10

Ruxhal Jesús regayonbitzoo

¹ Che gulujx reni'c, gule Jesús gayonbitzoo bejn, baxhalnireni tio'pgajreni te basnijdnireni lojni loj reguejdx cadre nanab tedni. ² Räjpni lojreni:

—Guliipacni, cayacduxh cose'ch, niluxh guxii najc rebejn ni gun dzuun gutie'nini. Ni'cni colguiniab lo baxhuaan xten cose'ch te guxhalni xhidajlru bejn ni gun dzuun gutie' xcose'chni.

³ Colchäy la'tu; colhuii xho ruxhalä la'tu si'c xiil galäii recuyo't sa'csi sunnäjreni la'tu si'ctisni rla-jzreni. ⁴ Na'c chanätu ngodx, niclaza guijxh, niclaza xcura'chtu, luxh na'c sudxitu guininäjt_u bejn lo nejz.

⁵ Cheni jiu'tu roliz te bejn, ganiddoo colye'tz: “Sucuedxilajz reni rbäjz ree.” ⁶ Palga najcni te bejn ni rdxag_lajz yäl_rbecdxilajz sia'n xcäl_rbecdxilajz_tu ro'c, luxh palga dini gac, sibi' xcäl_rbecdxilajz_tu lojtu. ⁷ Coljia'n lagajc roliz bejn cadre guidzujntu. Ro'c coltajw, colyä'za xhitis ni

guniidxreni, sa'csi nani rujn dzuun, riäjł xca'ni xcuent dzuunga. Coljia'n tejtis lajt dxejtis ni chutu lo guejdxga. ⁸ Xhitis te guejdx ni jiu'tu, palga jiureni la'tu, colgajw xhitis ni guniidxreni lojtu. ⁹ Colgusiajc rebenracxhuu ni yu' ro'c, colye'tz lojreni: “Abidzujngajxh xcälrnibee Dios.” ¹⁰ Palga jiu'tu te guejdx cadre di rlajzreni gucuadiajgreni xtiidxtu, colrii lo nezyuj, ro'c colye'tz lojreni: ¹¹ “Guxhuj xten lajdxtu ni rcaj ni'nu, rudzu'nuni nez lojtu si'c te seen sa'csi ditu nililajz xtiidxnu. Colgabee dee, abidzujngajxh xcälrnibee Dios lojtu.” ¹² Ni'cni rniliäpac lojtu, che gac fis xten Dios, nalasru gac fis xten Dios lo guejdxga loj ni gujc guedx Sodoma ni guyu' galoo.

*Reguejdx ni di niu xtidx Jesucrist
(Mt. 11:20-24)*

¹³ Räjpzani:

—jProbe'tu ben guedx Corazín! jProbe'zatu ben guedx Betsaida! Paru nuhiii rebenzijt ni gubajñ guedx Tiro näjza Sidón remilaagwr ni benä nez lojtu, pet gucli nusiechlajzreni, niajcwreni ladnagas, nibejzarenı lo cobdäj si'c te seen abasiechla-jzreni. ¹⁴ Che gun Dios fis rextojł rebejñ guedxliuj, guxiiru gac xfis Dios lo rebenzijt ni gubajñ guedx Tiro näjza Sidón. Fisroru gun Dios reguedx Corazín näjza Betsaida. ¹⁵ Luxh luj guedx Capernaum, rchalolu siäjslu xhaguibaa, alga siajblu gabijlli, cadre gaclu fisro xten Dios.

¹⁶ Räjpzani lo rexpejñpacni:

—Ni riu xtiidxtu, laa xtidxä ni riuni. Nani di jiu xtiidxtu, laa xtidxä ni dini jiu. Luxh ni di jiu xtidxä, laa xtiidx ni baxhal narä ni dini jiu.

Rbi' regayonbitzuu

¹⁷ Che gubi' regayonbitzuu bejn nani baxhal Jesús, rbaduxh lajzreni, räjpreni:

—Dad, näjza reben_udxab rusobdiajg xtiidxnu che rusä'tnu lajlu.

¹⁸ Räjp Jesús lojreni:

—O'n. Ni'cni narä bahuiä che gunijt xcäl_urnibee ben_udxab, bitejbni xhaguibaa si'c bianij xten guzii.

¹⁹ Colgacbee. Narä runidxä yäl_urnibee lojtu te gulä_ujtuyejc bäl näjza yejc naxejb; runidxäza yäl_urnibee te guntu gaan lo xcäl_urnibee ben_udxab. Xhetliidi gun daan la'tu. ²⁰ Na'c guibalajztistu sa'csi rusobdiajg reben_udxab xtiidx_utu; colguibalajzru sa'csi acuj lajtu lo xquijtz Dios xhaguibaa.

Bibalajz Jesús

(Mt. 11:25-27; 13:16-17)

²¹ Lagajc dxejc bibalaznäj Jesús Sprit Dxan xten Dios, dxejc räjpni lo Dios:

—Rliä'pä xpala'nlu Xtadä ni rnibee xhaguibaa näjza guedxliuj, sa'csi bacua'tzlu xnezyujlu lo reben_u nanduxh, per baluiilu xnezyujlu loj rebejn ni najc nadolajz si'c te biuxbäz. O'n, Xtadä, sa'csi si'c r_ulajzlu gunlu.

²² 'Guiraa recosre abaniid_uxlu loä Xtadä. Da_udtis najn chuni'c najc Xi'nni, rutru najndi chu najcni. Rutza najndi chuni'c najc Guejblu Xtadä, xtebtis narä ni najc Xi'nlu, con rebejn ni r_ulazä gumbee luj.

²³ Dxejc bahuii Jesús loj rexpejn_upacni, räjpni lojtisreni:

—Chicbaa la'tu näjza renani ruhuii guiraa nani cahuilojtu. ²⁴ Sa'csi rniliä lojtu, balti redade' ni gunii xtidx Dios galoo, baltiza rereii r_ulajz nuhuiireni

guiraa ni cahuilojtu, niluxh direni nuhuiini. Rlajzreni niejn diajgreni rediidxre ni cayejn diajgtu, luxh di diajgreni niejnni.

Xcuent te beñhuen ni siääd Samaria

²⁵ Dxejc huisulii te maestr xten leii, huininäjni Jesús, rlajzni nuxhiidni Jesús lo xtiidxni, gunabdiidxni lojni:

—Dad, Mastr, ¿xhini'c nanab gunä te guibaññää Dios par tejpas?

²⁶ Sas räjp Jesús lojni:

—¿Xhini'c caj lo guiitz xten leii? ¿Xho rolluni?

²⁷ Dxejc badzu'ni diidxre, räjpni:

—Chanälajzlu Dad, Xtioslu guideb lastoolu, guideb xaimlu, guideb xtijplu, näjza guideb xcäriejnlu. Huinäälajzza resa'lu si'ctis ni sanälajzlu lagajc luj.

²⁸ Dxejc räjp Jesús lojni:

—O'n, laaca rudzu'lu diidx. Palga gunlu si'c, sajplu yälñabajñre.

²⁹ Per maestr xten leii, rlajzni nidedbiani ni'cni gunabdiidxni loj Jesús räjpni:

—¿Chuni'c najc resa'ä?

³⁰ Dxejc räjp Jesús lojni:

—Te beñ laadxnu birii guedx Jerusalén, sääni guedx Jericó. Dxejc lo nezyuj biricaj gaii gubaan, gulajñreni guiraa xhixtenni, näjli xhajbni ni najcwni. Sas gudijnrenini, basa'nrenini ro'c, guxii cayäädx nugu'trenini. ³¹ Gudejd te bixhojz ni siääd laadxnu, sazaj lagajc nezyujga, cheni bahuiini lojni, alga gudejdni stee laad, sä'tini. ³² Gudejdza te levita, bejn ni rujnza dzuun neñ guidoo.

Che bidzujñni cadro naga' bejn̄ga, gudejdni ste-laad, sä'tini. ³³ Dxejcti te beñ Samaria, lañni sääni biaj, gudejdni nezyujga, bidzujñni cadro naga' bejn̄ga. Che bahuiini lojni, balaslajznini. ³⁴ Gubigni loj bejn̄ga, basäl̄ni se't näjza bin loj bejn̄ni nadxäl̄guijdx, dxejc batejbnini te la' lajd. Dxejc bascuijbnini dejtz lagajc xmanni, huinänini cadro rudedlaareni yu', ro'c cuanäjnini. ³⁵ Che bara yääl, gulääni tio'p meel badeedni lo baxhuaan yu'ga. Dxejc räjpni: “Cuanälaa bejn̄re; palga gunijtrulu, siguixätini lojlu che guibi'ä.”

Sä'tini.

³⁶ Dxejc räjp Jesús lo mastr xten leii:

—¿Chu tej lo guidxon̄ rebejn̄ga najc si'c sa' xten dade' ni biajb ladzn̄aa gubaan?

³⁷ Dxejc räjpni loj Jesús:

—Ni balaslajz bejn̄ga.

Dxejc räjp Jesús lojni:

—Huij te sigajcza chayejnlu.

Bidzujñ Jesús roliz Mart näjza Marii

³⁸ Lañni huinuu xnezyujni, bidzujñni te guejdx. Ro'c bidxaagni te gunaa ni laa Mart ni huinänini rolizni. ³⁹ Yu' te bäj̄l Mart ni laa Marii, luxh laani gurejni cuä' ni' Jesús te cacuadiajgni xti-idxni. ⁴⁰ Mart cagusquejñni cayujñni xhi gaureni. Sas gubigni loj Jesús, räjpni lojni:

—¿La dilu jiu rusanxteb bälä narä te xtebä cayunä remandaad? ¿Gojs lojni gacnäjni narä!

⁴¹ Dxejc räjp Jesús lojni:

—Mart, Mart, cayuduxhlu yärsia', riulu xhidajl cos, ⁴² luxh yu' tejtis ni nanabpac. Agule Marii ni najc huenru, rut sajcdi gudzucajnini lojni.

11

Rului Jesús xho guiniabni lo Dios

(Mt. 6:9-15; 7:7-11)

¹ Te huält cabedx-canab Jesús loj Xtadni Dios, suga'ni te lajt. Che gulujx cabedx-canabni, gunii te xpejnꝑacni lojni, räjpni:

—Dad, baluii nurnu xho cuedx-guiniabnu lo Dios, si'c baluii Juan ni batiobnis rexpejnꝑacni.

² Dxejc räjp Jesús lojreni:

—Che cuedx-guiniabtu lo Dios, scree colnii: Xtadnu ni yu' xhaguibaa, suchä'p xpala'nlu, sujiääd xcälꝛnibeelu. Sugac si'ctisni rlajzlu gac lo guedxliuj si'cpac rajcni xhaguibaa.

³ Guira dxej baniidx xcu'nnu si'ctis ni rquiinnuni.

⁴ Basiäjł lajzlu redojl xtennu si'cni riäjł lajznu redojl ni rujn rebejn loonu.

Na'c gusaanlu jiajbnu lo xcälꝛnibee bendxab.

Basłaa nuurnu lo dojl.

⁵ Dxejc räjpza Jesús lojreni:

—Paru tejtü yu' te xamiigwni, luxh guidzujꝑni rolizni garol yääl, gäbni: “Xamigwä, banidxlaa choꝑ yätxtiil, ⁶ sa'csi bidzujꝑ te xamigwä rolizä ni bazaj biał, luxh xhet ra'pädi te gudedä xhi gauni.”

⁷ Xhixh sinii ni naga' neꝑ xyu'ni, gäbni: “Na'c riädte'chlu bacal loä. Niäu rolä' luxh rexi'nä naga' cuä'ä, digacdi chästieä te gunidxä xhi gunidxä lojlu.” ⁸ Rniliä lojtu, mase dini chastie te gudeednini sa'csi najcni xamiigwni, sistieni, sudeedni nani rquiintisni te na'cru gutie'chni bacalni. ⁹ Sigajcza rniä lojtu, palga guiniabtu xhi guiniabtu, sica'tuni. Palga chatiiltu xhi chatiiltu, sidxältuni. Palga

chasejztu rolä', suxhalreni rolä' lojtu. ¹⁰ Sa'csi chutis ni rniab, rca'ni nani rniabni; chutis ni rguuil xhi cos, rdxälnini; nani rusejz rolä', suxhalzareni lojni.

¹¹ 'Paru tejtü ni najc dad, jääd te xi'ntu guiniabni te yäxtiil lojtu, ¿la sudeedtu te guij, ä? O palga guiniabni te bäl, ¿la sudeedtu te bäl, ä? ¹² O palga guiniabni te tzutbejt, ¿la sudeedtu te naxejb, ä? ¹³ Palga la'tu, ni najc beñdojl, rajc rudeedtu cossa'c loj rexi'ntu, aticaxh Dios ni yu' xhaguibaa sudeedni Sprit Dxan xtenni loj renani rniabni lojni.

Rucuaquijreni Jesús, rniireni rajpni yälrnibee xten beñdxab

(Mt. 12:22-30; Mr. 3:19-27)

¹⁴ Gulää Jesús te beñdxabgop lastoo te bejn. Che birii beñdxabga lastoo bejnga, guslogajc canii bejnga, dxejc bidxeloduxh reben xhidaalga.

¹⁵ Dxejc yu' reni räjp:

—Niguiire rbää rebeñdxab con yälrnibee xten Beelzebú ni rnibee loj rebeñdxab.

¹⁶ Sgaiireni rlanj guquiilrenini, ni'c canabreni gunni te seen ni siäd xhaguibaali. ¹⁷ Niluxh laani gucheeni xhi xhigab cayujnreni dxejc räjpni lojreni:

—Xhitis gubieer ni rlia' sa'ni lo sa'ni, luxh tilnäj te cuaani stee cuaaga, di gaclaa sinijt gubierga lo guedxliuj. Palga te famil rdilnäj lagajc sa'ni, di gaclaa sinitloj familga. ¹⁸ Palga guiliä' sa' rebeñdxab, ¿xho mood chanuu xcälrnibeereni? Dee rniä sa'csi la'tu rniitu narä rbää rebeñdxab con lagajc yälrnibee xten Beelzebú. ¹⁹ Palga si'c najcni,

¿chuni'c rudeed yälrnibee loj rexpejntu te rbääreni beñdxab? Lagajc laareni ruluui xhet laadi rujntu xhigab. ²⁰ Palga narä rbää rebendxab con xcälrnibee Dios, ni'cni ruluiloj abidzujñ xcälrnibee Dios lojtu.

²¹ 'Cheni suga' te beñdaan, ca'ni guiib, canäjni rolizjni, rutliidi ruhualdi rehxixtenni. ²² Niluxh che jiaäd stee ni nadipru lo beñdaanga, rudxagdiñnini, rujjni gaanni, dxejc rudzucajni xquiibni ni badeed yälbeñdaan lojni, dxejc sajc chanäni guiraa rehxixtenni. ²³ Reni xhet yu'di xladä, rdxe'chreni loä. Ni di gutopnäjä narä, rutie'chni.

²⁴ Räjpzani:

—Cheni rii te beñdxab nen lastoo te bejñ, ricansajni nez lo reyubijdz, caguiilni cadro gusilajjni. Che cad rdxäldini, rujjni xhigab, naani: “Guibisacä rolizä cadro biriä.” ²⁵ Cheni guibi'ni, rdxälni lastoo bejñga si'c te yu' ni entis gulujx bilioobni, suchesa'cni. ²⁶ Dxejcti rixiini sgajdz beñdxab ni rujnru latsiaj lojni. Dxejc riu'reni nen lastoo bejñga, dxejc nallasru ria'n bejñga loj ni gujçni galoo.

Chicbaa renani riu xtidx Dios

²⁷ Lañ ni canii Jesús rediidxre, te nane' ni yu' lo rebeñ xhidaalga dipli guniini, räjçni:

—¡Chicbaa nan ni biädñälu guedxliuj! Chicbaaza nani basläa luj.

²⁸ Luxh laani räjçni:

—Xhet si'c di najçni; chicbaaru rebejñ ni rucua diaj xtidx Dios, ni ruzoobza xtiidxni.

Rebeñguijdx rniab te milagwr si'c te seen
(Mt. 12:38-42; Mr. 8:12)

²⁹ Sanuutis cadoj_p rebejn_p gabi Jesús, dxejc guslojni caniini, räjpni:

—Rebejn_p ni yu' naj_p be_nguidxduxh_{re}ni, rniabzareni te milaagwr si'c te seen; niluxh xhetru seendi fiireni, seentis xten Jonás, dade' ni gunii xtidx Dios galoo fiireni. ³⁰ Lagajc si'c ni gujc Jonás te seen loj rebejn_p guedx Nínive, si'cza narä, Xi'n Dios ni gujc Niguii, gacä te seen lo rebejn_p ni nabajn_p naj_p. ³¹ Cheni guidzuj_p dxej ni gac fis sistie te nane' ni gujc rein lo reyuj ni tre' ladbä_jgw, sucuaquijni rebejn_p ni tre' guedxliuj naj_p sa'csi laani biriini zitduxh te bacuadiajgpacni yäl_nnajn xten Salomón. Ree suga' galäiitu tej ni sacduxhru lo Salomón, ³² luxh ditu chalilajz xtiidxni. Rebejn_p ni guläjz guedx Nínive sisiunäj rebejn_p ni nabajn_p naj_p ne_n redxej ni gac fis. Dxejc sucuaquij_{re}ni rebejn_p ni nabajn_p naj_p sa'csi laareni, che huinäli Jonás xtidx Dios loj_{re}ni, basiechlajz_{re}ni, basa'n_{re}ni xtoj_l_{re}ni. Ni suga' lojtu naj_p sajcruni lo Jonás, niluxh ditu jiu xtiidxni.

Ni rusanij xcäriejn bejn
(Mt. 5:15; 6:22-23)

³³ Räjpzani:

—Rut rucuaguijdi te bajl, te gusujnini te lat xhiga'tz, ni claza ne_n te caj. Susujni bajlga jiaa te rajc ruhuisa'c chutis ni riu' ne_n yu'. ³⁴ Balojlu najc si'c bajl xten xcäriejnlu. Palga ruhuisa'c balojlu, guideb xcäriejnlu yu' si'c bianij. Palga rajc balojlu dilu fisa'c, guideb xcäriejnlu yu' si'c lo nacä_j. ³⁵ Gunatiro te di gac xpianijlu yäl_nacä_j. ³⁶ Palga guideb xcäriejnlu yu' bianijtis, xheti te lajt nacä_j,

sajc fisa'clu guira'ti, si'c najc che rusanij te bajl nen yu'.

Rucuaquij Jesús refarisee nájza rebejn ni najn leii (Mt. 23:1-36; Mr. 12:38-40; Lc. 20:45-47)

³⁷ Che gulujx gunii Jesús, biädgajn te farisee Jesús cháani rolijzni te chatajwni. Sä'tireni. Che biu' Jesús, gurejni lo mex. ³⁸ Bidxeloy fariseega sa'csi dini niguiib naani si'cpac caj lo xleii Moisés gunreni te gaureni, sa'csi rujnreni xhigab si'c rac-nayareni lo Dios. ³⁹ Dxejcti räjp Jesús lojni:

—La'tu ni najc refarisee, rguibtu nez dejtz te bas nájza te pla't, niluxh la'tu guidxa lastootu yälgubaan nájza yällatsiaj. ⁴⁰ ¡Ben nadduxh! ¿La ditu gachee? Nani benchee dejtzni, bencheeza nenni. ⁴¹ Colyajc nadolajz, colyacnäj rebejn con ni rniitu, dxejc guiraa recos sajc naya par la'tu.

⁴² ¡Probe'zatu, ben farisee! Rudeedtu lo Dios tej lo tejga tzuu ni rajptu: rudeedtu bedzxtiil nájza ruud, náj guiraa recuane' ni rajptu lo le', niluxh ditu jiu xcälguxhtis Dios nájza xcälrinälaajz Dios. Dee nanab guntu ganid, luxh na'cza gusaantu guntu ni alacayujntu par Dios.

⁴³ ¡Proobza la'tu reben farisee! Rchaglaajztu rbejtu lo reyagxhil xten rebejn ni sajc nen reguidobäz; rchaglaajztu saru rnii rebejn “xchan Dad” lojtu che rijtu lo guii.

⁴⁴ ¡Probe'zatu! La'tu najctu si'c rebaa ni di guzen, rsiaj rebejn yejc cadre naga'reni luxh direni gan.

⁴⁵ Dxejcti badzu' tej rebejn ni ruluii leii diidxre lojni, räjpni:

—Dad mastr, che rniilu rediidxre, rniyajlu nu-urnu.

46 Dxejc räjp Jesús lojreni:

—¡Probe'za la'tu rebejn ni ruluii leii! Sa'csi rnibeetu gun rebejn recos naganduxh ni najc si'c te cargw naduxh ni di gacdi guu bejn. Luxh la'tu di rlanjtu faltuni nicla con te bicueñabäztu.

47 '¡Proobzatu! Sa'csi runcheetu xpaä redade' ni gunii xtidx Dios galoo, luxh najctu rexajg renani bagu't redade'ga. 48 Ni'cni najnpactu xhi gusajczeni, rchaglajzzatu redzuun ni bejn retoxtadgoldootu; si'cza gunnäjtu narä sa'csi laareni bagu'treni redade'ga, dxejc la'tu runcheetu xpaareni.

49 'Ni'cni gunii Dios, sa'csi yuduxh xcälñajnni, räjpni: “Suxhalä reniguii ni guinii xtidxä näjza reapost, luxh sugu'treni gaiireni, susacsízareni sgaiireni.” 50 Loj rebejn ni nabajn ñaj siniab Dios gudeedreni cuent xcuent xtiejn guiraa redade' ni gunii xtidx Dios ni bagu'treni cheni gucheeli guedxliuj. 51 Guislojni xtiejn toAbel, näjza xtiejnli Zacarías ni bagu'treni galäii nez lodxan neñ guidoro. Ni'cni rniä lojtu, siniab Dios cuent xten xcälgujt guiraareni loj rebejn ni nabajn ñaj.

52 '¡Probe'za la'tu, rebejn ni ruluii leii! Sa'csi rniitu la'tistu rajptu yälñajn, luxh di rlanjtu chalilajztu xtidx Dios, dizatu gusaan chalilajz rebejn ni rlanj chalilajz xtidx Dios.

53 Cheni räjp Jesús rediidxre, bidxe'ch rebejn ni ruluii leii näjza refarisee lojni. Dxejc guslojreni canabdiidxreni xhidalduxh diidx, 54 te cagula'tzreni don la sajc guiga'ni lo xhitis te diidx ni guiniini.

12

Jesús ruluii xcuent levaduur

¹ Laḷ ni caniini, bidojp xhidajl miḷ bejn ro'c, calaro'li sa'reni. Dxejc gusloj canixgaa Jesús loj rexpejnḡpacni, räjpni lojreni:

—Colnati levaduur xten refarisee, rusgueereni rniitisreni xhidajl diidx luxh direni gunni. ² Sa'csi xheti xhi niäu lojni ni di guxal lojni luxh xheti xhi naga'tz ni di jienloj. ³ Ni'cni guiraa ni guniitu lo nacäy, sienni lo bianij xten dxej. Luxh ni gunii xhiga'tztu neḡ reyu' ni niäudzu'tz, sixedxa'renini rediidxga yejcli reyu'.

Chuni'c nanab guidxejbtu

(Mt. 10:28-31)

⁴ Räjpzani:

—Rniä lojtu, xamigwä, na'c guidxejbtu rebejn ni sajc ju't tiejxhtu, dxejc xhetru sajcdi gunreni. ⁵ Guiniä lojtu chuni'c nanab guidxejbtu. Colguidxejb nani che abadzucajni yälḡnabajn rajpni yälḡrnibee gusalḡni la'tu gabijl lo bajl ni cayejc par tejpas. Ni'csii colguidxejb.

⁶ 'Anajntu sajc jio' gaii mane' tio'p melbäz, luxh di Dios jiällajz nicla tej remane'ga. ⁷ Rexquidxejctu abigab tebgajni. Na'c guidxejbtu; la'tu sajcrutu loj xhidajl remane'ga.

Reni riembee Jesús nez loj rebejn

(Mt. 10:32-33; 12:32; 10:19-20)

⁸ Räjpzani:

—Rniä lojtu, guiraa rebejn nani rcäjp rililajzni xtidxä nez loj rebejn, narä Xi'n Dios ni gujc Niguii sicäpä najcni xpenä nez loj rexangl Dios. ⁹ Luxh

reni di guicäjp rililajzni xtidxä nez loj rebejn, sigajcza sunnääni nez loj rexangl Dios xhaguibaa.

¹⁰ Chutis ni guinii te didxnaj xcuentä, susiäjlajz Dios laani. Niluxh chutis ni guiniyaj Sprit Dxi xten Dios, di Dios gusiäjlajz xtojlni.

¹¹ Cheni chanäreni la'tu nez loj reben guidobäz o nez loj reguxhtis, na'c guntu xhigab xhi gudzu'tu diidx o xhini'c guiniitu, ¹² sa'csi che guidzujn or ni guiniitu, Sprit Dxi xten Dios suluiini xhini'c guiniitu.

Reyäl'nasa'c rusajb bejn nen dojl

¹³ Te niguii ni nadxaag rebejn xhidaalga räjpni loj Jesús:

—Dad, Mastr, gojs lo betzä guniidxni gala' xhixtenä ni basa'n toxtadnu loonu.

¹⁴ Dxejc räjp Jesús lojni:

—Dade', ¿chuni'c gule narä gunä yäl'guxhtis o gacä abogaad lojlu, ä?

¹⁵ Dxejc räjsac Jesús lojreni:

—Colnatiro, colgantzu' te di rlanjztistu ga'ptu yäl'nasa'ctis sa'csi xcäl'nabajn bejn dini gac yäl'rajptis xhidajl xhi cos.

¹⁶ Dxejcti bij Jesús te cuent, räjpni lojreni:

—Guyu' te ben rapduxh. Racduxh cose'ch lo rexcäjlni. ¹⁷ Dxejcti gusloj bejn xhigab: “¿Xhocha gunä? Dina gapä cadre cucheä recose'ch.” ¹⁸ Sas bejn xhigab: “Ananä xhini'c gunä. Gudzulä reyu' cadre rgucheä recose'ch, te gustiobä reyu'ga, te ro'c cucheä guiraa recose'ch näjza rehxixtenä.”

¹⁹ Dxejcti siniä lo lastoä: “Lastoä, agulucheelu xhidajl xhi cos, sajlni xhidajl ijz. Basilajz naj, gudajw, gu', bibalajz.” ²⁰ Dxejc räjp Dios lojni: “iBen

najd! Lagajc guxhijñre siniabä xaimlu. ¿Dxejca'? ¿Chu xca' guiraa recos ni gulucheelu?" ²¹ Si'c sisiajc guiraa rebejn ni rguiltis xcälñasa'creni lo guedxliujre, niluxh xhet rajpdireni loj Dios.

Rcanäj Dios rexi'nni
(Mt. 6:25-34)

²² Che gojñ stera't, räjp Jesús loj rexpejnñpacni:

—Ni'cni rniä lojtu, na'c rujntu xhigab xcuent xho guibajñtu o xhini'c gautu te guibajñtu, niclaza xcuent lajd ni gacwtu. ²³ Yälñabajñ sajcruni lo yälñajw; tiejxhni sajcruni lo lajd ni rajcw bejn. ²⁴ ¡Colñhuii rebaloo! Direni cue'c binij, dizareni gutojñ cose'ch, dizareni ga'p nicla yu' nicla te cadre chuchee cose'ch, per rudeed Dios xhi rajwreni. ¿La xhet sajcdirutu loj rebalooga, ä? ²⁵ Luxh ¿Chu tejtü palga runduxhni xhigab sajc tiobruni sgarol metr? ²⁶ Palga di gacdi guntu nicla te cosbáz, ¿xhicuent ru'tu yärsia' xcuent xhi stee cos?

²⁷ ¡Colñhuii xho rga' reguino'ch! Direni gun dzuun, dizareni gun lajd lo dzujb, luxh rniä lojtu, nicla rei Salomón con guiraa xcälñasa'cni, dini nisiuchee si'c rsiuchee reguiiga. ²⁸ Palga rusuchee Dios recuaan ni rga' lo niaa, ni rial nadxej, luxh guixee-huijdx, che agubijdzni, rejñni lo däj, aticaxh Dios suniidx xhi gacw la'tu, ¡bejn nani guxii rililajz! ²⁹ Ni'cni rniä na'c runtejtü xhigab xho quiiltu xhini'c gautu, xhini'cza yätu, na'c chutistu yärsia'. ³⁰ Si'ctis rujñ rebenguedxliuj guideb xti-jpreni rguilñreni rexhicosre. Niluxh xtadtü ni yu' xhaguibaa anajñni xhini'c rquiintu. ³¹ La'tu

colquilitis xcäl̄rnibee Dios, dxejcti laani suniidxzani guiraa recos ni rquiintu.

Yäl̄nasa'c ni yu' xhaguibaa
(Mt. 6:19-21)

³² Räj pzani:

—La'tu ni najc rexilä'ä, na'c guidxejbtu, sa'csi rbaali lajz Dios, aguleni la'tu te la'tu guntu yäl̄guxhtis lo xcäl̄rnibeeni. ³³ Colguto' xhixtentu, colgudeedni loj rebejn̄ ni caquinuxhni, te si'c guntu te bols ni di jiuixh, te chu yäl̄nasa'c nen̄ni xhaguibaa cadre di gubaan jiu' niclaza xcabäj rexhicos. ³⁴ Sa'csi cadre rajptu xcäl̄nasa'ctu, ro'cza yu' lastootu.

Nanab susin̄tu

³⁵ Räj pzani:

—¡Col̄susin̄! ¡Col̄hualguij rebajl! ³⁶ Col̄yujn si'c remos ni cabäjz guibi' xlam̄reni ni sää te sa', te cheni guibi'ni guxhalgajcreni rolä'. ³⁷ Chicbaa remos ni susin̄ che guibi' xlam̄reni. Rniliäpac lojtu, la-gajc xlam̄reni sajcwni xhajn̄ni sibe'cni rexmosni lo mex, dxejc lagajc laani sudeedni xhi gaureni. ³⁸ Mase guidzuj̄ni garol yääl, mase guidzuj̄ni cäjyru, palga guidxäl̄ni arexmosni susin̄, ¡chicbaa remosga! ³⁹ Col̄yacbeepac, paru gacbee baxhuaan xten yu' xhi or̄ guidzuj̄n̄ gubaan rolijzn̄i, dini gusaan guxhalreni rolijzn̄i te cuanreni xhixtenni. ⁴⁰ Näjza la'tu col̄susin̄, sa'csi or̄ ni ditu gun xhigab jiäd̄ni, sidzuj̄n̄ Xi'n Dios ni gujc Niguui.

Te mos guijdx
(Mt. 24:45-51)

⁴¹ Dxejc gunabdiidx Pedr lojni, räj pni:

—Dad, ¿la lootisnu rujylu cuentre o la najcni par guiraa rebejn?

⁴² Dxejc räjp Jesús lojreni:

—¿Chuni'c najc mos hueen, mos nasin, ni ru-sannäj xlamni guiraa rexmosni te gudeedni xhi gaureni che gal oor, ä? ⁴³ Chicbaa mosga palga laaca cayujnni che guibi' xlamni. ⁴⁴ Rniliäpac lojtu, lamga sudeed guiraa rexhixtenni te xcanäj mosgani. ⁴⁵ Per palga gun mosga xhigab nen lastooni: “Saclaa guibi' xlamä”, sas guislojni gusacsíni resamosni, gunaa sigajc niguui, dxejc guisloj gauni, yäni, soozni; ⁴⁶ sibi' xlamni te dxej ni xhet cabäjzdinini, or ni dini gun xhigab guidzujnni. Dxejc sii sudeedni te castigwro lojni, sutiäjlni te duu dejtzni dxejc sinibeeni jiini, guidxaagni rebejn ni di gusobdiajg diidx.

⁴⁷ Mosga ni najn xhini'c rlanj xlamni gac, luxh dini susin, dizani guzoob xtiidxni, sutiälduxhrene duu dejtzni. ⁴⁸ Niluxh mos ni di gan xhi rlanj xlamni gac, ni'c rujnni redzuun ni di xlamni guidxaglanj gac, guxiiru castiigw gacni. Reni rca' xhidajl, xhidajlza riäjł gudeedreni; loj reni rca' yälrnibeduxh, xhiroobza siniabni lojni.

Rlia' Jesús bejn lo sa'ni

(Mt. 10:34-36)

⁴⁹ Räjpa Jesús:

—Narä biälä te gucuaguä guedxliujre; jmalaii alagusloj cayejcni! ⁵⁰ Niluxh nanab tedä te yälrobnis ni säloj te trabajwduxh, ni'c cayuduxhä yärsia' cheni chale'lini. ⁵¹ ¿La rujntu xhigab biälä te jiädnää yälrbedxi loj guedxliuj, ä? Rniä lojtu, dini gac si'c. Alga biälä te guilia'ä bejn lo sa'reni.

⁵² Silia' sa' te famil; loj gaiireni, sidxe'ch choṇreni loj tio'preni, luxh tio'preni sidxe'chza lo choṇreni.

⁵³ Silia' sa'reni; sidxe'ch dad lo xingaanni, luxh xingaanga sidxe'chza lo xtadni; nane' sidxe'ch lo xindxa'pni, luxh xindxa'pga sidxe'chzani lo xnanni; nansuegr sidxe'chni lo xculijzni, luxh gulijzga sidxe'ch lo xnansuegrni.

Reseen xten retiemp

(Mt. 16:1-4; Mr. 8:11-13)

⁵⁴ Caniiza Jesús lo reben xhidajlga, räjpni:

—Cheni rhuiitu räjs reza nez lad jiät, rniitu: “Siajb nisguij.” Luxh riajbni. ⁵⁵ Che rbi' bej nez lad danbägw, rniitu: “Sacnalaa nadxej”, luxh si'c rajcni. ⁵⁶ ¡Bejṇ ni rusguee! La'tu racheetu xhi säloj reseen ni rien lo guedxliuj näjza xhaguibaa, ¿xhicuent ditu gan xhi säloj retiemp ni dxunnu ṇaj, ä?

Basiäjḷ diidx con rebejṇ ni rdxe'ch lojlu

(Mt. 5:25-26)

⁵⁷ Räjzani:

—¿Xhicuent ditu quiil lagajc la'tu xhini'c najc hueen, xhini'c najc laaca te guntuni? ⁵⁸ Sa'csi palga yu' chuni'c chale'c xquejlu lo guxhtis, laḷni sanäni luj ro jusgaad, basiäjḷ diidx con laani lo nejz, te na'c chanäni luj lo reguxhtis, sa'csi dxejc reguxhtis suteedreni luj lo reguixhajg te gusäureni luj neṇ latzguiib. ⁵⁹ Luxh rniä lojlu, dilu guirii ro'c hasta gusa'lu quiixlu guiraa lojreni.

13

Colgusiejch lajztu te di guettu

¹ Lagajc dxejc, gubig gaii reni huisa'nreni diidx loj Jesús xcuent gaii ben Galilee ni bagu't Pila't nen guidoo, bagu'chni xtiejnreni con xtiejn reman ni siädnäreni si'c gojn lo Dios. ² Sas räjp Jesús lojreni:

—¿La rujntu xhigab si'c gusajc reben Galileega sa'csi najcrureni bendojl lo rebejn lajdxreni? ³ Narä rniä, dini gac si'c. Palga di'tu gusiechlajz sigajcza sejt guiragajctu. ⁴ O xcuent guitzunchon rebejn nani gujt che gubixh te or ni laa Siloé yejcreni, ¿La rujntu xhigab najcrureni ben dojl lo rebejn ni rbäjz guedx Jerusalén, ä? ⁵ Narä rniä, dini gac si'c. Palga di'tu gusiechlajz, sigajcza sejt guiragajctu.

Xcuent te yag iigw

⁶ Dxejcti gusloj bij Jesús te cuent ni ruluini lojreni, räjpni:

—Te dade' gojp te yagiigw ni basujni lo xyujni. Sas huihuini don la caj ninejxh lojni. Luxh xhet ninejxhdi bidxälni. ⁷ Dxejc räjpni loj bejn ni canäj xyujni, agujc chon ijz siädtilä ninejxh lo yajgre, luxh xhetini. Batin yajgre. ¡Xlia'si sujni lo yuj! ⁸ Luxh xmosni räjp lojni: “Dad, basaanni steb ijz, guslää yuj ni'ni, gusälä abonni. ⁹ Palga xcaj ninejxh lojni steb ijz, laaca, palga dini xcaj, dxejc guitinnuni.”

Rusiajc Jesús te gunaa

¹⁰ Te dxej ni rusilajz rexpejn Israel caguluii Jesús nen te guidobäz. ¹¹ Ro'c suga' te nane' ni agujc tzunchon ijz racxhuuni. Bendxab caguscoodni, niluxh di gacdi suliini. ¹² Che bahuii Jesús lojni, gurejdxnini, dxejc räjp Jesús lojni:

—Gunaa, abasaan yälguijdxga luj.

13 Che basujni naani yejcní, lagajc dxejc gujc gusulii nane'ga. Dxejc guslojni calä'pni xpala'n Dios. 14 Luxh dade' ni rnibee guidobäz bidxe'chni sa'csi basiajc Jesús nane'ga che najcni dxej ni rusilajzreni, ni'c gusloj cayäjpni loj rebejn:

—Xho'p dxej sajc gun bejn dzuun; nen redxejga sajc jäädte te jiajcti, per na'c jäädte dxej ni rusilajz rexpejn Israel.

15 Dxejc badzu' Jesús diidxre, räjpni lojni:

—¡Bejn rusguee! ¿La di chutis tejtú guxhec xconni o xpurni te chanänini yäni nis, mase najcni dxej ni rusilajz bejn, ä? 16 Luxh nane're najc te xagdoo toAbram, nani numbee Dios, ni agujc tzunbichon ijz baliib bejdxabni, ¿la digacdi guixecni lo xcälguijdxni mase najcni dxej ni rusilajz bejn, ä?

17 Che gunii Jesús rediidxre, bianxtujy rebejn ni rdxe'ch loj Jesús, luxh reben xhidaalga cabalazduxhreni sa'csi cayujn Dios redzunro nez lojreni.

Xcuent bedz muxhtas
(Mt. 13:31-32; Mr. 4:30-32)

18 Ni'cni räjp Jesús lojreni:

—¿Xhocha najc xcälrnibee Dios? ¿Xhicha cojn guiniä najcni tebloj? 19 Najcni si'c te bedz muxhtas ni rbe'c te bejn lo xyujni. Luxh che guiroobni, rajcni te yagro. Dxejc riäd remane' ni rutajt siädynchee xpitiääzni loj rexhajcwni.

Xcuent cojb ni rusaguij
(Mt. 13:33)

20 Guniiza Jesús stehuält te gacbeereni xho guire'ch rextidx Dios. Räjpni lojreni:

—¿Xhicha cojn guntebloä xcälrnibee Dios?
 21 Najcni si'c levaduor ni rugu'ch te gunaa lo
 choñ mediid arin, luxh rusaguijni guiraa cojbga.

Dää rolä' cadre jiu'ni xhaguibaa

(Mt. 7:13-14, 21-23)

22 Huinuu Jesús xnejzni sääni guedx Jerusalén.
 Lałni sadejdni reguejdx näjza rerench caguluiini
 rebejn. 23 Dxejc gunabdiidx te bejn lojni, räjpni:

—Dad, ¿la guxii najc rebejn ni całaa loj rex-
 tojlreni, ä?

Dxejc räjpni lojreni:

24 —Dää rolä' cadre jiu' bejn xhaguibaa. Ni'cni
 coltip lajztu te jiu'tu ro'c, sa'csi xhidajl bejn rłajz
 jiu'reni ro'c, niluxh direni gun gaan. 25 Cheni
 abasäu baxhuaan xten yu' rolä', dxejc la'tu ni
 suga' detz yu' guisloj gusejstu rolä', guiniitu: “Dad,
 baxhal-laa rolä'”, dxejc laani sudzu'ni diidx, sini-
 ini: “Dina ganä caro siäädta.” 26 Dxejc guislojtu
 guiniitu: “Bidxunnäänu, bidaunäänu, bidunnäänu
 luj, basedlu nuurnu lo xnezyuunu.” 27 Dxejc
 siniini lojtu: “Rniliä lojtu, dipacnä gumbeä la'tu.
 Coljj guiraatu, beñlatsiaj.” 28 Dxejcti sonduxhtu,
 chubejli läjyту che fiitu abiu' toAbram, con toIsaac,
 con toJacoob, näjza guiraa redade' ni gunii xtidx
 Dios, suga'reni lo xcälrnibee Dios xhaguibaa, luxh
 la'tu di gacdi jiu'tu. 29 Dxejga sidzujñ xhidajl
 beñzijt ni siääd ladjiaa, ladjiat, ladbäjgw, näjza lad-
 bee, te jiu'reni lo xcälrnibee Dios xhaguibaa, ro'c
 sibejzareni lo mex. 30 Luxh yu' reni rujntu xhigab
 guxii sajcreni naj, sacduxhrene dxejc. Yu'za reni
 rchalotu sacduxh naj, xhet sajcdireni dxejc.

*Jesús biin xcuent guedx Jerusalén
(Mt. 23:37-39)*

³¹ Lagajc dxejga, bidzujñ gatii refarisee, räjpreni lojni:

—Huij, biunejz ree, sa'csi Herodes rlajz ju'tlu.

³² Dxejc laani badzu'ni diidxre lojreni, räjpnii:

—Gojz lo bäjzga, beñ rusguee: “¡Bahuii! cabää rebendxab lastoo rebejn, cagusiaca rebejn ni racx-huu nadxej näjza guixee, luxh huijdxli guluxä xtzunä.” ³³ Niluxh mase si'c gacni nanab chanuä xnezyuä nadxej näjza guixee, huijdx, sa'csi di gacdi guet te dade' ni rnii xtidx Dios ste'ca guejdx, guejdx tis Jerusalén sajc guetni.

³⁴ 'iProbe'tu, la'tu beñ Jerusalén! Rugu'ttu redade' ni riädni xtidx Dios lojtu, rucuaazatu guij yejc rebejn ni ruxhañ Dios lojtu. Balti huält rlazä nuchagä sa'tu si'c ruchagsa' te guidco'c rexquidbäzni lajd xhigani, niluxh ditu nicäjp.

³⁵ Bahuii xho bianxteb xquidootu. Ni'cni arnixgää lojtu, dirutu fii loä cheni guidzujñli dxej ni guiniitu loä: “Chicbaa ni siäd xcuent Dios.”

14

Rusiajc Jesús te bejn ni guidxa guij

¹ Che gojl te dxej ni rusilajz rexpejn Israel, huitajw Jesús rolijz tej ni rnibee loj refarisee. Cagula'tz gatii refarisee, guidon xhini'c gun Jesús,

² sa'csi nez loj Jesús suga' te dade' ni guidxa guij tiejxhni. ³ Dxejc gunabdiidx Jesús lo rebejn ni ruluii leii näjza lo refarisee, räjpnii lojreni:

—¿La sajc gusiajcnii te beñracxhuu dxej ni rusilajz bejn o la di gacdini?

4 Per laareni dxitis suga'reni, niäutis ro'reni. Dxejc cua' Jesús beṇracxhuuga, basiajcnini, gu-nibeezani biunejzni. 5 Dxejc räjpni loj refarisee:

—Chu la'tu ni rajp te bur o te gon, palga jiajbni neṇ te bisie, ¿la ditu chalägajcni mase najcni dxej ni rusilajz bejṇ, ä?

6 Dxejc di niajcnini nudzu'reni diidx lojni.

Reni bidon cháä sa'

7 Cheni bahuii Jesús xho rchaglajz rebejṇ rbereni latsa'c te cuereni cuä' rebejṇro, bijni te cuent ni ruluii lojreni, räjpni:

8 —Cheni guidontu cháätu te sa', na'c guntu te cuetu cuä' rebeṇro, te di guidzujṇ te beṇroru lojlu, 9 dxejc jiääd bejṇ ni cayujṇ lanij, naani lojlu: “Badeed cue dade're ro'c.” Dxejc situjylilu chacuelu ste'ca lajt lo le'li. 10 Maazru hueen, cheni guidonlu cháälu te sa', huicue lo mex ni zuj lo le' te che guidzujṇ bejṇ ni cayujṇ lanij, naani lojlu: “Xamigwä, gudaa cuelu neṇ yu' cadre rbej rebeṇro.” Si'c sä'p xpala'nlu nez loj guiraa rebejṇ ni sobganäjlu lo mex. 11 Sa'csi ni rlajz chá'p xpala'nni nez loj rebejṇ, sianxtujyni nez lojreni. Luxh bejṇ ni najc nadolajz, sä'p xpala'nni nez loj guiraa rebejṇ.

12 Räjpszani loj bejṇ ni cagudeed xhi gaureni:

—Cheni gunlu te lanij o guteedlu bejṇ lo xmexlu, na'c cuedxtislu reexamigwlu con rebejtzlu, con resa'lu, niclaza rexpisiṇlu ni najc ri'cw, sa'csi laareni sigajcza sibejdxreni luj che gunreni te lanij, luxh si'c agudijxreni ni badeedlu lojreni. 13 Che gunlu te lanij, alga gurejdx rebeṇproob, rebeṇcoj, näjza rebeṇlotiä'p, 14 dxejcti

sibaa lajzlu sa'csi laareni di gacdi gunidxsacreni ni badeedlu lojreni; luxh si'c siguixsac Dios ni bejnlu che gal dxej ni guibansac rebejn loj rebeņgut.

Xcuent te laniro

¹⁵ Che biejn diajg tej reni sobga' lo mex, rājpni loj Jesús:

—Chicbaa rebejn ni gau yātxtiil cadro rnibee Dios.

¹⁶ Dxejc rājp Jesús lojni:

—Guyu' te dade' ni bejn te laniro rolijzni. Gunibeeni bidon xhidajl bejn te jādtaunājreneni.

¹⁷ Che bidzujn or ni gaureni, baxhal dade'ga te xmosni chatejdxni rebejn ni abidon, rājpni lojreni: “Cołchāj, asuchee lo mex.” ¹⁸ Dxejc guiragajcreni gusloj cayājb di gacdi chāāreni. Tejni rājp: “Entis gusiā te la' yuj, luxh naj nanab chahuiā xho najcni. Goslaa di gacdi jiālā.” ¹⁹ Steeni rājp: “Gusiā gaii nejs gon, luxh nanab chahuiā xho rujnreni dzuun. Goslaa di gacdi jiālā.” ²⁰ Steeni rājp: “Entis bachnaā ni'cni di gacdi jiālā.” ²¹ Che gubi' mosga, badeedni diidx lo xlamni xhi rājp rebejnnga lojni. Dxejc bidxechduxh lamga, rājpni lo xmosni: “Basquejn huij ladnezyuj nājza ladnezyuj dāā, gudanā rebeņproob, rebeņcoj, rebeņlotiā'p, rebeņnatiujnc.” ²² Si'c bejn mosga. Che gubi'ni rājpni lo xlamni: “Dad, abenā si'c ni gunibeelu, luxh lajtru yagxhiil.” ²³ Dxejc rājp lamga lo xmosni: “Huij lo renezyuj ni sii loj reguedxzijit, gudanāj rebejn ni guidxaaglu nejzga, te cha bejn rolizā. ²⁴ Rniliā lojtu, nicla tej reni bidon ganid di gau xhuej nani benā.”

Ni nanab gunni te chanajlɩni Crist

²⁵ Laḷ sasaj Jesús lo nejz, xhidalduxh bejɩ sana-
jlɩni. Dxejc gubiréni, gusloj cayäjpni lojreni:

²⁶ —Palga yu' chu tej ni jiääd loä, ni di cuälaz
xtadni, xnanni, chäälɩni, rexi'nni, rebejtzni, näjza
rebisiajnɩni, nägajcza xcälɩnabajɩni, di gacdi gacni
te rexpenä. ²⁷ Palga yu' chutis tej ni di rlaiz
tedni trabajw te jiädɩnajlɩni narä, di gacdi gacni te
rexpenäpac. ²⁸ Chu tejtɩ ni rlaiz gun te yuro,
ni di gunxgaa xhigab lacti meel chanä yu'ga, te
guidon la sajc guluuxnini. ²⁹ Didi cheni abejɩni
recimient, di gacdi guluuxnini, dxejc guiraa reni
fii lojni suxhiznäjrenini, ³⁰ säjpreni: “¡Bahuilaare!
Bejɩre gusloj bencheeni te yu' per di niajcdi nulu-
uxnini.” ³¹ ¿Chu te reiɩ ni gun xhigab chachagdijlɩni
stee reiɩ, ni di gunxgaa xhigab don laa sajc gunni
gaan con tzuu miḷ soldaad loj stee reiɩ ni siääd con
gajḷ miḷ soldaad, ä? ³² Palga di gacdi gucuanäjnini,
che gacheeni zijtli siääd stee reiiga, suxhalɩni te
xpejɩni chanab yälɩrbedxi lojni. ³³ Ni'cni palga
chutis tejtɩ di gusaan rehxixtɩnni te jiädɩnajlɩni
narä, di gacdi gacni te rexpenäpac.

Che diru sejd gac nadzujy

(Mt. 5:13; Mr. 9:50)

³⁴ Räjpzani:

—Huen najc sejd. Per cheni diruni gac nadzujy,
¿xho gacru gac nadzujyɩni? ³⁵ Xhetru sajcdini,
nicla te chääni loj yuj, niclaza te chääni lo abon.
Gusältis bejɩ sejdga. Reni rlaiz gucuadiajg xtidxä,
sucuadiagsa'creni.

15

Xcuent xiil ni gunijt (Mt. 18:10-14)

¹ Guiraa reni rusquijx impuest nájza rebendojł cabigreni loj Jesús, te cuadiajgreni rextiidxni.

² Refarisee nájza rebejn ni ruluii leii gosloj camojmreni, rájpreni:

—Bejnre rusaan rbig rebendojł lojni, luxh raunájzanireni.

³ Dxejcti bij Jesús cuent ni ruluiire lojreni, rájpreni:

⁴—Chutejtu ni rajp tegayuu xiil, palga chanijtni tejni, ¿la dini gusaan stapbitzuubigaa rexiilni lo niaa te chatiilni xile' ni gunijt, hasta guidxállinini, ä? ⁵ Luxh che guidxálnini sibaduxh lajzni, dxejc sutzuubnini ro xhajcwni. ⁶ Che guidzujñni roli-jzni sutojpní rexamiigwni nájza rexpisinni te gábni lojreni: “Colguibalaznáj narä sa'csi abidxälä xile' ni gunijt.” ⁷ Rniä lojtu, sigajcza su'ru yälrbalajz xhaguibaa xcuent tejtis bejn ni guibig lo Dios ni gusiechlajz xtojłni quela xcuent tapbitzubigaa bejn ni di guiquiin gusiechlazreni xtojłreni.

Xcuent meel ni gunijt

⁸ Rájpzani:

—Sigajcza te gunaa ni rajp tzuu meel, palga chasälñi tejni, ¿la dini gusanij te bajł te gu-loobni nen yu' hasta guidxálnini, ä? ⁹ Luxh che guidxálnini, sutojpní rexamiigwni nájza rexpisinni, säjpní lojreni: “Colguibalaznáj narä sa'csi abidxälä meel ni gunijt.” ¹⁰ Rniäza lojtu, sigajcza sibalajz rexangł Dios xhaguibaa xcuent te bendojł ni rusiechlajzni.

Te bejn ni baxun te xi'nni

¹¹ Dxejc bijza Jesús cuentre lojreni:

—Guyu' te dade' ni yu' tio'p xingaanni. ¹² Dxejc xi'nni ni najc huinruga, räjpni lo xtadni: “Dad, baniidx yálnasa'c nani nungäj̄l xca'a.” Sas badeed xtadni xerensni. ¹³ Di niac̄laa, balsi dxej gudejd, chela bato' xinhuinni guiraa xhixtenni, dxejc sääni, bidzuj̄nni te guedxzij̄t. Ro'c banij̄tni guiraa xmeelni lo recosguij̄dx. ¹⁴ Che abanij̄tni guiraa xhixtenni, biääd te gubinuxh guedxzij̄tga cadro yu'ni. Sas guslojzani calaanni. ¹⁵ Dxejc huitiilni dzuun lo te beñguej̄dxga. Baxhal̄ bejn̄gani te huiga-j̄pni cuch lo xyuj̄ dade'ga. ¹⁶ Luxh calanduxhni bej̄nni xhigab malaii sajc gauni recuaan ni najc si'c lia ni cayajw recuch, niluxh rut badeeddi xhi nia-j̄wni. ¹⁷ Lal̄ ni cadejdni trabajwga, bianij̄ xcäriej̄nni bej̄nni xhigab, naani: “Balti rexmos xtadä rausa'c, ria'nru xhi gaureni. Luxh narä ree calanduxhä, ameerli guetä. ¹⁸ Guibi'älis ladxä, rolijz xtadä, gäpä lojni, Dad, banitä lo Dios näjza lojlu. ¹⁹ Diru nungäj̄l guirilaä xi'nlu. Cua' narä si'c te xmoslu.” ²⁰ Dxejc gunazgajcni nejz te gubi'ni rolijz xtadni.

'Cheni zijtru siäädni, bahuü xtadni lojni. Dxejc balaslajznini, ruxun̄lini, huichaglojnni, sas gudääznini, bachagro'ni lojni. ²¹ Dxejc räjp xi'nni lojni: “Dad, abanitä lo Dios näjza lojlu. Diru nungäj̄l guirilaä xi'nlu.” ²² Per räjp xtadni loj rexmosni: “Coltanä te ladsa'c, colshuajcwnini xi'nä, colgusäl̄ te niil bicueñaani, xcajza te gura'ch ni'ni. ²³ Coltanä te biser̄ ni guro' colgu'tni. ¡Colsquejn te guidaunu, jiennu te lanij! ²⁴ Sa'csi xi'näre abenä xhigab gujtni, luxh ñaj si'cni agubañsacni, gunijtni

niluxh naj abidxäjlni.” Dxejc guslojreni bejnreni te lanij.

²⁵ 'Lal ni cayajc dee, xingangalooni cayujn dzuun lo niaa. Che gubi'ni, siäddzungajxhni rolijzni, che biejn diajgni cayel rolijzni, caguya'zareni. ²⁶ Dxejcti gurejdxni te mos, gunabdiidxni lojni xhi cayajc royu'. ²⁷ Dxejc räjp mosga lojni: “Gubisac bejtzlu, luxh xtadlu gunibee gujt te biser guro' te gac lanij sa'csi nadaanni gubi'ni.” ²⁸ Dxejc bidxe'ch xingangalooni. Naadtini jiu'ni rolijzni. Che gucbee xtadni naadtini jiu'ni, bihiii xtadnini te gunabni jiu'gani. ²⁹ Dxejc räjpni lo xtadni: “iBahuilare! Agujc xchej cayunä dzuun lojlu, luxh rusobdiagä guiraa xtiidxlu, per nicla tej huält gajdlu guniidx nicla te dxibe' loä te gunä te lanij con reexamigwä. ³⁰ Luxh naj ni abidzujn xi'nlure, ni banijt xmeellu con regunadxab, xhoxh bagu'tlu te biser guro' te cayujnlu xlanijni.” ³¹ Dxejc räjp xtadni lojni: “Xi'nä, sugagajclu loä, luxh guiraa ni rapä najc xtenlu. ³² Niluxh naj riäjlpac jiennu lanij, guibalaaznu, sa'csi bejtzlu ni benä xhigab agujt, agubi'ni naj, najcni si'cni gubanšacni; gunijtni, naj abidxäjlni.”

16

Xcuent te ni rnibee loj remos

¹ Dxejc cayujyza Jesús stee cuent loj rexpejnšacni, räjpni:

—Guyu' te benräjp ni guyu' lojni te ni rnibee loj rexmosni. Dxejc biääd reni badeedreni diidx

lojni, räjpreni: “Bejn ni rnibee loj rexmoslu xhetlaadi cayujnni cagunijtni rehxixtenlu.” ² Dxejcti gurejdx xlamnini, räjpni lojni: “¿Xhi dee ni riejn digä caniireni xcuentlu, ä? Naj guniidxlu loä cuent xte xtzuunlu, sa'csi dirulu chanuu guinibeelu lo rexmosä.” ³ Dxejc bejnnga bejn xhigab: “¿Xhichani'c gunä naj ni gudzucaj xlamä dzuun loä? Dina ga'pä yälrstijp te gunä dzuun lo niaa, luxh situjyä chanabä gojn. ⁴ Ananä xhini'c gunä te che dirunä ga'pä dzuun, sibejdx rexamigwä narä rolijzreni.” ⁵ Dxejcti gurejdxni tebgajreni rebejn ni nazäab lo xlamni, dxejc räjpni loj ni bidzunxga: “¿Lac nazääblu lo xlamä?” ⁶ Dxejc räjpni: “Nazäbä si'c te gayuu baril se't.” Dxejc räjpni lojni: “Basquejn, cua' guijtzre, bacuaa tiubitzuutis baril nazääblu lojni.” ⁷ Dxejc gunabdiidxni loj steeni, räjpni: “¿Luj a'? ¿Lac nazääblu lo xlamä?” Dxejc räjpni lojni: “Te gayuu dximro triuu.” Dxejc räjpzani: “Aree xquijtzlu; bacuaa tajtis dximro.” ⁸ Bidxeloj xlamni, gulä'pni xpala'n benguijdxga ni gunibee sa'csi bisinni bejnni recosga. Dxejc räjpza Jesús, rebejn ni di gumbee xtidx Dios nadxällajzreni lo rextzuunreni con sa'reni loj rebejn ni arumbee xtidx Dios.

⁹ Rniä lojtu, colquiil rexamiigwtu con reyäl'nasa'c ni räjpnu loj guedxliujre, te che abaraj xhixtentu, sica' Diostu xhaguibaa cadro yu' rolijztu par tejpas.

¹⁰ Renani runsa'c dzuun lo te dzunbäz, sajca gunsa'cni dzuun lo te dzunro, luxh reni di gacdi gunsa'c dzuun lo te dzunbäz, di gacdiza gunsa'creni dzuun lo te dzunro. ¹¹ Ni'cni palga xhetlaadi cuaräl'näjtü reyäl'nasa'c xten guedxliuj,

ixho guniidx Dios reyäl₁nasa'c xtenni lojtu! ¹² Palga xhetlaadi cuaräl₁näjtu xhixten bejn, ¿chu guniidx lojtu ni gac xtenpactu, ä?

¹³ 'Nicla tej mos di gacdi gunni dzuun lo tio'p lam, sa'csi sidxe'chni lo tejni, steeni sinälajzni o susobdiajgpacni xtidx tejni, sibälazni steeni. Di gacdi gun bejn xtzun Dios la₁ ni sanälajztisni xcäl₁nasa'cni.

¹⁴ Mbaj naj, refarisee, sa'csi rchaglazduxhrene meel, cacuadiagdzu'tzreni xtiidxni, dxejc caguxhisnäjreni Jesús. ¹⁵ Dxejcti räjp Jesús lojreni:

—La'tu najctu bejn ni ruhuii rebejn lojtu, naareni be₁nsacduxhtu, niluxh acanajn Dios xhi xhigab rujntu ne₁n lastootu. Sa'csi guiraa ni rchalojtu najc yäl₁nasacduxh, guiraa ni'c rbixhlajz Diosni.

Xleii Moisés con xcäl₁rnibee Dios

¹⁶ Räjpszani:

—Dxejli ni biääd Juan ni rutiobnis, guyu' xleii Moisés, näjza xtidx redade' ni gunii xtidx Dios. Cheni biääd Juan gusloj rsule' didxsa'c xcuent xcäl₁rnibee Dios, ni'cni xhidajl bejn cagusutijp lajzni te jiu'reni loj yäl₁rnibeega.

¹⁷ Per guyasiru nitloj xhaguibaa näjza guedxliuj quela di jialoj guiralii rediidx ni bacuaa Moisés; nicla tej diidxga di nitloj.

Rului Jesús xcuent ru₁o'n sa' bejn

(Mt. 19:1-12; Mr. 10:1-12)

¹⁸ Räjpszani:

—Palga gu₁o'n te bejn chääl₁ni, dxejc guch₁naani stee gunaa, rujnni dojl, luxh nani ruch₁naa te gunaa ni abar₁o'n chääl₁nini, niguiiga rujnzani dojl.

Te be₁nrajp näjza Lázaro

19 Räjpzani:

—Guyu' te beņrajp ni rchagljaz rajcwni ganax reladsacduxh, luxh guixe-guixee rujnni laniro. ²⁰ Guyu'za te beņproob ni laa Lázaro ni rniab gojn, ricueni ro xlä' beņrajpga, yu' guejdx ni rgaadz tiejxhni. ²¹ Rlajzni maläii xho gunni gauni nani rtejb loj xmex beņrajpga, luxh direni gusaan. Dxejc rebä'cw siääd rilejp loj reguejdx ni rgaadz ni guidxa tiejxhni. ²² Guyu'ti te dxej gujt beņproobga, biädläs rexangl Dios xaimni, huinärenini cadro yu' Abram xhaguibaa. Dxejcti näjza beņrajpga gujt, huicua'tztirenini. ²³ Che yu'ni gabijl cadro rij guiraa rebendojl, ro'c cadejdni trabajwduxh. Dxejcti guläsni lojni, bahuini zitduxh cadro suganäj Abram Lázaro. ²⁴ Dxejcti guredxaduxh beņrajpga, räjpn lo Abram: “iXtadä Abram! Balazlajz narä, baxhal Lázaro guhuajdxni yejc bicuenaani nis te gusiälyujni ludxä, sa'csi ree cadedä trabajwduxh lo guiboo.” ²⁵ Luxh räjpn Abram lojni: “Xi'nä, basaa lajzlu che gubajnl lo guedxliuj gojplu guira'ti xhixtenlu, luxh sigajcza Lázaro gudejdni trabajwduxh. Per naj ree casilajzni, naj luj cadejdlu trabajwduxh. ²⁶ Luxh di gacdi jiääd Lázaro ro'c, sa'csi yu' te baladuxh ni rlia' sa'nu, te mase rlajz bejn guirii ree te tedreni lojlu ro'c, di gacdini. Di gacdiza ted reni yu' ro'c te jiädreni loonu.” ²⁷ Dxejcti räjpn beņrajpga lojni: “Rniabduxhä lojlu, xtadä, baxhallaa Lázaro chääni rolijz xtadä, ²⁸ sa'csi ro'c yu' gaii betzä, te chalijdxni laareni, te gusiechlazreni, te di näjza laareni jiädreni ree cadro rdejd bejn trabajwduxh.” ²⁹ Dxejc räjpn Abram lojni: “Arajpreni gujtz cadro caj xleii Moisés näjza xtidx

redade' ni gunii xtidx Dios, sugusobdiajgreni redi-
idxga.” ³⁰ Luxh beñrajpga badzu' diidxre, räjpni
lojni: “Gulii dad Abram, per palga chäs te bejn
loj rebeñgut, chanii lojreni, dxejc sii pet susiech-
lajzreni.” ³¹ Dxejc räjp Abram lojni: “Palga direni
gusobdiajg xtidx toMoisés näjza xtidx redade' ni
gunii xtidx Dios, dizareni chalilajz xtidx te bejn ni
guibañsac loj rebeñgut.”

17

Riesgw jiajbni lo dojl

(Mt. 18:6-7, 21-22; Mr. 9:42)

¹ Räjp Jesús loj rexpejñpacni:

—Siäädpac recos ni gun jiajb bejn lo dojl.
Proobza bejn ni rujn riajb bejn lo dojl. ² Maaz
guliibni te guij xten molin guejnni, gusal bejn
lo nisdoo cadro jiätro quela gunni jiajb rexi'nä ni
ahuililajz xtidxä. ³ ¡Col̄susin!

'Palga gun bejtzlu dojl lojlu, baliidxni. Palga
gusiechlajzni, basiäj̄l diidx con laani. ⁴ Masque
gajdz huält neñ teb dxej gunni dojl lojlu, palga
jiädniini lojlu gajdz huält, naani: “Xhet laadi benä,
basiäj̄l lajzlu”, basiäj̄l lajz con laani.

Bastioob xcärlililaaznu

⁵ Gunii rexpejñpacni lo Jesús, räjpreni:

—Dad, baniidxru yärlililajz loonu.

⁶ Dxejc räjp Jesús lojreni:

—Palga rajptu yärlililajz, mase najcni si'cti te
bedzbáz xten muxhtas, sajc gäbtu lo yagro rec:
“Biliädxa' ro'c, guzuj galäii nisdoo”, susobdiajg ya-
jgga xtiidxtu.

Ni riäj̄l gun te mos

⁷ Räj pzani:

—¿Chu tejtü ni rajp te mos ni riga'n o ni rigajp rexquidxaani ni gäbni lojni che guibi'ni lo niaa: “Biu'ga, gurej lo mex te gaulu”? ⁸ Dini gäb si'c. Niluxh säjpni lojni: “Bachaa xhajblu. Bejn xhi gauä, gudanäni loä. Che luux gauä, yä'ä, dxejc sajcz gauzalu, yäzalu.” ⁹ Dini gudeed xquixtios lo mosga sa'csi rujnni recos ni gunibeeni sa'csi si'c riäjł gunni. ¹⁰ Sigajcza la'tu, che luux guntu guiraa redzuun ni guniä guntu, riäjł guiniitu lo Dios: “Najcnu mos ni xhet sajcdi, nani riäjł jiennu, ni'ctis biennu.”

Basiajcz Jesús tzuu bejn ni ral tiejxhrene

¹¹ Lał ni sasaj Jesús nez guedx Jerusalén, gudejdni loj región Samaria näjza región Galilee. ¹² Che biu'ni tej reguejdxga, huichagloj Jesús tzuu bejn ni rajc te yälguijdx ni ral tiejxhrene, niluxh zijtru guzujrene. ¹³ Dxejc rbedxa'reni räjpreni:

—Jesús, Dad, Mastr, balaslajz nuurnu.

¹⁴ Che bahuii Jesús lojrene, räjpni lojrene:

—Colchäj, te fii rebixhojz abiajctu.

Lał ni sääreni, bia tiejxhrene. ¹⁵ Dxejc tejrene, che bahuiini abiajčni, gubiguxunni, cabedxa'ni calä'pni xpala'n Dios. ¹⁶ Bazuxhijbni nez loj Jesús, basajbni lojni lo yuj cagudeedni xquixtios loj Jesús. Luxh bejnre najc te beñzajt, te beñ Samaria.

¹⁷ Dxejcti räjp Jesús lojni:

—¿La et tzuudi najc reni biajcz, ä? ¿Con sgaareni?

¹⁸ ¿La rutru gubi'di loä te guiliä'preni xpala'n Dios, xtebtis beñzajt, ä?

¹⁹ Dxejc räjp Jesús loj bejnre:

—¡Huisulii, huij! Abiajclu sa'csi huililajzlu.

Xho guidzujn xcälrnibee Dios
(Mt. 24:23-28, 36-41)

²⁰ Dxejc, sa'csi agunabdiidx refarisee loj Jesús guc guidzujn xcälrnibee Dios, badzu'ni diidxre, räjpni lojreni:

—Di xcälrnibee Dios guidzujn con seen ni sajc fiitu. ²¹ Diza bejn naa: “Bahuii, aniree”, o “Anirec”, sa'csi abidzujn xcälrnibee Dios lojtu.

²² Dxejc räjp Jesús lo rexpejn pacni:

—Sidzujn dxej rlajzgatü fiitu te dxej sa' ni chu che jiädsac Xi'n Dios ni gujc Niguui, luxh ditu fiini.

²³ Luxh siniireni lojtu: “Aniree”, o “Anirec”, per na'c chäätü, na'cza chanajltu reni rihuii. ²⁴ Sa'csi sigajc ni rien che rdinya' te laad xhaguibaa hasta stelaad xhaguibaa, si'cza gac che jiälä narä, Xi'n Dios ni gujc Niguui, che gal dxej guibi'ä. ²⁵ Luxh ganiddoo sidedä trabajwduxh, sa'csi sibälaz reben guedxliuj ni tre' naj narä. ²⁶ Si'cni gujc nen redxey cheni gubajn toNoé, si'cza gac nen redxey che jiälä narä, Xi'n Dios ni gujc Niguui.

²⁷ Nen redxey ni gubajn toNoé gudajwreni, gu'reni, bachnaareni, badeedzareni xindxa'preni guchnaa bejn, bidzujnli dxej cheni biu' toNoé nen barcwro ni bencheeni. Dxejc biäd nsguiduxh, gujt guiraa reben dojl, guzääbreni lo nis. ²⁸ Sigajcza gujc nen redxey ni gubajn toLo't: gudajwreni, gu'reni, gusiireni, bato'reni, gule'creni binij, bencheezareni rolizreni. ²⁹ Niluxh cheni birii Lo't lo guedx Sodoma, biajb guiboo xhaguibaali, näjza te däj ni rudxuii, gunitlojti guiraa rebejn dojl, huejcreni. ³⁰ Sigajcza gac nen redxey cheni jiälä narä, Xi'n Dios ni gujc Niguui.

³¹ 'Dxejga, palga yu' chu niä'p yejc yu', diru galdı jiäjtne te chalääni rehxixtenni ni yuchee neñ yu'; palga yu' chu suga' nezjiät, di galdıruni guibi'ni rolijzni. ³² Colgusnaj lajztu xhi gujc chääł toLo't. ³³ Ni rıajz ga'p xcälñabajñni lo guedxliujre, sunijtnini, nani gunijt xcälñabajñni lo guedxliujre xcuent rextidxä, xcälñabajñni rajpni xhaguibaa.

³⁴ Rniä lojtu, guxhijnga ni jiälä lo tio'p reni naga' lo te da', chää tejni, steeni jia'n. ³⁵ Lo tio'p gunaa ni cayo't, chää tejni, steeni jia'n. ³⁶ Lo tio'p bejn ni yu' lo niaa, chää tejni, steeni jia'n.

³⁷ Che biejn diajgreni rediidxre, gunabdiidxreni lojni, räjpreni:

—Dad, ¿caro gac recosre?

Badzu' Jesús diidxre, räjpni:

—Cadro naga' te mangut, ro'c rdojp regolbetz.

18

Xcuent te gunabiuud con te juejz

¹ Bijza Jesús te cuent ni rulıii lojreni, te guisiee-dreni xho riajl cuedx-guiniabreni lo Dios lacuaa gac-huin lajzreni, ² räjpni lojreni:

—Te guejdx guyu' te juejz ni di chalilajz xtidx Dios, dizani jiu rebejn. ³ Lagajc guejdxga guyu' te gunabiuud. Guixe-guixee rijni lo juejz, rniabni lojni gunni yälğuxhtis lo bejn ni rdxe'ch lojni. ⁴ Balti dxej naadti juejzga gun yälğuxhtisga. Dxejcti bejnıi xhigab, naani: “Mase dina guidxebä Dios, dizana jiuä rebejn, ⁵ sa'csi gunabiuudre sanuutisni siäädni loä, abasiedliini narä, gunälis yälğuxhtis xten gunaaga, te di chanuutis riädğusiedni narä.”

⁶ Dxejc räjp Jesús lojreni:

—Riejn diajgtu xtidx juezguijdxga, ⁷ Naj ¿xho di Dios, ni najc hueen, gucuadiajg xtidx rexi'nni ni rbedx-rniab lojni dxej-yääl? Di gaclaa gunni yälguxhtis xcuent reni aguleni. ⁸ Ni'cni rniä lojtu, sungajcni yälguxhtis par laareni. Luxh che guibi' Xi'n Dios ni gujc Niguii, ¿la sidxälni bejn ni rililajz xtiidxni lo guedxliuj?

Xcuent te farisee con te ni rusquijx impuest

⁹ Bij Jesús stee cuent ni ruluui loj rebejn ni rluiisi najc beṅsa'c, ni rchalo xhet sajcdi resabejnreni. Räjpn:

¹⁰ —Tio'p dade' huij guidoo te huinabreni lo Dios. Tej ni najc farisee, steega najc te dade' ni rusquijx impuest. ¹¹ Sulii fariseega laḷ ni canabni lo Dios, räjpn: “Dad, Dios, runidxä xquixtios lojlu sa'csi dina gacä si'c najc rebejn ni najc gubaan, ni najc beṅ nadiplajz, ni najc beṅdojḷ, dizana gacä si'c najc beṅre ni rusquijx impuest. ¹² Rucua'nä tio'p huält neṅ te xmaan, luxh rudedä te tzuu lo te beex loj guiraa ni runä gaan.” ¹³ Niluxh bejn ni rusquijx impuest, zijtru suga'ni, dini guiliäs lojni xhaguibaa. Catiälḷnaatisni lastooni, caniini lo Dios, räjpn: “Dad, Dios, ¡balaslajz narä, nacä te beṅdojḷ!” ¹⁴ Rniliäpac lojtu, ni rusquijx impuest rbaali lajzni gubi'ni rolijzni sa'csi badzucaj Dios rextojḷni, niluxh di Dios nudzucaj rextojḷ beṅ farisee. Sa'csi guiraa rebejn ni rlajz guiliä'p lagajc xpala'nni, susanxtiuju Diosreni, dxejc reni di rlajz guiliä'p lagajc xpala'nreni, siliä'p Dios xpala'nreni.

*Benle' Jesús yejc rebiuxbäz
(Mt. 19:13-15; Mr. 10:13-16)*

15 Yu'reni siädinä rexpiuxbäzreni loj Jesús te guzujni ñaani yejcreni. Che bahuii rexpejn̄pacni si'c, gusloj cadildiidxreni con rebejn̄ te na'c jiädnäreni rebiuxe'. 16 Dxejc gurejdx Jesúsreni, räjpni lojreni:

—Colgusaan jiäd rebiuxe' loä, na'c gudxojn̄-
tureni, sa'csi xcäl̄rnibee Dios najc xten reni najc
nadolajz si'c rebiuxbäze're. 17 Rniliäpac lojtu,
chutis ni rlanj̄ jiu' lo xcäl̄rnibee Dios nanab gusob-
diajgreni xtidx Dios si'c rusobdiajg rebiuxe' xtidx
xtadreni. Palga dini gun si'c, dini jiu' lo xcäl̄rnibee
Dios.

Te bi'n ni rajp xhidajl xhixtenni

(Mt. 19:16-30; Mr. 10:17-31)

18 Te bi'n ni rnibee gunabdiidx loj Jesús, räjpni:

—Dad, mastrsa'c, ¿xhini'c nanab gunä te xca'ä
yäl̄nabaj̄n par tejpas?

19 Dxejc räjp Jesús lojni:

—¿Xhicuent rniilu narä: “Mastrsa'c”? Rutru
najcdi beñsa'c, xtebtis Dios. 20 Anajnlu xho
najc remandamient ni caj lo xleii Moisés: “Na'c
guesnäjl̄u gunaa ni di gac chäällu; na'c ju'tlu bejn̄;
na'c cuanlu, na'c guiniilu didx-xhii xcuent bejn̄;
bazoob xtidx xadlu, xnanlu, bahuiizareni.”

21 Dxejc räjp bi'nga lojni:

—Guiraa remandamientre rusobä cheni gucäli
biuux.

22 Che biejn̄ diajg Jesús xtiidxni, räjpni lojni:

—Tejtis cayääd̄x gunlu. Bato' guiraa rehxix-
tenlu, gudisni loj rebejn̄ ni xhet rajpdi dxejc sajplu
xcäl̄nasa'clu xhaguibaa. Dxejc gudanajl narä.

23 Che biejn̄ diajg bi'nga rediidxre, guc-
huinduxh lajzni, sa'csi najcni te bejn̄ ni rapduxh.

24 Dxejc rdxelojtis Jesús lojni, guc-huinza lajzni räjpni:

—Naganduxh jiu' rebenrajp lo xcälrnibee Dios.

25 Guyasiru ted te cameii ni' te guux lo ni jiu' rebenrajp lo xcälrnibee Dios.

26 Reni biejn diajgni rediidxre, räjpreni:

—¿Chuxhni'c sajc laa lo dojl, palga si'c najcni?

27 Dxejc räjp Jesús lojreni:

—Guira'ti ni di gacdi gun rebejn, guyasi rajc rujn Diosni.

28 Dxejc räjp Pedr lojni:

—Dad, nuurnu abasa'nnu guiraa rehxixtenu te siopnalnu luj.

29 Dxejc badzu' Jesús diidxre lojni, räjpni:

—Rniliäpac lojtu, chutis ni gusaan rolijzni näjza rexcuzajnni, rebejtzni, chäälni, xi'nni xcuent xcälrnibee Dios, ³⁰ sica'ni xhiroobru lo guedxliujre, luxh sica'ni yäl_nabaj_n par tejpas.

Rusule' Jesús stehuält xho guetni

(Mt. 20:17-19; Mr. 10:32-34)

³¹ Gurejdx Jesús rexpejn_npacni te laad, te räjpni lojreni:

—Naj chonnu guedx Jerusalén cadre nanab soob rediidx nani bacuaa dade' ni gunii xtidx Dios galooli xcuent Xi'n Dios ni gujc Niguui.

³² Sutedrenini ladz_naa rebenzajt, suxhiznäjrenini, susacsürenini, sutiobxhejnlireni lojni, ³³ luxh che luux quininrenini, dxejc sugu'trenini, luxh ni riojn dxej siba_nsacni loj reben_ngut.

³⁴ Dxejc laareni direni niacbee rediidxre, dizareni gan xhini'c caniini, sa'csi najcreni diidx ni di gacdi gacheereni.

*Rusiajc Jesús te beṇ lotiä'p
(Mt. 20:29-34; Mr. 10:46-52)*

³⁵ Cheni sadzujṇ Jesús te guejdx ni laa Jericó, sobga' te beṇ lotiä'p ro' nezyuj, canabni gojn. ³⁶ Che biejn diajgni cadejd xhidajl beṇ lo nezyujga, gunabdiidx beṇ lotiä'pga xhini'c cayajc.

³⁷ Dxejc räjpreni:

—Jesús ni siääd Nazare't cadejdni nezga.

³⁸ Dxejc guredxa'ni räjpni:

—¡Jesús, xi'n toDavid, balaslajz narä!

³⁹ Rebejṇ ni nijd lojreni gudilnäjreni beṇ lotiä'pga te jiäu ro'ni, niluxh laani dipru guredxa'ni, räjpni:

—¡Xi'n toDavid, balaslajz narä!

⁴⁰ Dxejc guzudxi Jesús ro'c, gunibeeni jiädnäreni bejṇga lojni. Che bidzujṇni lojni, gunabdiidx Jesús lojni, räjpni:

⁴¹ —¿Xhini'c rlanjzlu gunnäã luj?

Badzu' beṇ lotiä'pga diidxre, räjpni:

—Dad, rlazä jien loä.

⁴² Dxejc räjp Jesús lojni:

—¡Sujien balojlu! Abiajclu sa'csi huililajzlu.

⁴³ Lagajc dxej, biengajc lojni, calä'pni xpala'n Dios, huinajlni Jesús. Luxh guiraa rebejṇ ni bahuii xhi guzajcni, gulä'pzareni xpala'n Dios.

19

Huij Jesús rolijz te bejṇ ni laa Zaqueo

¹ Dxejc biu' Jesús guedx Jericó, sadejdzani guejdxga. ² Ro'c rbäjz te beṇrapduxh, ni laa Zaqueo, ni rnibee lo reni rusquijx xcuent impuest. ³ Rlanjz Zaqueo fiini loj Jesús te gumbeenini, per digacdi fiini lojni sa'csi najcni te beṇxhate', luxh xhidajl

bejn siädsaj guideb gabi Jesús. ⁴ Ni'c baxu_nni gu-nijdni lojreni, huä'pni lo te yajgro ni suga' gajxh nez cadro ted Jesús te si'c sajc fiini loj Jesús. ⁵ Che gudejd Jesús nejzga, guläsni lojni jiaa, bahuini cadro sobga' bejnre. Dxejc räjpni lojni:

—Zaqueo, basquejn biäjt ro'c, lagajc nadxej rlazä chajia'nä rolijzlu.

⁶ Dxejcti biätguxu_n Zaqueo lo yajgga, rbalaz-duxhni huinäni Jesús rolijzni. ⁷ Che bahuui guiraa rebejn xhi gujc, gusloj camojm_nreni, direni jiulajz, räjpreni:

—Jesús sajia'n rolijz te be_ndojl.

⁸ Dxejcti huisulii Zaqueo, räjpni loj Jesús:

—Bahuilaare, Dad, gala' xhixtenä gudedä loj rebe_nproob; luxh palga yu' chu loj cua'ä xhixtenni con yäl_rrusguee, sudzu'ä lojni tajp huält si'cti ni cua'ä.

⁹ Räjp Jesús lojni:

—Lagajc nadxej gubicaj xtojllu näjza xtoj_l reni rbä_jz rolijzlu, sa'csi guliipac najclu te xagdo toAbram. ¹⁰ Pues Xi'n Dios ni gujc Niguui biädtil reb_en_ojl te gus_laani rebej_nga ni gunij_t ne_n dojl.

Xcuent tzuu meel

¹¹ La_l ni cagucua_diajgreni xtidx Jesús, bijzani te cuent ni ruluii, sa'csi asiäddzuj_ngajxhreni guedx Jerusalén, luxh laareni rujnreni xhigab sisloj guinibee Jesús si'ctisni guidzuj_nni guejdxga.

¹² Dxejc räjpni lojreni:

—Guyu' te bejn, be_nrajpni, huijni te guejdx zijtro te gacni rei_i, dxejc guibisacni. ¹³ Che gajdni guirii, gurejdxni tzuu xmosni, te badeedni lo tebgajreni te melpla't ni sacduxh, räjpni lojreni: “Colyujn

dzuun con meelre che guibisacäli.” Sä'tini. ¹⁴ Per reben lajdxni dipacreni guichagljajz bejn̄ga, ni'c baxhalreni gäi bejn̄ te saye'tzreni: “Di rlaizdinu gacni x̄reiinu.” ¹⁵ Luxh empac gujcni reii, dx-
 ejc gubisacni lajdxni. Che bidzuj̄nni gurejdxni rexmosni ni badeedni meel cua'reni, te gacbeeni lac bejn̄ tejgareni gaan. ¹⁶ Ni bidzuj̄n ganid räjpni lojni: “Dad, xmeellu bejn̄ gaan stzuu meel.” ¹⁷ Dxejc räjp̄ reii lojni: “Hueenca, luj najclu te mossac, sa'csi laaca bejn̄lu dzuun lo te dzunbäz, naj sunidxä guinibeelu loj tzuu guejdx.” ¹⁸ Bidzuj̄n stee mos lojni, räjpni: “Dad, xmeellu bejn̄ gaan gäi meel.” ¹⁹ Dxejcti räjpni lojni: “Luj guinibeelu loj gäi guejdx.” ²⁰ Bidzuj̄nti stee mos lojni, räjpni: “Dad, aree xmeellu, guluchedzu'tzäni neñ te baii ²¹ sa'csi bidxebä guejblu, sa'csi najc guejblu te beñ nadiplajz, rutojp̄ guejblu cadro di guejblu nuzuj, luxh rliäs guejblu cose'ch cadro di guejblu nibe'c.” ²² Dxejcti räjp̄ reii lojni: “¡Mosguijdx! lagajc ro'lu birii diidx ni gunälu yälguxhtis. Palga najnlu nacä te beñ nadiplajz, najnlu rutopä cadro dina nusuä, najnlu rliäsä cose'ch cadro dina nibe'cä, ²³ ¿xhicuent dilu nisa'n xmelä neñ te bancw te che nibi'ä nica'a xmelä nägajc xi'n meelga?” ²⁴ Dxejc räjpni loj reni suga' ro'c: “Colgudzucaj meelga lojni, colgudeedni loj ni rajp̄ tzuu meel.” ²⁵ Laareni räjpreni: “Dad, per laani arajpni tzuu meel.” ²⁶ Dxejc badzu' reii diidxre lojreni, räjpni: “Ni'cni rniä, reni rajp, sica'rureni, niluxh reni di ga'p lojreni sibicaj guiraa recosbäz ni rajpreni. ²⁷ Luxh xcuent reni rdxe'ch loä, ni di rlaiz niacä reii lojreni, coltanäreni ree, colgugu'treni nez loä.”

Che biu' Jesús guedx Jerusalén
(Mt. 21:1-11; Mr. 11:1-11; Jn. 12:12-19)

²⁸ Che gulujx guniini guiraa rediidxre, huinuuni xnejzni, sääni nez lo guejdx Jerusalén. ²⁹ Che asadzungajxhni reguejdx ni laa Betfagé nájza Betania, gajxh lo dajn ni laa Oliib, baxhalni tio'p rexpejn_{pacni}, ³⁰ räjpni lojreni:

—Colchäj lo guejdx'e' ni suga' lad rec. Che guidzujntu, guidxältu caduu te bur huin ni gajd bejn cuib. Colguxhecni, coltanäni ree. ³¹ Palga yu' chu guiniabdiidx lojtu: “¿Xhicuent caguxhectuni?” colye'tz lojni: “Dad caquiinnini.”

³² Sä'ti rexpejn_{pacni} nani baxhalni, bidxälreni manga sigajctisni räjp Jesús. ³³ Cheni caguxhecreni bure'ga, rexpaxhuaan bure'ga räjp lojreni:

—¿Xhicuent caguxhectu bure'ga, ä?

³⁴ Dxejc badzu'reni diidxre, räjpreni:

—Sa'csi caquiin Dadni.

³⁵ Sas huinäreni bure'ga loj Jesús, gudixhreni xhajbreni dejtzni, te gubijb Jesúsni. ³⁶ Guideb cadre gudejd Jesús gudixhreni xhajbreni lo nezyuj cadre tedni. ³⁷ Cheni ameer guidzujnni bajaad xten dan Oliib, gusloj cabaa lajz guiraa rebejn, rbedxa'lireni calä'preni xpala'n Dios sa'csi bahuiireni guiraa remilagwr ni bejn. ³⁸ Räjpreni:

Chicbaa rejii ni siääd xcuent Xtadnu Dios te guinibeeni loonu.

Sucuedxilajz guiraa reni yu' guibaa, chä'p xpala'n Dios xhaguibaali.

³⁹ Dxejc gaii refarisee ni suga' galäii rebejn, räjpreni loj Jesús:

—Mastr, gudidxa' lo rebejn ni siädnajllu te na'cru guiniireni si'c.

⁴⁰ Dxejc Jesús räjp lojreni:

—Rniliä lojtu, palga redee gusaü ro'reni, sixedxa' reguijre.

⁴¹ Che bidzujñni gajxh, che bahuiini guedx Jerusalén, biin Jesús xcuent guejdxga, ⁴² räjpni:

—¡Maläii gacheelu, masque neñ redxejre, xhini'c sajc guniidx yälrbexilajz lojlu! Per ñaj naga'tzni, luxh digacdi fiilu lojni. ⁴³ Sidzujñ dxejga lojlu, cheni jiäd reni rdxe'ch lojlu sujñreni si'c te guralyuj guideb gabilu, nez lojlu sigajc nez dejtzlu sisiujreni. ⁴⁴ Susälta'reni luj lo yujli. Sugu'treni rebejn ni rbäjz ro'c, luxh nicla gusaanreni cuib te guij yejc sa'ni sa'csi dilu niembee dxej ni biäd Dios biädhuiilu.

Rusia Jesús neñ guidoro

(Mt. 21:12-17; Mr. 11:15-19; Jn. 2:13-22)

⁴⁵ Dxejcti biu' Jesús neñ guidoro, guslojni cabääni rebejn ni caguto' näjza reni casii. ⁴⁶ Dxejc räjpni lojreni:

—Loj rexquijtz Dios caj rediidxre: “Rolizä sajc te yu' cadre jiädnabtu lo Dios”, niluxh la'tu abejntuni si'c te biliää xte gubaan.

⁴⁷ Guixe-guixee caguliii Jesús neñ guidoro, luxh reni rnibee loj rebixhojz näjza rebejn ni ruliii leii, näjza rebengool xte guejdxga caguiilreni mood te ju'trenini, ⁴⁸ luxh direni nidxäjl xho niujñrenini sa'csi guiraa rebejn cacuadiagdzu'tzreni xtiidxni.

20

Xcäl̄rnibee Jesús

(Mt. 21:23-27; Mr. 11:27-33)

¹ Te dxej suga' Jesús neṅ guidoro, caguluiini rebejṅ, cagusule'zani diidx xcuent xho guibicaj xtojṅreni, che bidzujṅ reni rnibee loj rebixhojz näjza rebejṅ ni ruluii leii näjza rebeṅgool, ² räjpreni lojni:

—¿Xhi yäl̄rnibee rujnlu recosre? ¿Chu baniidx yäl̄rnibeega lojlu?

³ Dxejcti räjp Jesús lojreni:

—Narä sigajcza gunä te yäl̄gunabdiidx lojtu, colgudzu' diidxre loä, ⁴ ¿chuni'c baxhal̄ Juan te gutiobnisni rebejṅ? ¿La Dios o la rebejṅ, ä?

⁵ Niluxh laareni guslojreni canabdiidx lo sa'reni, räjpreni:

—¿Xhichani'c jie'tznu? Palga jie'tznu Dios baxhal̄ni, dxejc naani loonu: “¿Xhixhcuent ditu ninilajz xtiidxni?” ⁶ Palga jie'tznu: “Rebejṅ baxhal̄ni”, guiraa rebejṅ sucuaa guiij yejcnu, ju'tlireni nu-urnu sa'csi laareni rujnpacreni xhigab gunii Juan xtidx Dios.

⁷ Dxejc badzu'reni diidxre, räjpreni:

—Dinu guidon chuni'c baxhal̄ Juan te biädtiobnisni.

⁸ Dxejc räjp Jesús lojreni:

—Dizana guiniä xhi yäl̄rnibee rapä te runä recosre.

Xcuent remosguijdx

(Mt. 21:33-44; Mr. 12:1-11)

⁹ Dxejc gusloj canii Jesús loj rebejṅ, bijni cuentre lojreni, räjpni:

—Guyu' te bejn bazuj yaguub lo xyujni. Dxejc badedlaanini lo gaii bejn chääreni meed, sä'tnini zijt, gucladuxhni ro'c. ¹⁰ Che bidzujñ dxej ni guidojp cose'ch, baxhalni te xmosni sanab cose'ch ni riäjł xca'ni. Per laareni gudijnreni mosga, xhetliidi badeedreni chanäni lo xpaxhuaan yujga. ¹¹ Dxejcti baxhalni stee mos lojreni. Dxejc sigajcza gudilñäjrenini, gudijnrenini, luxh xhetza badeed-direni lojni, ganaxni gubi'ni lo xlamni. ¹² Dxejcti baxhalni ni riojñ mos lojreni, per sigajcza gudin-duxhrenini, barilaagwrenini.

¹³ 'Dxejc bejn baxhuaanga xhigab, naani: “¿Xhichani'c gunä? Suxhalä xi'nä ni sanälazä; che fiireni lojni, pet siureni xtiidxni.” ¹⁴ Dxejc che bahuii reni go'n-meed lo xi'nni, dxejc räjpreni lo sa'reni: “Laa deeni gac xtenni reyujre. Do'o guigu'tnuni te nuurnu xca'nu yujre gacni xtenu.” ¹⁵ Dxejcti barilaagwrenini lo yujga, sas bagu'trenini.

Dxejc gunabdiidx Jesús lojreni, räjpni:

—¿Xhichani'c gunnäj xpaxhuaan yujga reben guijdxre, ä? ¹⁶ Sidzujñni, sugu'tni guiraa reni cayujñ dzun-meed lo yujga, dxejc sudeedni yujga lo garenca bejn.

Che biejn diajgreni rediidxre, räjpreni:

—¡Na'c gusaan Dios gacni si'c!

¹⁷ Bahuii Jesús lojreni, dxejc räjpni:

—¿Xhixhni'c caj lo guijtz ni bacuaa redade' ni gunii xtidx Dios galoo? Ro'c cajni:

Guij nani guläcaj renani runchee yu',
ni'c agujc guisa'c ni guzuj galoo.

²⁷ Dxejc huij gaii resaduceos huihuiireni loj Jesús. Di resaduceos chalilajz rbaṅsac bejn lo rebeṅgut. Ni'cni gunabdiidxreni loj Jesús, ²⁸ räjpreni:

—Dad, Mastr, basa'n Moisés guijtz loonu, lojga caj: “Palga guet te bejn, gusaanni chäälni ruti xi'nni, nanabpac xca' bejtzni gunaaga te chu xi'nni con laani xcuent tobejtzni.” ²⁹ Guyu' gajdz niguii, bejtz najcreni. Sas cua' niguigalooga chäälni. Che gujtni ruti xi'nni. ³⁰ Dxejcti cua' ni rojpga gunaaga. Che gujtni, rutiza xi'nni. ³¹ Sigajcza guzajc ni riojnga. Si'cza guläsnäj gunaaga guigajdzreni. Guiraareni gujt, nicla tejreni di xi'nreni niu'. ³² Dxejcti näj gunaaga gujt. ³³ Guigajdzreni guläsnäjreni gunaare, ni'cni, che guibaṅsacreni lo rebeṅgut, ¿chu chääl gacni, ä?

³⁴ Dxejc räjp Jesús lojreni:

—Lo guedxliujre ruchṅaa rebejn, rudeedzarenixindxa'preni ruchṅaa. ³⁵ Niluxh rebejn ni agule Dios te chääreni xhaguibaa, näjza te guibaṅsacreni loj rebeṅgut, di reni'c guchṅaa, dizarenigudeed xindxa'preni guchṅaa, ³⁶ sa'csi diru gac guetreni, anajcreni si'c najc rexangl Dios. Laareni najc xi'n Dios sa'csi abaspaṅsac Diosreni. ³⁷ Moisésli basule'xcuent ni rbaṅsac reben loj rebeṅgut che bacuaani diidx xcuent yajg ni gurebajl. Ro'c gurejdxni Dios räjpni: “Xtios Abram, Xtios Isaac, näjza Xtios Jacoob”, ni'cni nabajṅpacreni lo Dios. ³⁸ Sa'csi di Dios gac Xtios rebeṅgut; najcni Xtios rebejn ni nabajṅpar tejpas, sa'csi par laani guiraa rebejn nabajṅ.

³⁹ Dxejc gaii reni ruluii leii badzu'reni diidxre, räjpreni lojni:

—Mastr, laaca guniilu.

40 Sa'csi dirureni niajx niniabdiidxrureni lojni.

Chu xi'n najc Crist

(Mt. 22:41-46; Mr. 12:35-37)

41 Dxejcti räjp Jesús lojreni:

—¿Xho mood rniireni Crist najc xi'n toDavid, ä? 42 Ni lagajc toDavid bacuaa lo reguijtz ni laa reSalmo:

Dad Dios räjp lo Xtradä:

43 “Gurej xladbeä cheni guidzujñli dxej ni gudzugä guiraa ni rdxe'ch lojlu te gacbeereni luj rnibeelu guira'ti.”

44 ¿Xho mood gacni xi'nni palga rnii toDavid lojni “Dad”?

Rucuaquij Jesús reni ruluu leii

(Mt. 23:1-36; Mr. 12:38-40; Lc. 11:37-54)

45 Guiraa rebejn cagucuadiajg che räjp Jesús loj rexpejn pacni:

46 —Colyajp cuidaad reni ruluu leii, sa'csi rdxaglajzreni rajcwreni lajd siool, rlanjzreni saru guinii guiraa rebejn “xchan” lojreni, rlanjzreni jiu bejnreni nez loguii, rlanjzreni cuereni lo reyagxhilsa'c neñ reguidobäz, näjza cadre rajc lanij. 47 Rudzucajzarení rexhixten regunabiuud, dxejc rojreni rele' siolduxh che rniabreni lo Dios te fii rebejn, te naa bejn najczeni beñdxan, luxh lojreni suxhañ Dios te castigwroru.

21

Gojn xten te gunabiuud

(Mr. 12:41-44)

1 Neñ guidoro bahuii Jesús cagusäl rebenrajp gojn neñ te guijn cadre rdojp gojn. 2 Bahuiizani lo

te gunabiuud, lacti proobni. Basäl̄ni xcojnni nen guijnga, tio'ptis melbäz basäl̄ni. ³ Dxejc räjp Jesús:

—Rniliäpac lojtu, gunabiuud proobga basäl̄runi loj guiraa reni casäl̄ gojn, ⁴ sa'csi guiraa redec ni cagusäl̄ xcojnni casäl̄reni tudxe'nsi xmeelreni, niluxh gunaare loj xcäl̄proobni, basäl̄ni guiragajc ni rajpni te jio' xhi gauni.

Räjp Jesús sibijl guidoro

(Mt. 24:1-2; Mr. 13:1-2)

⁵ Yu' reni cayujy diidx xcuent guidoro, räjpreni:

—Lacti sacruduxh rienni sa'csi guisa'c nacheeni, suchenäjzani xhidajl recossa'c ni badeed bejn̄ si'c gojn.

Dxejc gunii Jesús lojreni, räjpni:

⁶ —Sidzujn̄ dxej sibijl̄ guiralii ni cahuiitu, nicla tej guij di jia'n yejc sa'ni, guiragajcni sibijl̄.

Reseen ni chu che nitloj guedxliuj

(Mt. 24:3-28; Mr. 13:3-23)

⁷ Dxejc gunabdiidx rexpejn̄pacni lojni, räjpreni:

—Dad, Mastr, ¿guc gacni? ¿Xhi seen chu che gac recosga?

⁸ Räjp Jesús lojreni:

—¡Col̄susin̄ te na'c gusgueereni la'tu! Sa'csi xhidajl̄ reni jiäd̄d sinii: “Narä nacä Crist”, o “Asiäd̄gajxh redxej che jiäd̄dni”, per na'c chalilajztu xtiidxreni, na'cza chanajltureni. ⁹ Luxh che jiejn diajgtu cayajc guer̄ cadil̄näj sa' bejn̄, na'c guidxejbtu, sa'csi ganid recosga gac, luxh gad gal̄di nitloj guedxliuj.

¹⁰ Dxejc sanuu cayäjpni lojreni:

—Säjs te nación, sucuanäj stee nación, näjza te ladx bejn̄ sucuanäj stee lajdx bejn̄. ¹¹ Sajcza xuro,

su' gubijn, su'za yälguijdx nez ree nez rec. Luxh xhaguibaali sien guiraloj ni ruchejb näjza seenro.

¹² 'Luxh ganid gac recosre, siniaazreni la'tu, sirinajlreni la'tu, suteedreni la'tu trabajw. Suteedreni la'tu lo reben guidobäz, susälzareni la'tu nen latzguiib, sinäzareni la'tu nez loj reii näjza gubernadoor sa'csi rinälajztu xtidxä. ¹³ Luxh guiraa dee sajctu te gac gusule'tu xtidxä lojreni.

¹⁴ Na'c gunxgaatu xhigab nen lastootu xhini'c guiniitu lojreni, ¹⁵ sa'csi narä sunidxä diidx guiniitu, sunidxäza yälnajn lojtu te digac gudzu'reni diidx lojtu niclaza gacdi guiniyajreni xtiidxtu.

¹⁶ Näjza rexcozajntu sibire lojtu, suto'reni la'tu, sigajcza rebejtztu, resa'tu, rexamiigwtu, luxh yu'tu sugu'treni. ¹⁷ Guiraa rebejn guedxliuj sibälaz la'tu sa'csi rinälajztu xtidxä. ¹⁸ Niluxh ni'cla tej xquidxejctu di nitloj. ¹⁹ Luxh palga sutijptis lajztu, sajptu yäl nabajn par tejpas.

²⁰ 'Che fiitu tre' xhidajl soldaad guideb gabi guedx Jerusalén colyabee abidzujn dxej ni guibijlni. ²¹ Dxejc reni yu' guedx Judea, nanab guxunreni chacuatzlojreni nen redajn; reni yu' guedx Jerusalén, nanab jiunejzreni ro'c; reni suga' lo niaa, na'c guibi'reni lo guejdxga, ²² sa'csi nen redxejga sujn Dios fis lo guejdxga te soob rediidx ni caj lo reguijtz xten Dios. ²³ Probe'za regunaa ni nuu bäz nen redxejga, näjza regunaa ni ca' bäz, sa'csi su' yälhuinuxh lo guedxliuj, näjza fis ni gun Dios loj rebejnga. ²⁴ Yu'reni guet lo guer, yu'zaren chää pres, sijreni balti guedxzijt. Dxejc rebenzijt sinibee guedx Jerusalén che guiza'li redxej ni gusaan Dios guinibee rebejn ni di gac

xpejn Israel.

Cheni jiaäd Xi'n Niguii

(Mt. 24:29-35, 42-44; Mr. 13:24-37)

²⁵ Räjpzani:

—Dxejc su' seen lo gubijdx näjza lo bäii, näjza loj rebajle' ni yu' xhaguibaa. Luxh lo renacion guedxliuj su' rebejn yärsia', di jien xhi gunreni, sidxebduxhreni sa'csi siejn diajgreni chubeduxh lo nisdoo, säsduxh nis ni räjs lo nisdoo. ²⁶ Sitol rebejn xcuent yälrdebduxh che gunreni xhigab xhicharuni'c gac lo guedxliuj, sa'csi näj guideb guibaa sinibsejs. ²⁷ Dxejcti suhuiireni lo Xi'n Dios ni gujc Niguii, siäädni lo te za guideb xcälrnibeeni, näjza yälrdimbichaduxh. ²⁸ Che guisloj gac recosre, colsutijp lajztu, colguiliäs yejctu, colguibalajz sa'csi asadzujn dxej gusilajztu.

²⁹ Guniizani stee cuent lojreni, räjpni:

—iColhuii lo yagiigw näjza lo guiraa reyajg!
³⁰ Che fiitu acabääni be'n, colyacbee lagajc la'tu, abidzungajxh bäii nisguij. ³¹ Sigajcza che fiitu agusloj cayajc recosre, colyacbee asiäddzujn xcälrnibee Dios.

³² 'Rniliäpac lojtu, guiraa recosre sajc ansde guet rebejn ni yu' naj. ³³ Guibaa näjza guedxliuj sinitloj, rextidxä dini nitloj.

³⁴ 'iColsusin lagajc la'tu! Na'c gusaantu cha lajztu yälrausa'c, yälrä', yälga'ptu xhixtentu, dxejc ditu gacbee che bidzujn dxejga. ³⁵ Sa'csi si'c sidzujn dxejga loj guiraa reben guedxliuj. ³⁶ Colsusin, colbejdx, colguiniabtis lo Dios, te gac laatu lo guira'ti ni gac, gacza suutu nez loj Xi'n Dios ni gujc Niguii.

³⁷ Rdxee ruluii Jesús nen guidoro dxejc guxhijn sajjia'nni yejc dan Oliib. ³⁸ Rsilru ristie rebejn te rdzujnreni lo Jesús nen guidoro casob rsil, te gucuadiajgreni rextiidxni.

22

Ria'nreni diidx xho guiniaazreni Jesús

(Mt. 26:1-5, 14-16; Mr. 14:1-2, 10-11; Jn. 11:45-53)

¹ Siäddzungenajxh dxe lanij che rajwreni yätxtiil ni di säguuj, laaza lanijga pascw. ² Dxejc reni rnibee loj rebixhojz näjza rebejn ni ruluii leii caguiilreni xho gunreni te ju'treni Jesús, sa'csi rdxejbreni rebeñguejdx.

³ Dxejc biu' beñdxab lastoo Judas ni laaza Is-cariote, ni najc tej retzubitio'p xpejn pacni. ⁴ Dee huininäjni dade' ni rnibee loj rebixhojz näjza loj reni rnibee rexcuxhtis guidoo. Guninäj Judasreni xho gunni te guteedni Jesús ladzñaareni. ⁵ Dxejc bibalajzreni, bia'nreni diidx gudeedreni meel lojni. ⁶ Cuäjbti Judas, dxejcn guslojni caguiilni xho gunni guteedni Jesús ladzñaareni che rut bejndi suga'.

Xchej xten Dad Jesús

(Mt. 26:17-29; Mr. 14:12-25; Jn. 13:21-30; 1Co. 11:23-26)

⁷ Bidzujn dxe lanij che rajwreni yätxtiil ni di säguuj, che rugu'tzareni te xiil si'c ni caj lo xleii toMoisés. ⁸ Dxejc baxhal Jesús Pedr näjza Juan, räjpni lojreni:

—Colchayejn xchej xten pascw te guidaununi.

⁹ Dxejc laareni gunabdiidxreni lojni, räjpreni:

—¿Caro rlajzlu choyennuni?

¹⁰ Räj̄p Jesús lojreni:

—Cheni jiu'tu lo guejdx, sidxaagtu te dade' ni nuu te re' nis. Colchanajlni, coljiu' rolijz bejn̄ cadre jiu'ni laani. ¹¹ Dxejc colye'tz lo bejn̄ ni najc rolijzni ro'c: “Si'c naj Dad Mastr: ¿Con yu' cadre sajc gauxchenää rexpenä naj pascw?” ¹² Dxejc guluiini lojtu te yu' ni sojb jiaa yejc stee yu'. Asuchexгаа yu'ga. Ro'c colyejn̄ xhi guidaunu.

¹³ Sä'tireni. Si'ctis ni räj̄p Jesús lojreni, si'cpac bidxälreni. Dxejc bejnreni xchej xte lanij pascw gaureni.

¹⁴ Che bidzujn̄ or, gurenäj Jesús rexpejn̄pacni lo mex. ¹⁵ Dxejc räj̄pni lojreni:

—Guyuduxhä gaan gaunääpactu xchej xten pascw ansde tedä trabajwduxh. ¹⁶ Sa'csi rniä lojtu, diruna gaunää la'tu pascw cheni guidzujn̄li dxej ni gacni lo xcäl̄rnibee Dios.

¹⁷ Dxejc cua'ni te co'p, badeedni xquixtios lo Dios, räj̄pni:

—Colyā' dee, colgudeedni lo sa'tu. ¹⁸ Sa'csi rniä lojtu, diruna yā'ä nis ni rii yejc uub stehuält cheni guidzujn̄li xcäl̄rnibee Dios.

¹⁹ Dxejcti cua'ni yätxtiil, badeedni xquixtios loj Dios, gula'nini, gudisnini lojreni, räj̄pni:

—Dee najc si'c tiexhä ni gudedä ju'treni xcuenttu. Colyejn̄ screeza te guinalajztu narä.

²⁰ Si'cza bennäjni co'p che gulujx gudajwreni, räj̄pni lojreni:

—Ni yu' nen̄ co'p najc si'c xtienä ni guixe' che ju'treni narä xcuenttu te si'c jiu' didxcoob ni jia'n Dios con rebejn̄ ni aguleni.

21 'Per bahuilaare, bejn ni guto' narä sobganäj narä lo mexre. 22 Guliipacni, Xi'n Dios ni gujc Niguii sinuu tedni loj nezyuj ni abaluii Dios lojni. Luxh proobza bejn ni guto' narä.

23 Dxejc gusloj canabdiidxreni lo sa'reni, ¿chuchani'c gunni?

Cayejyreni chuni'c najc benroru

24 Sas gusloj cayejyreni, don chuni'c guibee gac benro lojreni.

25 Dxejcti räjp Jesús lojreni:

—Rereii ni rnibee lajdx bejn ni digac xpejn Israel, rnibeereni lojreni astoo xtenpacreni najc reguejdxga. Luxh rebenguejdxga rni lacti hueen najc rereiiga. 26 Per la'tu na'c gactu si'c. Nani najc bengoolru lojtu, ni'c riäjł gacni si'c najc ni huinru lojtu. Luxh nani rnibee riäjł gacni si'c mos.

27 ¿Chuni'c sajcro lo bejn? ¿La bejn ni rbej lo mex te gauni o la ni ruteed xhi gauren lo mex? ¿La xhet sajcdiru bejn ni sojb lo mex, ä? Niluxh narä yu'ä lojtu si'c ni ruteed xhi gauni.

28 'La'tu najctu ni gusunäj narä guideb ni gudedä retrabajw ni gudedä. 29 Ni'cni narä runidxä yälrnibee lojtu sigajc ni baniidx xtad yälrnibee loä, 30 te gautu, yätu lo xmexä xhaguibaa, te cuezatu lo yagxhil cadre guntu yälğuxhtis loj rexpejn guitzubitio'p rexagdo Israel.

*Räpxgaa Jesús di Pedr guicäj p numbeeni
(Mt. 26:31-35; Mr. 14:27-31; Jn. 13:36-38)*

31 Räjp Jesús loj Simón:

—Simón, Simón, agunab bendxab ni laa Satanás luj te gusniibni luj si'c rusniib bejn xob te jiani.

32 Narä agunabä lo Dios xcuentlu te na'c jiäädx

xcäl̄rililajzlu. Luxh luj che gusiejch lajzlu, guibi'lu, bastioob lastoo resa'lu.

³³ Räj̄p Simón lojni:

—Dad, narä sirinalälu; mase gusäureni luj latzguiib, näjza narä siäunäälu; mase ju'treni luj, näjza narä setnääl̄u.

³⁴ Dxejcti räj̄p Jesús loj Simón:

—Pedr, rniä lojlu, nicla gajd guidgaii cuedxa' nadxej niluxh luj alaräj̄plu choṅli huält, dipaclu gumbee narä.

Nanab soob rediidx ni bacuaareni xcuent Jesús

³⁵ Dxejc gunabdiidx Jesús lojreni räj̄pni:

—Che ganaxtu baxhalä la'tu, xhet bolsdi sanätu, nicla carterdi, niclaza stee gura'chdi, ¿la yu' xhi biquiintu, xhi biääd̄x lojtu, ä?

Dxejc räj̄preni:

—Xheti.

³⁶ Dxejc räj̄pni lojreni:

—Luxh ṅaj rniä lojtu, ni rajp bols, suchanänini; sigajcza carter. Luxh ni di ga'p espaad, guto'ni xchamarni te siini tejni. ³⁷ Sa'csi rniä lojtu, sisiojb rediidx ni caj lo requijtz Dios xcuentä, cadre caj: “Bigabnäjni reben̄ latsiaj.” Guiraa ni caj lo reguijtz xten Dios xcuentä nanab soobpacni.

³⁸ Dxejc räj̄preni lojni:

—Dad, aree tio'p espaad.

Dxejc räj̄pni lojreni:

—Sajl reni'c.

*Rbedx-rniab Jesús loj Dios
(Mt. 26:36-46; Mr. 14:32-42)*

³⁹ Dxejcti birii Jesús, si'cni rujnpacni, sääni nez dajn ni laa Oliib. Dxejc sanajl rexpejn̄pacni. ⁴⁰ Che bidzuj̄nreni ro'c, räjpni lojreni:

—Cołcuejdx, col̄nab lo Dios te na'c jiajbtu lo dojl̄.

⁴¹ Dxejc gubicaj Jesús lojreni, huijni te lajt zite' cadro suga'reni, si'cti cadro rdzuj̄n te guīj che rucuaanini. Ro'c bazuxhijbni, gurejdx-gunabni lo Dios, ⁴² räjpni:

—Xtadä, palga rlajzlu, basłaa narä loj trabajw-duxhre. Niluxh na'c gacni si'c ni rlazä narä. Bejn si'cni rlajzlu gunlu.

⁴³ Dxejc biricaj te xangl Dios lojni te badeedni yäl̄rutiplajzni. ⁴⁴ Lał̄ni cadejdni trabajwduxh, cayac-huinuxh lajzni, cabedx-canabruni lo Dios. Guzunisl̄ini gusloj catejb lo yuj biniduxh si'c rejn lojni.

⁴⁵ Cheni huisuni, gulujx gurejdx-gunabni lo Dios, huijni cadro suga' rexpejn̄pacni. Ro'c bidxäl̄nreni nagayejs guiraareni sa'csi cayac-huin lajzreni. ⁴⁶ Dxejc räjpni lojreni:

—¿Xhicuent nagajejstu? ¡Cołchastie! ¡Cołnab lo Dios te na'c jiajbtu lo dojl̄!

Chē gunaazreni Jesús

(Mt. 26:47-56; Mr. 14:43-50; Jn. 18:2-11)

⁴⁷ Lał̄ ni canii Jesús lojreni, bidzuj̄n xhidajl bejn. Tej rexpejn̄pacni ni laa Judas, nijdni nez loj re-bejn̄ga. Dxejcti gubigni loj Jesús, te bachagro'ni loj Jesús. ⁴⁸ Dxejc räjp Jesús lojni:

—Judas, ¿la con te yäl̄ruchagro' rutedlu Xi'n Dios ni gujc Niguii ladz̄naa rebejn̄re, ä?

⁴⁹ Che bahuii reni suganäj Jesús xhini'c cayajc ro'c, gunabdiidxreni loj Jesús, räjpreni:

—Dad, ¿la sixa'tnu yejcreni con spaad, ä?

⁵⁰ Sas tej rexpejn Jesús gudilnäj te mos xten ni rnibee loj rebixhojz, batiu'ni diajgni ladbee.

⁵¹ Dxejc räjp Jesús lojreni:

—¡Agujc! ¡Colgusaanreni!

Dxejc gudajn Jesús diajg mosga, basiajcnini.

⁵² Gunigajc Jesús loj reni rnibee loj rebixhojz näjza reni najc guixhajg xten guidoo näjza rebengool, guiraa reni siädxiiinini, räjpni:

—¿La siädnätu spaad näjza garo't, astoocanu siädxiiitu te gubaan, ä? ⁵³ Cheni suga'a lojtu guixee neñ guidoo, ditu nuhual narä. Per dee najc xortu, luxh arnibee yälncäy la'tu.

Di Pedr guicäjp numbeeni Jesús

(Mt. 26:57-58, 69-75; Mr. 14:53-54, 66-72; Jn. 18:12-18, 25-27)

⁵⁴ Dxejcti gunaazreni Jesús huinärenini rolijz bixhojz ni rnibee lo guiraa rebixhojz. Siädnäj Pedrni zit-zijt. ⁵⁵ Che bidzujnreni gule'creni guiboo galäii lole' xten bixhojzga, gurejreni guideb gabi, te bidxa' lajzreni. Näj Pedr nadxaag lojreni gurej ro'c. ⁵⁶ Dxejc te gunaa ni rujn dzuun ro'c, che bahuiini sobga' Pedr ro'c, rdxelajtisni lojni, räjpni:

—Näj niguiire guyunäj Jesús.

⁵⁷ Dxejc basuni' Pedr räjpni:

—Nan, dina gumbeäni.

⁵⁸ Che gojl stera't, che bahuii stee bejn lojni, räjpni lojni:

—Näj luj najclu te rexpejnni.

Per Pedr räjp lojni:

—Gurniälojlu, Dad, dina gacä xpejnni.

⁵⁹ Che gudejd si'cti teb or, räjp stee bejn lojni:

—Guliipacni, näj bejnre guyunäjni, sa'csi laani najczani te beñ Galilee.

⁶⁰ Dxejc räjp Pedr lojni:

—Gurniälojlu Dad, dipacna ganä xhini'c caniiilu loä.

Lałni canii Pedr rediidxre, guredxa' te guidgail, ⁶¹ luxh gubiréza Jesús, bahuidzu'tzni lo Pedr, dx-
ejc banalajz Pedr nani gunii Jesús lojni, räjpni:
“Che gajd guidgail cuedxa', abazuni'lu choñ huält,
räjplu dilu gumbee najrä.” ⁶² Dxejcti guc-huin lajz
Pedr, biriini ro'c, ronduxhni.

Rniyajreni Jesús

(Mt. 26:67-68; Mr. 14:65)

⁶³ Rebejn ni canäj Jesús, gusloj cagux-
hisnäjrenini, caguijnzarenini. ⁶⁴ Dxejc basäureni
lojni, gudajpreni lojni, räjpreni lojni:

—¡Gunii chuni'c gudijnlu!

⁶⁵ Luxh guiraloj cayäjbreni lojni,
caniyaduxhrenini.

Bidzunnäjreni Jesús nez loj rebixhojz

(Mt. 26:59-66; Mr. 14:55-64; Jn. 18:19-24)

⁶⁶ Che bara yääl, bidojp rebengool ni rnibee,
näjza reni rnibee loj rebixhojz, näjza rebejn ni
ruluii leii, huinäreni Jesús te suuni nez lojreni neñ
yu' cadro rujnreni yälguxhtis. Dxejcti räjpreni lojni:

⁶⁷ —Palga luj najclu Crist, bicäjpni loonu.

Dxejc badzu' Jesús diidxre lojreni, räjpni:

—Palga guicäpäni, ditu chalilajz. ⁶⁸ Luxh palga
gunä te yälgunabdiidx lojtu xcuent Crist, ditu
gudzu' diidxga loä. ⁶⁹ Per najli sibej Xi'n Dios ni
gujc Niguii xladbee Gueb Dios ni yu' xhaguibaa.

⁷⁰ Dxejc gunabdiidx guiraareni lojni, räjpreni:

—Mbjaj pues, ¿la luj najclu Xi'n Dios, ä?
 Dxejc badzu' Jesús diidxre lojreni räjpni:
 —Nacäni, si'cni najtu la'tu.

⁷¹ Dxejc räjpreni lo sa'reni:

—¿Xhirucxhamaaz rlajztu? Dirunu guiquiin diidx
 guinii bejn, sa'csi lagajc nuurnu abiejn diajgnu
 diidx ni guniini lagajc laani.

23

Jesús nez loj Pila't

(Mt. 27:1-2, 11-14; Mr. 15:1-5; Jn. 18:28-38)

¹ Dxejc huisu guiraareni, huinäreni Jesús nez loj
 Pila't. ² Ro'c guslojreni cabe'creni xquejni, räjpreni:

—Bidxälnu bejnre cayujnni biejy lo rexpejnnu.
 Räjpzani xhet nanabdi quiixnu impuest lo reii
 César. Caniizani laani najcni Crist, nalajznu na-
 jczani reii.

³ Dxejc gunabdiidx Pila't lojni, räjpni:

—¿La luj ni najc reii xten rexpejn Israel, ä?

Sas badzu' Jesús diidxre räjpni:

—Najcni lagajc si'c ni guniilu.

⁴ Dxejc räjp Pila't loj reni rnibee loj rebixhojz
 näjza loj guiraa rebejn:

—Dina guidxälä nicla tej dojl xten bejnre.

⁵ Niluxh laareni sanuutis caniireni, dipru cani-
 ireni, räjpreni:

—Guiraa reben Judea cayu' yärsia' xcuent
 xcälrluiini. Guslojni guedx Galilee, luxh reeli
 sanuu caguluiinini.

Jesús nez loj Herodes

⁶ Che biejn diajg Pila't rediidxre, gunabdiidxni:
 “¿La Galilee siääd bejnnga?” ⁷ Cheni räjpreni

ro'c siäädni, baxhałnini loj Herodes ni najc gubernadoor xten Galilee, sa'csi nen redxejga yu' Herodes guedx Jerusalén. ⁸ Che bahuii Herodes loj Jesús, bibalajzni sa'csi agujc xchej rłajzni fiini lojni, sa'csi abiejn diagni diidx xcuent ni cayujnni. Luxh rłajzni fiini gunni te milaagwr. ⁹ Xhidajl yälgunabdiidx bejn Herodes, luxh xhet guniidi Jesús. ¹⁰ Ro'c suga'za reni rnibee loj rebixhojz nájza rebejn ni ruluii leii, cabecduxhrureni xquejni. ¹¹ Dxejc gulälaz Herodes náj rexsoldaadni Jesús, baxhiznäjrenini, ni'c bashuajcwrenini te ladsa'c sa' ni rajcw reii, dxejcti baxhałsacrenini loj Pila't. ¹² Lagajc dxejga, Pila't nájza Herodes gujcreni amiigw, luxh galoo bidxe'ch lo sa'reni.

Gunibeereni guet Jesús

(Mt. 27:15-26; Mr. 15:6-15; Jn. 18:39–19:16)

¹³ Dxejc gurejdx Pila't reni rnibee loj bixhojz, nájza rebengool ni najc guxhtis, nájza rebenguejdx.

¹⁴ Dxejc räjpnı lojreni:

—La'tu biädñātu bejnre loä, najtu caguquilni rebejn gunreni biejy, luxh narä agunabdiidxä guiraloj lojni nez lojtu, luxh abahuiitu dina nidxälä nicla tej dojl ni cagucuaquijtuni.

¹⁵ Niclaza Herodes di nidxäl nicla tej dojl, ni'cni baxhałsacnini loonu, luxh abahuiitu xhet dojldi bejnı te guetni. ¹⁶ Ni'cni quinäni, dxjecti gusłaáni.

¹⁷ Najc costumbr rusłaa Pila't te bejn ni yu' nen latzguiib casob rajc lanijre. ¹⁸ Per guiraareni guredxa'reni si'c tejsi bejn, räjpreni:

—ıBagu't bejnre, basłaa Barrabás!

¹⁹ Barrabás najc ni basälreni latzguiib sa'csi batojpni te cuaa bejn ni bacuanäj resoldaad xten

Rom, näjza sa'csi yu' chu bagu'tni. ²⁰ Rlajzpac Pila't guslaani Jesús, ni'c gunisacni lojreni, ²¹ niluxh rebejn dipru guredxa'reni, räjpreni:

—¡Bacuaani lo cruju, bacuaani lo cruju!

²² Riojn gunisac Pila't lojreni, räjpni:

—¿Xhi do!duxh bejni? Xhetlidi dojl rdxälä bejni te guetni. Ni'cni siguinäni dxejc suslaäni.

²³ Luxh laareni sanuutis guredxa'reni, gunabreni xcajni lo cruju. Luxh sa'csi guredxa'tisreni, bejntireni gaan gujc si'c ni rlajzreni. ²⁴ Dxejc cuäjb Pila't gunibeeni gac si'c ni gunabreni. ²⁵ Dxejc baslaani bejn ni yu' latzguiib sa'csi bejni bieju, bagu'tzani bejn, dxejc badeedni Jesús lojreni te gunnäjrenini si'ctis ni rlajzreni.

Che cuaj Jesús lo cruju

(Mt. 27:32-44; Mr. 15:21-32; Jn. 19:17-27)

²⁶ Cheni sanäreni Jesús xcaj lo cruju, gunaazreni te bejn ni laa Simón ni siäd guedx Cirene; basaj bejnga lo niaa. Dxejc basguurenini cruju, siädnajltini dejt Jesús.

²⁷ Siädnajlza xhidalduxh bejn, näjza xhidajl gunaa ni cayonduxh, cabedxa'reni sa'csi cayac huinduxh lajzreni xcuent Jesús. ²⁸ Dxejc gubiré Jesús, räjpni lojreni:

—Gunaa Jerusalén, na'c roontu xcuentä, colyoon lagajc xcuenttu näjza xcuent rexi'ntu. ²⁹ Sa'csi sidzujn dxej gäbreni: “Chicbaa regunaa ni di gacdi chu xi'nni, chicbaaza reni di nuxi'n, renani di nusiä' báz.” ³⁰ Dxejc guisloj rebejn gäb loj redajn: “Coljiajb yejcnu”, säjbzaren loj relom: “Colgucua'tz nuurnu.” ³¹ Palga scree runnäjreni narä ni nacä

si'c te yagnaga, aticaxh gunnäjreni la'tu ni najc si'c te yagbijdz.

³² Sanäzareni tio'p beņguijdx xcajzareni loj recrujz, guetnäjreni Jesús. ³³ Che bidzujņreni te lajt ni laa Calabeer, ro'c bacuaareni Jesús lo te cruju, bacuaazareni guiro'p rebeņguijdxga lo stio'p cruju, tejni xladbee, steeni xladbäjgwni. ³⁴ Cheni cagucuaa rebejņreni lo cruju, gunii Jesús, räjņni:

—Xtadä, badzucaj xtojļ rebejņre, sa'csi direni gan xhini'c cayujņreni.

Dxejc gudzujt resoldaad daad yejc xhajnbi, te gudisreni xhajnbi cua'renini. ³⁵ Suga' rebejņ ro'c cadxelojtisreni. Näjza reguxhtis caguxhisnäjreni laani, cayäjņreni:

—Balti bejņ baslaani, naj suguslaani lagajc laani palga guliini laani najcni Crist ni gule Dios.

³⁶ Näjza resoldaad caguxhisnäjņi, gubigreni lojni te badeedreni bin-nii yäni. ³⁷ Dxejc räjņreni lojni:

—Palga guli najclu reii xten rexpejņ Israel, baslaa lagajc luj.

³⁸ Luxh bacuaareni gaii diidx loj te baräjd ni cuaj yejc cruju. Con didx griegw, con didx latīņ, näjza didx hebreo, bacuaareni scree: “Dee najc Reii xten rexpeņ Israel.”

³⁹ Te rebeņguijdx ni najl lo te cruju ni caj cuä'ni caniyajņi Jesús, räjņni lojni:

—Palga luj najclu Crist, baslaa lagajc luj năgajcza nuurnu.

⁴⁰ Per beņguijdx ni najl lo cruju stelaadga gudidxa'ni loj stee beņguijdx ni caniyaj Crist, räjņni:

—¿La dilu guidxejb Dios? ¡Ni cayajczalu tejsi castiigw! ⁴¹ Per nuurnu cayajcnu castiigw ni riäjļ

gacnu te guidiixnu redojl ni biennu. Luxh laani xhet dojl_{di} bejn_{ni}.

⁴² Dxejc räjpni loj Jesús:

—Bazalajzlu narä che guidzuj_{nu} lo xcäl_rnibeelu.

⁴³ Dxejc badzu' Jesús diidxre, räjpni lojni:

—Rniliäpac lojlu, lagajc nadxej chunäjl_u narä xhaguibaa.

Che gujt Jesús

(Mt. 27:45-56; Mr. 15:33-41; Jn. 19:28-30)

⁴⁴ Agojl si'cti läidxej. Dxejc bicäy_y guideb guedxliuj, si'c bianxcäy_y si'cti rcachont_i. ⁴⁵ Bicäy_y lo gubijdx, luxh ladró ni najl ne_n yudxanro xten guidoro, biräjsni gucni tio'p la'. ⁴⁶ Dxejcti guredxa' Jesús, räjpni:

—Xtadä, ladz_naa_{lu} rutedä xaimä.

Che guniini si'c, gujttini.

⁴⁷ Che bahuii capitán ni rnibee loj resoldaad guiraa ni guzajc, gulä'pni xpala'n Dios, räjpni:

—Guliipacni, xhet dojl_{di} bejn bejn_{re}.

⁴⁸ Guiraa rebejn ni suga' ro'c ni bahuii guiraa ni guzajc ro'c, gubi'reni rolizreni, cayäazreni lagajc lastooreni. ⁴⁹ Luxh guiraa reni rumbee Jesús, näjza regunaa ni biäd_naj_{ni} che biriilini Galilee, zijtru bia'nreni cahuiireni guiraa recos ni cayajcre.

Che biga'tz Jesús

(Mt. 27:57-61; Mr. 15:42-47; Jn. 19:38-42)

⁵⁰ Guyu' te bejn ni laa José, lacti huen najcni, luxh laaca rujnni guira'ti. Siädni guedx Ari-matea, región Judea. Nadxaagzani loj reni rnibee ne_n guidoro xten rexpejn Israel. ⁵¹ Cabäjzza José jiäd yäl_rnibee xten Dios, ni'cni dini nidxaglazj

nani bejn resa'ni. ⁵² Dxejcti huijni lo Pila't, gun-abni tiejxh Jesús. ⁵³ Che gulättnini lo cruzj, batejbnini neñ te bariaad, dxejcti bacua'tznini neñ te baa ni guc-chee cuä' te guilaj. Nacoob baaga, nicla tej bejn gajd guiga'tz ro'c. ⁵⁴ Dxejga najc dxej ni rusucheereni guira'ti, luxh agojl jiu' dxej ni rusilajzreni.

⁵⁵ Regunaa ni guzanäj Jesús che biriilini Galilee huihuiireni robaaga te bahuiireni xho gudixhreni togoolga neñ baa. ⁵⁶ Che gubi'reni rolijzreni bencheereni recuaan ni rlianexhduxh näj te ni najc si'c te saj ni rlianexhduxh ni ruzaareni retogool. Dxejcti basilajzreni dxej ni rusilajz bejn, si'cni caj lo xleii Moisés gunreni.

24

Che gubañsac Jesús lo rebenğut (Mt. 28:1-10; Mr. 16:1-8; Jn. 20:1-10)

¹ Dxej ni gusloj xmaanga, rsildooru huinä regunaaga robaa recuaan ni rlianejxh ni bencheereni. ² Che bidzujñreni, bahuiireni agubicaj guij ni rusäu ro' baa. ³ Dxejc che biu'reni neñ baaga, direni nidxäl tiejxh Jesús. ⁴ Lał ni cadxelojreni, di jien xhi gunreni, biricaj tio'p dade' gusuj cuä'reni. Rdim-bichaduxh xhajbreni. ⁵ Bidxebduxh regunaaga, basajbreni lojreni lo yuj. Dxejc räjp redade'ga lojreni:

—¿Xhicuent siädtiltu te bejn ni nabajñ lo rebenğut, ä? ⁶ Rutini ree. Agubañsacni. Colğusnaj lajztu rediidx ni guniini cheni guyusijcni Galilee, ⁷ che najni lojtu: “Riäjł jiajb Xi'n Dios ni gujc Niguii

ladzṇaa rebēdojḷ, xcajzani lo cruzj, dxejc ni riojn dxejga sibansacni loj rebēgut.”

⁸ Dxejc banaj lajz regunaa xtidx Jesús, ⁹ biriireni robaa, gubi'tireni te bijreni diidx lo retzubiteeb rexpejnṇpacni nājza loj rebejn ni yunājreni. ¹⁰ Reni huisa'n diidx loj rexpejnṇpac Jesús najc redee: Marii Magdalen, nājza Xuan, nājza Marii xnan Jacob, nājza sgaii gunaa. ¹¹ Niluxh rexpejnṇpacni bejn xhigab didxnayäälni, direni nililajz xtidx regunaaga.

¹² Dxejc huisu Pedr, ruxunḷlini huijni ro' baa. Che gudixhlojni, bahuiini neṇ baaga, ganaxtis bariaad dzuub te laad. Dxejc gubi'ni rolijzni, rdxelojtisni xcuent ni gujc.

*Ni guzajc lo nezyuj ni sii guedx Emaús
(Mr. 16:12-13)*

¹³ Lagajc dxejga, tio'p rexpejnṇpacni sääreni te guejdx ni laa Emaús, ni ria'n si'cti tzubiteeb kilómetro loj guedx Jerusalén. ¹⁴ Laḷ ni sasajreni lo nezyujga, cayujyreni diidx xcuent reni gujc ro'c. ¹⁵ Laḷ ni caniireni gubig Jesús lojreni, gusloj sasanājnireni. ¹⁶ Luxh mase cahuiireni lojni, yu' xhi badxojn niembeerereni. ¹⁷ Dxejc gunabdiidx Jesús lojreni, räjpni:

—¿Xhini'c rujytu laḷ ni sasajtu, ä? ¿Xhicuent cayac-huin lajztu?

¹⁸ Tejreni ni laa Cleofas badzu' diidxre, räjpni:

—Guiraasi bejn najn xhi gujc neṇ guedx Jerusalén. ¿La lujtis bia'nlu neṇ guejdxga ni di gan xhi gujc ro'c, ä?

¹⁹ Dxejcti räjp Jesús lojreni:

—¿Xhini'c gujc ro'c?

Dxejc räjpreni lojni:

—Recos xcuent Jesús ni siääd guedx Nazare't, ni gujc te niguii ni gunii xtidx Dios, rajpni yälrnibeduxh xten Dios loj redzuun ni rujnni näjza loj rediidx ni rniini, nez loj Dios näjza nez loj rebejn. ²⁰ Näjza xho bejn reni rnibee loj re-bixhojz näjza rexcuxhtisnu, bateedrenini ladzṅaa reni gunibee guetni, dxejc bacuaarenini lo cruzj. ²¹ Niluxh nuurnu cabäaznu laani gacni nani nuslaa rexpejn Israel ladzṅaa rebenzijt. Naj agujc choṅ dxej ni gujc recosre. ²² Luxh yu' gaii gunaa ni nadxaag loonu ni baschelojreni nuurnu. Barsil, che huijreni robaa xtenni, ²³ direni nidxäl tiejxhni. Biädsanreni diidx loonu najreni bahui-ireni lo tio'p xangl Dios ni räjp lojreni, agubaṅsac Jesús lo rebengut. ²⁴ Dxejcti huihuii gaii sa'nu robaa, bahuiizareni najcni si'ctis ni naj regunaaga loonu, niluxh direni nuhuii loj Jesús.

²⁵ Dxejc räjp Jesús lojreni:

—¡Lacti nayääl tre' xcäriejntu! Lacti neṅ rililajztu xtidx redade' ni gunii xtidx Dios xcuent Crist. ²⁶ ¿La di nungäjl tedxgaa Crist retrabajwduxhre dxejcti jiu'ni lo xcälrdimbicha' Dios, ä?

²⁷ Dxejc gusloj cagusule'ni guiraa rediidx ni caj lo xquijtz Dios xcuent Crist. Guslonäjni xtidx Moisés, dxejc huinuuni basule'ni guiraa reguijtz ni bacuaa redade' ni gunii xtidx Dios.

²⁸ Che bidzujṅreni guejdx cadre sääreni, bejn Jesús si'cni chanuuni chääni lo nezyuj. ²⁹ Dxejc laareni bascuääzrenini te jiannäjnireni, räjpreni lojni:

—Biannäj nuurnu, sa'csi acayajc gudxej, agojl jiu' guxhijñ.

Dxejcti biu' Jesús te jiannäjnireni. ³⁰ Cheni sobganäjnireni lo mex, cua'ni yätxtiil, benle'nini, dxejc gula'nini, gudisnini lojreni. ³¹ Lagajc dxejc, baxhal Dios balojreni, biembeereni Jesús, dxejc laani gunitlojni lojreni. ³² Dxejcti räjpreni lo sa'reni:

—¿La di lastoonu nibeguiboo cheni siädniini loonu lo nezyuj, che cagusule'ni xtidx Dios?

³³ Dxejc dirureni nibäjz ro'c, alga gunasgajcreni nez, gubi'reni guedx Jerusalén. Ro'c bidxälreni abidojp xpejn̄pac Jesús näjza sgaii bejn̄. ³⁴ Dxejcti bijreni diidx loj guiro'preni bidzujñ, räjpreni:

—Guliipac gubaṅsac Jesucrist, luxh baluilojni loj Simón.

³⁵ Dxejc guiro'p reni bidzujñ bijzareneni diidx ni gusajcreni lo nezyuj, näj xho biembeezareneni Jesús che gula'ni yätxtiil.

Baluiloj Jesús loj rexpejn̄pacni

(Mt. 28:16-20; Mr. 16:14-18; Jn. 20:19-23)

³⁶ Canisi'creni rediidxre chela baluiloj lagajc Jesús galäiireni, guniini xchan lojreni, räjpni:

—¡Colcuedcxi lajztu!

³⁷ Per laareneni rdxeloreni bidxejbreni, naareneni cahuiireni lo te sprit. ³⁸ Dxejc räjpre Jesús lojreni:

—¿Xhicuent cadxejbtu? ¿Xhicuent rac tio'p lastootu? ³⁹ ¡Colhunii reṅaä, näjza reni'ä! Lagajc naräni. Colcajn narä te fiipactu laa naräni, sa'csi anajntu di te sprit ga'p bääl niclaza tzujt si'c rapä narä.

⁴⁰ Che guniini rediidxga, baluigajcni reṅaani näjza reni'ni. ⁴¹ Laḷ ni cadxelojreni, di gacdi

chalilajzreni, sa'csi cabaduxh lajzreni, räjpni lojreni:

—¿La yu' xhi rajptu gauä ree, ä?

⁴² Dxejc badeedreni te la' bälbigue', näjza te la' seer ni yu' tzujn. ⁴³ Ni'c cua'ni gudajwnini nez lojreni. ⁴⁴ Dxejc räjpni lojreni:

—Dee najc xtidxä ni rniä lojtu cheni yusicä lojtu, rniä riäj̄l soob guiraa rediidx xcuentä ni caj lo xleii Moisés, näjza lo rexquijtz redade' ni gunii xtidx Dios näjza ni caj lo rexquitz Salmos.

⁴⁵ Dxejcti basanijni xcäriejnreni te gucbeereni xhi säloj rediidx ni caj lo rexquijtz Dios xcuentni.

⁴⁶ Dxejc räjpni lojreni:

—Scree caj lo reguijtz: Nanab guet Crist, dxejc ni riojn̄ dxej, guibaṅsacni loj rebengut. ⁴⁷ Sire'chza diidx xcuent xho ruslaa Crist rebejn̄ neṅ dojl̄ che rusiejchreni lajzreni, che rililajzreni xtiidxni. Guedx Jerusalén guislojni, dxejc sire'ch diidx guideb guedxliuj. ⁴⁸ La'tu najctu testiigw guiraa recosre. ⁴⁹ Narä suxhalä Sprit Dxaṅ xten Dios lojtu, ni'c coljia'n guedx Jerusalén cheni jädläjzlini neṅ lastootu, guniidxni yäl̄rnibee ni siääd xh-aguibaali.

Huäjs Jesús xhaguibaa

(Mr. 16:19-20)

⁵⁰ Dxejc huinä Jesúsreni stelaad guedx Jerusalén gajxh lo te guejdx ni laa Betania. Ro'c guläsni naani, benle'ni yejcreni. ⁵¹ Laṅ ni cayujnni si'c, gubicajni lojreni, huäjsni xhaguibaa. ⁵² Peta laareni gu-lujx gojnrenini, dxejc cabalazduxhreni gubi'reni guedx Jerusalén. ⁵³ Ro'c guixe-guixee guyu'reni neṅ guidoro, calä'preni xpala'n Dios. Sugacni si'c.

Xtidxcoob Dios ni biädinä dad Jesucrist
New Testament in Zapotec, Mitla (MX:zaw:Zapotec,
Mitla)

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

5cff1274-8dc3-5398-a94d-f6033bb363c9